

بنت عادية

رواية

تأليف

آية عباس

طبعة ٢٠١٧

عباس، آية.

بنت عادية: رواية/ آية عباس - -. الجيزة: أطلس للنشر والإنتاج
الإعلامي، ٢٠١٦ .

٢٢٤ ص، ٢٠ سم

تدمك: ٩٧٨ ٩٧٧ ٣٩٩ ٤٩١ ٤

١- القصص العربية.

أ - العنوان

بنت عادية

رواية

تأليف

آية عباس



الكتاب : بنت عادية

المؤلف : آية عباس

الغلاف : إسلام البلاط

الناشر: أطلس للنشر والإنتاج الإعلامي ش.م.م

٢٥ ش وادى النيل - المهندسين - الجيزة

atlas@innovations-co.com

www.atlas-publishing.com

تليفون : ٣٣٠٤٢٤٧١ - ٣٣٤٦٥٨٥ - ٣٣٠٢٧٩٦٥

فاكس : ٣٣٠٢٨٣٢٨

رئيس مجلس الإدارة
سرطانة محمد مصطفى

عادل المصرى

عضو مجلس الإدارة
محمد مصطفى محمد مصطفى

الناشر
عادل المصرى

نوران المصرى

رقم الإيداع

٢٠١٦/٢٥٧٠٩

التسجيل الدولي

٩٧٨-٩٧٧-٢٩٩-٤٩١-٤

الطبعة الاولى

طبعة ٢٠١٧

إهداء

أهدي هذا العمل إلى أجمل نساء الدنيا أمي الحبيبة وأبي
أكثر الرجال احتراماً وأشكر لهما أنهما لم يدخرا يوماً جهداً في
جعل حياتي أفضل دائماً، وفي تشجيعي على أن أكون مميزة في كل
المجالات، وإلى أخي أول صديق في عمري ورفيق حياتي العلمية
والعملية، وإلى أختي أحسن خالة وأطيب قلب وإلى زوجي دمت
سندي وحببي وقرة عيني، وأخيراً إلى أحلى حاجة في حياتي
أولادي.

obeikandi.com

الحلقة الأولى (الجواز أولاً)

النهاردة يوم نتيجة الثانوية العامة، البيت كله على أعصابه رغم إنه كله بيحاول بيان هادي عشان خاطر سلمى، هي تعبت أوي السنة دي، أبوها وأمها من وهي صغيرة مش بيقولوها غير يا دكتورة، نفسها تحقلهم الحلم ده مع إنها عمرها ما ركزت هي فعلاً عايزة تطلع دكتورة ولا لأ، المهم إن النتيجة طالعة بعد حبة صغيرين على النت، وبما إن سلمى البنيت الرقيقة المؤدبة اللي كل العيلة بتحبها، فعمتها جت عشان تبقى معاها، وبنيت خالها هبة كمان وإخواتها الصبيان اللي أصغر منها كلهم قاعدين بيحاولوا يهرجوا ويفتحوا مواضيع يشغلوها بيها. الموقع فتح سلمى جابت ٩٩,٥ عمتها بتزغرط وأمها قامت خدتها في حضنها: مبروك يا أجمل دكتورة في الدنيا، وقامت تستقبل التليفونات وتطمئن الناس وبنيت خالها وإخواتها بيهيصوا وعمالين يظبطوا عشوة حلوة احتفالاً بيها، فضلت هي وباباها يبصوا لبعض، هو ما باركلهاش بيبصلها جامد أوي وبعدين دمع، دمع جامد أوي.

نظرت إليه بتعجب يملؤه الخوف: بابا إنت بتعيط؟

- أه بعيط. أول مرة في حياتي ما أمسكش نفسي وأعيط، أنا كنت خايف أوي، خايف على زعلك، خايف تتكسري أو تتقهرى على مجهودك، أنا دعيت كتير أوي إن ربنا يكرمك عشان ما كنتش هقدر أستحمل أشوفك مكسورة بعد كل التعب ده، أنا يا بنتي ممكن أستحمل أي حاجة إلا إن إنتي تتكسري إنتي مش عارفة إنتي عندي إيه، اللهم لك الحمد كما ينبغي لجلال وجهك وعظيم نعمتك، هي كمان عيطت أول مرة أبوها يعبرلها عن حبه كده، الليلة عدت والبيت كله أفراح لحد ما جه يوم الرغبات سلمى بتلمي الرغبات وبتلقائية هتخط أول حاجة كلية الطب وكانت المفاجأة..

الأم: طب إيه يا بنتي، إحنا عايزينك دكتورة أه بس إحنا كمان عايزينك تتجوزي وتكوني أم، الطبيبات ما بيتجوزوش وإن إتجوزوا ما بينجحوش في شغلهم، أنا عايزاكي تخشي صيدلة خمس سنين سريع سريع، ونفرح بيكي وأهو يبقى اسمك دكتورة برده.

سلمى: ماما إنتي بتقولي إيه؟! أنا طول عمري بحلم أكون طبيبة بشرية، يا ماما الطب ده أسمى مهنة في الدنيا (وتتظر إلى أبيها كي يساندها في الكلام ولكنه لا يفعل) بابا ما تتكلم..

الأب: بصي يا سلمى، بغض النظر إن كلام أمك نسبياً صح، بس فيه حاجة تانية، إنتي طول عمرك شاطرة في الكيميا والفيزيا أكثر بكثير من الأحياء، إنتي طول عمرك بتتبعي في مذاكرتها وما بتحبهاش، يعني لو دخلتي صيدلة فرصتك في التفوق أكثر.

نظرت إليه باهتمام بالغ وطلبت مهلة للتفكير وبعد المهلة وصلاة الاستخارة وجدت نفسها تميل لرأيهم أكثر، وكتبت صيدلة ووصل جواب مكتب التنسيق، وفرحوا وتاني يوم مامتها صحتها من النوم: يلا يا سلمى، يلا عشان ننزل نجيب لبس الجامعة يا حبيبة ماما، أنا كلمت سها بنت خالتك تيجي معنا.

سلمى: ماما أنا مبحبش سها، جبتها معنا ليه؟

الأم: سها أنسب واحدة، سها اتخطبت في سنة أولى يعني عارفة هي هتقي إيه وتظبطك إزاي.

تحدث نفسها في السر: هي ماما اتجننت ولا إيه؟! بس قامت ولبست ووصلت سها البيت وسلمى باركتها على الخطوبة.

سها: عقبالك

سلمى: لسه بدري

سها: ليه يا بنتي؟ هي لسة بدري دي اللي بتجيب النحاس، اللي يقولك كده على طول تقويله آمين يا رب، وبعدين إنتي

داخلة الجامعة، ولازم تعريف اللي بتخرج من الجامعة من غير عريس فرصتها بتقل أوي.

سلمى: دي دراسة اتعملت ولا اجتهاد شخصي منك؟!

تنظر لها أمها نظرة لوم: سلمى اسمعي كلام بنت خالتك، دي تابعة نفسها وجاية عايزة مصلحتك.

ونزلوا يجيبوا اللبس وفي محل اللبس سلمى بدأت تختار الحاجات اللي متعودة عليها، ولكن بعد أن فشلت في إقناع أمها قررت أن تتحى جانباً، وتترك لسها الساحة كي تلبسها كما ينبغي وبدأت سها بمقدمة.

سها: بصي يا سوسو يا حبيبتى إنتي لازم تختاري ألوان وأشكال تخطفي بيها العين، يعني اللي يشوفك لازم تلفتي نظره سواء اللبس عجبه أو ما عجبوش يعني مثلاً



الحلقة الثانية

(لا بأس بقليل من التغيير)

سها: يعني مثلاً فيه شوية أسئلة قبل ما نبدأ نشترى اللبس
عشان نشوف الخط اللي هنمشي فيه.

سلمى: اتفضلي اسألني

سها: إنتي ناوية تخلي التحجبية ولا هتشيلها؟

سلمى: نهالار إسود! هو ده بقى أوبشن؟ ده الواحد فايته
حاجات كتير

سها: أومال إيه. ده اللي بيقلعوه دلوقتي أكثر من اللي
بيلبسوه، أصله بصراحة بيفرق في المنظر أوي، بس ولا يهملك أنا
هديك المفيد في الإستايل اللي إنتي عايزاه حتى لو عايزة تتقبي
سلمى: حتى لو هتتقب طب إزاي يا فالحة؟

سها: مش كل نقاب ياختي بيبقى بجد، في نقاب بيخبي اللي
جواه وفي نقاب يشوق اللي أدامه على اللي جواه، ديتك نقاب
أسود بيلمع مع كحل أزرق بيلمع ورموش صناعية وعدسات ملونة
واتفرجي على العرسان.

سلمى: خلاص يا سها، ابلعي ريقك إنتي بتدمري كل حاجة حلوة في عيني، بعدين أنا مش عايزة أتتقب ولوربنا هداني للنقاب أكيد مش هيبقى كده، أنا عايزة ستايل البننت المحجبة العادية.

سها: طب خلاص إديني ربع ساعة وجيالك. جلست سلمى وقد قررت أن تترك لسها المهمة كاملة، فيبدو أن حلم أوبوها الجديد أن تسرع في التقاط عريس، بغض النظر عن رغبتها الشخصية، وكالعادة فهي أيضاً تريد أن تحقق أهدافهم حتى لا تخيب آمالهم فيها،

وها هي قد عادت سها.

سها: إيه رأيك في البلوزة دي و(تقلبها لها حتى تريها الوش والظهر).

سلمى: إيه ده يا سها؟! هي حلوة من أدام بس ضررها مكشوف.

سها: ما أنا عارفة هتلبسي تحتها بدي قريب أوي للون الجسم، هيدي منظر شيك وفي نفس الوقت هيلفت النظر ليكي وما حدش هيقدر يفتح بؤه، إنتي ملتزمة بالحجاب ومغطية جسمك.

تنظر سلمى إلى أمها تريدها أن تعترض، ولكنها لا تفعل
ففهمت سلمى إنها موافقة، فنظرت إلى سها وقالت لها: كلمي،
نشوف موضوع البلوزة ده بعدين.

سها: بصي بقى ده دريل أحمر في إسود؛ قماشته بتلمع لمعة
بسيطة شيك وواسع وهتلبسي فوقيه كارديجن حمره.

سلمى: هروح الجامعة بلبس أحمر في عز الضهر، وتنظر إلى
أمها: إيه يا ماما ما تتكلمي.

الأم: بصي يا سلمى سها ما اختارتلكيش أي حاجة ضيقة أو
عريانة، خشي يا ماما قيسي اللبس اللي سها اختارته من غير
ما تكلمي فرجة عليه، واللي بييجي على قدك خديه، سها عارفة
هي بتعمل إيه.

دخلت سلمى تقيس اللبس وتفكر هو إيه اللي بيحصل، مش
دي سها اللي ماما طول عمرها بتبعدي عنها، وبتقول عليها مش
بتاعت مذاكرة وممكن تضيعني لو مشيت معاها؟! وقاست سلمى
اللبس واللي جه على قدها خدته ومشيت ومرت الأيام، وجاءت
ليلة أول يوم في الجامعة، وها هي العيلة مجتمعة سهرانين بقى
آخر ليلة قبل المذاكرة؛ ولب وسوداني وعمتها جت تقعد معاها
وسلمى بتقدم لها حاجة ساقعة

عمتها: تسلّم إيدك. عقبال شربات فرحك

سلمى: جديدة الدعوة دي يا عمتمو أومال فين عقبال نهار
نجاحك؟! عمتها: لأ نجاحك وفرحك مع بعض، بصي يا سوسو
إنتي داخلة الجامعة، يعني شخصيتك لازم تتغير هيقالك زمايل
بنات وشباب تتعاملي معاهم كلهم زي بعض باحترام وأدب وثقة
بالنفس، لازم تفتحي دايرة تعارف واسعة وما تقفليش على نفسك
أوي يا حبيبتي. سلمى: عمتمو الكلام ده مش صح، بابا طول عمره
بيقولي لو كان حواليك بنات كثير ما تلجأيش للصبيان إلا في
الشديد القوي وتظنر لأبيها: صح يا بابا؟

الأب: أنا نازل أجيب حاجات من تحت عشان السندوتشات
لإخواتك بكره، حد عايز حاجة من تحت؟

تعجبت سلمى في صمت، يبدو أن الجميع موافق على أن
تبدأ في تغيير شخصيتها بعد أن ربوها طوال الفترة الماضية على
أن تكون فتاة ليس لها اتصال بالجنس الآخر، فهي حتى غير
قادرة على فتح حديث مع شاب، هي خجولة لأبعد مدى، لما
يفعلون بها ذلك؟! أمن الممكن أن يصبحوا مهوسين بفكرة الزواج
إلى تلك الدرجة؟



الحلقة الثالثة

(صاحباتك اتخطبوا وانتي لأ)

انه اليوم الأول لها في الجامعة تزينت و ارتدت كل ما اختارته لها أمها كزي مناسب لليوم الأول و دخلت الي الكلية المكان يبدو كبير المدرجات تبدو شاهقة جلست و استمعت الي أولي المحاضرات الدكاترة يعاملوهم بشكل جميل فهم لا يخاطبوا الطلبة الا بلقب يا دكتور أو يا دكتورة المواد تبدو مثيرة بالنسبة لها هي سعيدة ومررت الأيام واحساسها انها تستطيع أن تتفوق في هذه الكلية يزيد يوما بعد يوم و بعد نهاية كل يوم عندما تعود الي المنزل تسألها أمها

- يومك كان عامل ازاي؟

- زمايلك مين؟

- والطلبة عندكم شكلهم ايه؟

- معاهم عربيات ؟

- طيب ما تخبيش علي ماما مفيش حاجة كده و لا كده ؟

هي تعلم ان كل هذة الأسئلة غرضها واحد بس وهو الاستفسار هل يوجد من يلفت نظرها أو تلفت نظره هذه الأسئلة تزعجها بشدة هي غير قادرة علي جذب نظر أحدهم هي بنت عادية جدا ولكنها قررت ان تركز أكثر في دراستها وبالفعل طلعت نتيجة أول سنة وهي الأولى علي الدفعة و هنا استغلت الموقف وفاتحت أمها في الموضوع

- ماما ايه رأيك لو بنتك بقت دكتورة في الجامعة ؟

- يا ريت يا حبيبتي ده شيء أكثر من اللي أتمناه

- خلاص ساعديني

- هو انا اتأخرت عنك في حاجة؟

بطلي تضغطي عليه في السؤال عن العريس المنتظر كل شيء نصيب و لو في حد من بنات قرايينا اتخطب هما طبيعة دراستهم و شخصياتهم مختلفة و احنا ما عندناش حد في صيدلة بيتخطب بدري كده

اقتنعت الأم نسبيا بهذا الكلام ومرت الأيام حتي حدث ما لم يكن في الحسبان انها آخر ليلة في أجازة نصف السنة القبل الأخيرة، موبايها رن انها احدي صديقاتها تعزمها علي خطوبتها

باركتلها وانتهت المكالمة وبتفكر هتلبس ايه و هي رايحة ،لقت امها
علي دماغها علي طول

- ايه ده هي صاحبك اتخطبت ؟

- اه يا ماما

- أول واحدة تتخطب في أصحابك شدي حيلك بأة لحسن أنا
بجد قلقانة إنتي ما جالكيش حد خالص يا بنتي دي علامة مش
كويسة ربنا يا بنتي يفتحها في وشك .

شعرت سلمى بالقلق فعلا انا ما جالكيش حد خالص ودي
مش أول واحدة تتخطب في ناس كثير اتخطبوا ،نامت و صحيت
راحت الكلية كان عندها سيكشن الصبح، السيكشن ده كان مختلف
جدا دخلهم دكتور كريم أشهر معيد في الكلية هو وسيم طويل
شيك دمه خفيف علي طول ماسك الميدالية اللي فيها مفاتيح
العربية الغالية يبدو وكأنه ميسور ما ان يبدأ في القاء الدعابات
حتي تبدأ الفتيات في التمايل من كثرة الضحك هي تشعر بشعور
غريب هو يلفت نظرها بشكل عجيب تشعر بشعور مختلف تجاهه،
شعور تشعره لأول مرة هل هو كلام أمها ليلة البارحة أم إنها فعلا
تشعر بالأعجاب تجاه أحدهم لأول مرة ولكن هي قررت أن تحاول
مع انها تعلم ان المحاولة صعبة فهو لا يقف بمفرده أبدا فهو

دائماً محاط بنجمات كل الدفعات و لكن عليها أن تكسب شرف
المحاولة.



الحلقة الرابعة (أنا Invisible)

وكعادة أي شخصية عملية وعلمية قررت سلمى اللجوء إلى صاحبة تجربة عملية في هذا المجال، وهي ساندي زميلتها في السيكشن وكانت سلمى قد ساعدتها من قبل في كثير من التجارب العملية في العمل، ويوجد بينهما ود ولذلك استغلت سلمى وقوفها بمفردها:

- ساندي عاملة إيه؟
- الحمد لله وإنتي؟
- كويسة بس عايزة أسألك سؤال غريب شوية، إنتي اتخطبتي لدكتور مراد إزاي؟
- إنه الحب يا صديقتي
- ساندي إنتي قبليها بأسبوع كنتي عمالة تتكلمي مع واحد تاني في التليفون، ولما دكتور مراد خطبك سمعتك وإنتي بتقولي له أنا مش قادرة أعتبرك أكثر من أخ!
- وطى صوتك الله يخربيتك، أنا بتكلم جنبك عشان فاكراكي مش بتاخدي بالك من حاجة وفي حالك، طب

بصي أنا هقولك الطريقة بس ما تجيبيش سيرة الموضوع
ده تاني.

- أنا أصلاً ما كنتش هجيب سيرة لحد بس عشان خاطري
قولي

- يا حرام هو عاجبك أوي كده، طب خلاص أول حاجة تشد
الرجل ليكي إنك تضحكي على نكتة حتى لو كانت بايخة؛
يعني أي هزار يهزره في السيكشن تضحكي عليه حتى لو
مش بيضحك.

- إيه الهبل ده؟!

- لو قاطعتيني تاني مش هكمل، تاني حاجة اسرحي فيه
ولما تيجي عينه في عينيكي اتكسفي أوي وبصي في الأرض
والاهتمام يا سلمى تعاليله في يوم كده كان شكله تعبان في
السيكشن، وبعد ما يخلص إلحقية وهو خارج قوليله إنت
كويس يا دكتور؟ شكلك كان تعبان النهاردة فيه حاجة؟ هو
كمان ما هيصدق هيقولك مثلاً مش نايم كويس أو كان
عندي شوية صداع، تروحي إنتي رده عليه سلامتك،
بس ما شاء الله عليك يا دكتور، قد إيه بتيجي على
نفسك عشان غيرك مع إنك كنت تعبان بس شرحك
كان حلوهما كده يحبوا اللي ينفخ فيهم وآخر حاجة

إتلككي مرة حاجة مش فاهماها، تروحيله أوضة المعيدين
يشرحها لك، مرة نسيتي تصححي كتابك في السيكشن
تروحيله يصححوه لك وكده يعني، أنا همشي بأه لحسن
مراد بيرنلي وربنا معاكي.

وقفت سلمى لحظات تفكر، هي بالفعل غير قادرة على فعل
أي من هذا ولكن على الأقل سوف تختار جزيئات صعبة في المادة
وتصطنع عدم فهمها لكي يشرحها لها. وفي اليوم التالي ذهبت
له كي يشرح لها وكالعادة هو دائماً محاط بالأخوات فيستأذنهم
ويشرح لها سريعاً ثم يعود إلى الحوار معهم واستمر الحال على
كده يومياً، وفي كل مرة ينهي المهمة بشكل أسرع ولم يسألها حتى
عن إسمها. إلى أن جاء يوم كان مندمجاً في الحوار جداً مع
إحداهن وتملاً ضحكاتها المكان، وكانا يقفان على باب غرفة
المعيدين فرأى الدكتور سلمى مقبلة عليهم كالعادة، وقبل أن تفتح
الكتاب لتسأله قال لها:

- دكتورة أنا مش فاضي دلوقتي، على فكرة في معيدين غيري
في نفس المادة ممكن يفيدوكي برده.

لم تجد أمامها إلا أن تبتمس ابتسامة تخفي خلفها كثيراً من
الإحراج والحزن وانصرفت، ولكنها سمعت صوت من كانت معه
وهي تقول:

- حرام أخرجتها أوي

مشت بخطوات أسرع حرفياً، تمننت أن تنشق الأرض وتبلعها حضرت السيكشن ولم تفهم أي شيء لأول مرة في حياتها، خرجت لتجلس في الكافيتريا تسترجع الموقف بحزن حتى أوشكت الكافيتريا على غلق أبوابها، لن يبقى في الكلية إلا قليل من الطلبة فاضطرت إلى الانصراف وبينما هي تسير إلى بوابة الخروج، فإذا بصوت يندبه سلمى، التفتت وراءها لتجد شخصاً تعرفه ولكنها أخذت بعض الثواني لتستجمع نفسها ثم قالت: دكتور مصطفى... في حاجة؟ (دكتور مصطفى معيد في نفس مادة د. كريم)

- لأ مفيش أنا بس شفت اللي حصل مع د. كريم، وعايز أفهم إنتي بتعملي كده ليه؟! إنتي تعتبري من الحالات النادرة اللي احتل فيها شخص واحد ترتيب الأول على دفعته طول فترة دراستك اللي فاتت، ما أعتقدش أبداً إنك محتاجة تسألني يومياً بالشكل ده.

- دكتور هو حضرتك عارفني بتشوفني أصلاً؟

- مش فاهم السؤال

- أنا بحس إنني invisible غير مرئية

- إنتي اللي مختارة تكوني كده، إنتي عمرك ما سألتني وأنا بشرح على حاجة، عمرك ما اتناقشتني في حاجة، أنا

بركز معاكي غضبن عني؛ لأن مستوى ذكائك وإجاباتك في امتحانات العملي بيثير اهتمامي.

- أنا بصراحة بتكسف أسأل
- وخذتي قرار تسألني دكتور كريم كثير عشان تلفتي نظره ليكي
- إنت عرفت إزاي؟!؟
- أصلها قديمة أوي يا سلمى لا تملك نفسها من الابتسامة. فيبتسم هو الآخر ويكمل حديثه:
- سلمى إنتي عشان تلفتي نظر أي حد مش محتاجة أكثر من إنك تبقى على طبيعتك، تخرجي من جوه نفسك، إنتي حتى لبسك مش لايق على شخصيتك.
- إنت عرفت منين، ماما اللي منقياها كله
- سلمى اعلمي اللي إنتي عايزاه والبسي اللي تحسي إنك مرتاحة وشكلك حلو فيه، وقولي اللي إنتي عايزاه ولما تحتاجي تسألني عن حاجة قاطعي الدكتور وهو بيشرح، سلمى كوني نفسك، عبّري عن نفسك، طول ما إنتي ساجناها جواكي هتفضلي طول عمرك غير مرئية.

هي تسمع بانبهار، عمر ما حد كلمها بالشكل ده، لا تجد رداً، فيكمل هو كلامه: وتعاليلي بكرة أوضة المعيدين أشرحك سيكشن النهاردة؛ لأنك أكيد ما فهمتيش حاجة النهاردة. أومأت برأسها بالموافقة ثم أذن لها بالانصراف، ومشيت وهي تطير من السعادة، لقد رأني أحدهم، ما الذي أشعر به الآن؟ هل يحبني؟ هل أحبه؟ يا إلهي أشعر بفرحة غير طبيعية، ليقاطعها صوته بعد ما كانت بعدت عنه بضع خطوات:

- سلمى

- نعم يا دكتور؟

- إنتي ما بتحبينيش، إنتي بس هتحسي كده عشان أنا ممكن أكون أول واحد تتكلمي معاه في حياتك، وأنا عملت كده معاكي عشان إنتي عقلية حرام تهدر طاقتها في محاولات فاشلة زي اللي كنتي بتعملها، مع السلامة.

مشت بضع خطوات ثم التفتت له ونادته:

- دكتور مصطفى

- نعم

- شكراً إنك قولتلي كده. أنا كنت بدأت أسرح



الحلقة الخامسة (حان وقت الظهور)

انطلقت إلى منزلها، وهي سعيدة تحمد الله أن بدد حزنها وأرسل لها من يساندها في ذلك الموقف السخيف الذي وضعت نفسها فيه وجلست قليلاً مع أهلها ثم ذهبت للنوم، فقد كان يوماً مليئاً بالأحداث وحينما ذهبت إلى النوم ظلت تفكر..

كلام دكتور مصطفى كله صح، أنا ليه بتكسف أوي كده؟ ليه صوتي بيروح لما باجي أتكلم مع حد؟ أنا ساعات ببقى عايزة أسأل الدكاترة على حاجة، وهما بيشرحوا ومن كتر الكسوف ما بقدرش، حتى لما يكون في ناس بيهزروا أودامي بيبقى عندي هزار وكلام يضحك بس بخاف أقوله ما يضحكش، أنا عارفة إن مش سهل إنني أغير شخصيتي، بس ده اللي لازم يحصل.

وفي اليوم التالي ارتدت ملابسها بشكل مختلف، اهتمت بكل تفاصيل شكلها، لم تنزل إلا حين تأكدت أنها راضية تماماً عن شكلها ولم تذهب إلى أمها كالعاده لتسألها:

- حلو كده يا ماما؟ بل أمها من بادرتها بالإجابة:
- شكلك حلو أوي النهاردة يا حبيبتي، أول مرة ألاقيني مظبطة الدنيا كده، هو فيه حاجة كده ولا كده ولا إيه؟

- عايزة شكلي يبقى مختلف.

- أيوة ليه بأه؟ ماهو أكيد حصلت حاجة بسطتك ما
تفرحي ماما معاكي؟

- والله العظيم يا ماما أول ما يبقى في حاجة من اللي في
دماغك إنتي أول واحدة هتتعرف، هنزل بأه عشان ما
أتأخرش.

وصلت إلى الكلية، أول محاضرة الساعة ١١ ولكنها وصلت
الساعة ٩ ذهبت إلى غرفة المعيدين للدكتور مصطفى كي يشرح
لها سيكشن البارحة، كان جالساً على مكتبه يطالع بعض الأوراق
وعلى المكتب المقابل يجلس الدكتور كريم، تعمدت أن تلقي التحية
على د. مصطفى بثقة، وهو أيضاً استقبلها بثقة وتعهد أن يعلي
من صوته ولا يعاملها كطالبة عادية.

- أهلاً يا دكتورة سلمى، أنا مش مصدق إن سلمى الأولى
على الكلية عندها كم المشاكل دي مع المادة دي الترم ده!

انتبه كريم إلى الحوار، لم تكن سلمى تفهم لماذا يقول مصطفى
هذا الكلام، ولكنها فهمت عندما وجدته يعرف بها كريم:

- سلمى يا كريم الأولى على الدفعة التلات سنين اللي

فاتوا، عمر ما في حاجة وقفت معاها، بس الترم ده المادة دي
دايمًا فيها نقط مش فاهماها .

نظر إليها كريم بإحراج، فهو يعلم ما فعله معها البارحة،
ولكنه ألقى عليها التحية:

- أهلاً بيكي يا دكتورة

نظرت إليه سلمى نظرة سخيفة وردت السلام:

- أهلاً بيك يا دكتور

ونظر لها مصطفى مبتسماً:

- أيوة طبعاً إنتي لازم تتعري في على المعيدين والمعيدات كلهم،
كلها سنة ولا حاجة بسيطة وتبقي زميلتنا، وممكن تبقي معانا في
نفس الأوضة.

ابتسمت سلمى ابتسامة عريضة وقالتله:

- إن شاء الله، ربنا يخليك يا د. مصطفى ثم جلست إلى
المكتب وبدأ في شرح السيكتشن لها باهتمام بالغ مش بس كده، هو
ما سابهاش غير لما إتأكد إنها فهمت وخلهاها تحل مسألة كتطبيق
على السيكتشن لوحدها عشان يتأكد إنها فهمت وبعد ما خلص
سألها: في حاجة تانية مش فاهماها؟

- لأشكراً يا دكتور. كده تمام

-طيب بصي يا سلمى خلي رقم تليفوني معاكي لو إحتاجتي حاجة أو في حاجة بسيطة أشرحها لك في التليفون، كلميني عشان ما تضعيش وقتك في إنك تيجي، الدماغ اللي زي دماغك دي لازم كلنا نساعدنا عشان تعرف تتفوق أكثر.

الموقف لفت نظر كريم أوي، بس عمل نفسه مركز في حاجة تانية

شكرته سلمى وخذت رقم التليفون ومشيت في ثقة وسعادة وبعد ما مشيت حبة صغيرين لقت حد جاي وراها وبيندها:

- دكتورة سلمى

التفتت لتجد كريم، هي متغاضة منه جداً، الود ودها تديله ميت قلم على وشه، ولكنها ردت بهدوء سخيف بابتسامه مصطنعة صفراء:

- نعم يا دكتور في حاجة؟

- أنا بس كنت عايز أعتذرلك عن موقف إمبراح، ما كنتش أعرف يعني إن إنتي جامدة أوي والأولى والحاجات دي.

هي تفكر سريعاً، يوجد رد في عقلها يريد أن يخرج ولكن الرد اللي أسهل على لسانها: حصل خير يادكتور، ماحصلش حاجة.

الردان يتصارعان للخروج، ولكن يأتي صوت مصطفى يتردد في خلفية عقلها بأن تعبر عن حقيقة ما بداخلها بلا خوف، لترد على كريم وتقول:

- وحتى لو ما تعرفش إن أنا الأولى أو أي حاجة، فدور حضرتك الأساسي كمعيد إنك قاعد في مكتبك عشان تساعد الطلبة وتشرح لهم الحاجات اللي هما مش فاهمينها، ده غير إنك قبل ما تخرج من السيكشن لازم تتأكد إن كل الطلبة فهموا وابتسمت ابتسامة سخيفة، وقالتله: بعد إذنك مستعجلة عشان عندي محاضرة.

رد عليها وهو في حالة ذهول: اتفضلي

ووقف غير مصدق للموقف اللي حصل يفكر، أنا كريم نجم المعيدين أعتذر لواحدة و تروقني الترويقة دي، طب أعمل إيه أنا دلوقتي؟!، هي فاكرة الحوار خلص على كده، وظل في حالة ذهول لبعض الوقت.

بينما انطلقت سلمى إلى قاعة المحاضرات في سعادة غامرة، فحينما تنتقم الأنثى من رجل تسبب لها في أذى نفسي تشعر بسعادة ولذة ونشوى لا تعرفها إلا من ذاقتها.

obeikandi.com

الحلقة السادسة (كيف تتعاملين مع الناس اللزجة)

أنهت المحاضرات وذهبت إلى المنزل في عجلة، فاليوم خطبة هبة بنت خالها وهي إحدى صديقاتها المقربات وعليها أن تستغل اليوم جيداً، فهي لا تريد أن يضيع اليوم هباءً بلا مذاكرة وبالفعل عادت إلى منزلها وأكلت سريعاً، وبدأت مذاكرة لمدة ساعتين ثم ارتدت ثيابها التي إختارتها لنفسها، وكان المظهر النهائي يتمتع بالبرقي والرقّة واستقلوا السيارة جميعاً؛ هي وأمها وأبوها وأخوها الصغير مودي ووصلوا، هنأت العروس من قلبها وكانت سعيدة لها جداً، وكانت الجلسة قد انقسمت إلى جمع رجالي وجمع نسائي فذهبت هي وأمها و مودي ليجلسوا في جمع النساء وسلمت سلمى عليهم جميعاً، وجلست بجانب مي أخت العروسة تبادلها الحوار، ولكن إذا بسها بنت خالتها وهي الآن لم تعد مخطوبة كبداية الحلقات، ولكنها مدام ومعها طفلان توجه لسلمى الكلام:

- إيه يا سلمى اللبس الحلو ده، شكلك حلو

- شكراً يا سها

- العفو يا ستي، بس الشياكة دي كلها والصرف اللي خالتي

بتصرفه في اللبس ده والحلاوة دي، ومفيش دبله لحد دلوقتى،
ما تشدي حيلك شوية يا سها، ولا إيه يا خالتي؟ ونظرت إلى أم
سلمى.

نظرت سلمى إلى أمها بانتباه تريدها أن تعزز من موقفها
بأي كلمة، ولكن فكرت أمها للحظات، لوردت على سها رد سخيف
هيقولوا دي غيرانه عشان بنتها، لازم أخذ الموضوع بهزار وراحت
ضاحكة وقائلة:

- ادعيها يا سها

في هذه اللحظة بينما تنظر سها لسلمى نظرة بابتسامة
صفراء كمن يستمتع بتعذيب ضحيته، تردد صوت مصطفى في
خلفية عقل سلمى؛ عبري عن نفسك بلا خوف، وجدت نفسها
تنظر إليها بابتسامة قوية وتقول:

- إنتي مزعلة نفسك عشاني أوي كده ليه يا سها؟! أنا
عارفة إن إنتي بالنسبالك كواحدة أعظم إنجاز عملته في حياتها
إنها إخطبت بدري وإتجوزت وخلفت، ومع إن ده نصيب ومش
شطارة منك بس، لكن برده لأن إنتي ما أنجزتيش أي حاجة تانية
فأنتي مش قادرة تفهمي إن ربنا ممكن يأخر لغيرك الجواز عشان
عايزه ينجز حاجات تانية مهمة.

سها: إنتي هتتططي عليا يا سلمى عشان إنتي دكتورة!؟

- أنا عمري ما أتتطط عليكى، إنتي اللي على طول عندك إحساس بالنقص بتطلعيه في إن إنتي تحسسي غيرك إن عنده مشكلة مع إن إنتي مش مدركة إن غيرك ده ممكن يبقى سعيد في حياته جداً، ما بيتعكنش غير لما بيقابلك إنتي واللي زيك، الجواز مهم يا سها بس مش كل حاجة، البني آدم اللي عايز يساعد حد وخايف عليه فعلاً دايماً يحاول يحسس اللي أدامه إنه هو كويس، ومش ناقصه حاجة وينقله طاقة إيجابية، مش كل لما يشوفه يسأله عن الحاجة الوحيدة اللي ناقصاه.

- أنا كنت بهزر يا سلمى وغرضي يعني أطمئن عليكى، ماكانش له لازمة الكلام ده كله.

تبسم سلمى ببرود وترد:

- وأنا كمان كنت بهزر وبطمنك عليا، ومن هنا ورايح كل ما تحبي تطمني عليا هطمنك أوي.

لحظة هدوء في الغرفة، فجأة سكت الجميع وظلوا يستمعوا إلي الحوار بانتباه شديد، لم تكن سلمى تعي ذلك إلا بعد أن انتهت من كلامها، ولم تجد رداً من سها، سها مكسوفة وساكتة.

فكان على سلمى أن تقطع حالة الصمت، فهي لم تتعود أبداً
أن تكون هي مركز الجلسة الذي يستمع إليه الجميع، فنظرت إلى
مي بنت خالها وقالت:

- مي أنا جعانة

مي: نعم!

سلمى: أه والله جعانة، مش دي خطوبة إعمليلي طبق من
البوفيه،

وابتسم الجميع وعادوا إلى حواراتهم وحينما انتهت الخطوبة
ركبوا السيارة في طريق العودة، ما إن ركبوا السيارة حتى فوجئت
بمودي أخوها يطبع قبلة على جبينها قائلاً:

-أنا فرحان منك أوي يا سلمى إنك عملتي كده في سها

- أه ما أنا عارفة إنك مش بتحبها، وهنا تدخلت الأم لتسأل:
هو إنت كنت فاهم الكلام اللي بيتقال؟!

رد عليها: لأ يا ماما، أنا مش فاهم غير أن سها كل ما تشوف
سلمى تزعلها، لكن المرة دي سلمى اللي زعلتها.

- طيب يا أخويا، شاطر إنت وأختك، وحكت الحوار كله
للأب عشان يوبخ سلمى، فسألها أبوها: إنتي قولتي كده بجد يا
سلمى؟

- أيوه يا بابا

فسكت قليلاً وقال:

- شاطرة يا بت، دي عيلة مجانيين، أومال لو إتأخرتي بجد في الجواز، ده إنتي لسه في الجامعة هيعملوا فيكي إيه؟

فنظرت له الأم شزرأوقالت:

- إحنا عيلة مجانيين؟! مقبولة منك يا عبده

فاستكمل الأب كلامه:

- على فكرة يا سلمى أمك مش زعلانة، بجد لو زعلانة كانت قلبتها مناحة من ساعة ما ركبت العربية كده ولا إيه؟

فردت الأم:

- الصراحة مش أوي يعني، أنا فرحانة يا سلمى أن إنتي رديتي على حد ضايقتك وما خدتيش على قلبك وسكتي، يلا إياكش تولع في نفسها.

كان رد الأم مفاجئاً جداً لهم جميعاً، حتى أن صوت ضحكاتهم ملاً العربية، وظلوا يمزحون حتى وصلوا إلى المنزل.

طلبت الأم من سلمى أن تذهب لتلحق بسويغات من النوم، فهي لم ترتاح اليوم ولكن سلمى كانت ممتلئة بالطاقة الإيجابية

وقررت أن تذاكر ساعتين وتنام ساعتين، وبالفعل عملت كده،
تاني يوم كان عندها ثلاثة سكاشن؛ تاني سيكشن كان مادة دكتور
كريم ومصطفى، دخل شرح السيكشن كريم وبعدين كان في ساعة
راحة، سلمى صلت الظهر وأصحابها كانوا عايزين يكملوا القعدة
في المصلى لحد السيكشن ما يبدأ، لكن هي قالت هتنزل تجيب
نسكافيه من الكافيتريا عشان تفوق؛ لأنها تعبانة من سهر إمبراح.
بعد ما اشترت النسكافيه وجات تطلع لصاحباتها لقت كريم
في وشها

بيقولها:

- فيه حاجة في السيكشن مش فاهماها؟

قالت له: نعم!

قالها: أنا دوري كمعيد إني أتأكد إن كل الناس اللي في السيكشن
فهتمت قبل ما تخرج، بس إنتي خرجتي بسرعة.

لم تستطع أن تملك نفسها من الضحك وهي بتقوله:

- فعلاً؟!



الحلقة السابعة

(مش كل ما واحد يقولي سلام عليكم هجبه)

- لم تستطع أن تملك نفسها من الضحك وهي بتقوله: فعلاً؟! -
- أه فعلاً من ساعة ما قولتيلي دوري كمعيد أعمل إيه، وأنا ملتزم بيه حرفياً
- طب شيء جميل ومن غير حاجة حضرتك شرحك جميل وبتوصل المعلومة كويس.
- يعني خلاص مش زعلانة؟
- لأ خلاص
- أصل أنا ما بحبش أزعل حد مني خالص، وخصوصاً لو كان حد في ذكائك ورقتك، وبيتكسف يسأل أودام زمايله في المعمل.
- هي لا تجد رداً مناسباً، تشعر بشعور غريب هي تفكر ماذا يجب أن تقول؟ أكيد الرد المناسب مش ربنا يخليك، ولا ينفع تخليه يكمل في السكة دي، أصبح وجهها وردياً تائهاً ليشعر هو بها ويساعدها:

- إنتي عارفة إنتي عايضة تقولي إيه دلوقتي؟

- إيه؟

- متشكرة أوي يا دكتور، معلش بعد إذنك لازم أطلع عشان
عندي سيكشن دلوقتي

- أه

- طب إتفضلي عشان تلحقي سيكشن دلوقتي

انصرفت هي وتكاد تطير من الفرحة؛ إيه ده هو قال أنا رقيقة
قال؟ أه قال والمصحف قال.

وبعدين بأه في الواقعة دي، أنا لو دخلت السيكشن كده مش
هفهم حاجة، طيب انا هتمشى شوية وأحاول أفكر في حاجة
تانية وبعدين هطلع، بينما هي تسير هائمة في الكلية لقت إعلان
جديد متعلق على لوحة الإعلانات بتاعة شئون الطلبة، ركزت فيه
لقيته منحة لطلاب السنة قبل الأخيرة للمتفوقين لدراسة بعض
الكورسات المتطورة في الصيدلة الإكلينيكية برة مصر لمدة ثلاثة
شهور في ألمانيا، الموضوع لفت نظرها وكان غريب بالنسبائها، قررت
تسأل فيه بعدين الإعلان ده طلعتها من المود جزئياً، وقررت تطلع
السيكشن وحاولت على قد ما تقدر تركز وتفهم وروحت البيت.

في البيت فعلاً ما عرفتش تذاكر خالص، كل ما تيجي تبص في كتاب تفتكر كريم؛ كان شكله حلو أوي كان يبدو كالحلم، دمه خفيف أوي ثم تحاول أن تركز فتفشل، هي محتاجة تتكلم مع حد بس لو طلعت إتكلت مع مامتها، مش بعيد ترقع زغزوة وهتفضل تسألها كل يوم: عملتي إيه مع كريم، ولو حكيت لواحدة صاحبها برده هتكبر الموضوع وممكن تركز أوي، وتفضل تقولها ده بصلك النهاردة كتير، ده ضحكلك وإنتي مش واخدة بالك وتكبر الموضوع في كل حاجة، وهي مش عايزة كده، حاولت تفكر في موضوع منحة السفر وتخش تدور على النت، مالقيتش معلومات كافية فكرت تسأل مين وفجأة افتكرت إن دكتور مصطفى إدالها رقمه، فقررت تكلمه تسأله على موضوع السفر ده:

- ألو سلام عليكم

- وعليكم السلام مين؟

- أنا سلمى يا دكتور اللي جيت لحضرتك وشرحتلي ال.....

لسه ما كملتش كلامها قالها:

- أيوة يا سلمى فاكرك إزيك عاملة إيه؟

- الحمد لله، أنا آسفة إنني بأزعجك بس كنت عايزة أسألك
عن المنحة بتاعة ألمانيا اللي أعلنوا عنها، هي دي إيه
بالظبط وإزاي هنسافر في معاد الترم الأول السنة الجاية؟

- بصي يا سلمي، المنحة دي بتروحي تدرسي كورسات
متقدمة مش موجودة عندنا في الكلية، بس لازم تعدي
امتحانات صعبة في المواد اللي بتخص الكورسات دي،
ولو نجحتي الكلية بتسمحلك إن إنتي تمتحني مواد الترم
الأول ده السنة اللي بعديها، وتمتحنني الترم الثاني عادي؛
لأنك هترجعني قبل الترم الثاني يعني هتتخرجي الترم
الأول مع الدفعة الجاية.

- طب وإيه رأيك في الموضوع ده؟

- بصي هي بتبقى فرصة حلوة تسافري وتتفسي وتتشوي
حاجات جديدة وتقابلي ناس مختلفة، وهتدرسي حاجات
متطورة أكثر بس في حالتك إنتي ما أعتقدش تبقى حلوة
يعني.

- عشان أنا بنت والسفر وكده

- لأ مش عشان إنتي بنت والسفر وكده بس، عشان إنتي
إن شاء الله هتبقى معيدة وهتجيلك فرص للسفر بعثات

دراسات عليا أحسن والأفضل إنك تتخرجي مع دفعتك،
وتركزي تحافظي على تفوقك أحسن.

- أقول لحضرتك حاجة أنا نفسي أقدم وأشوف هتقبل ولا
لأ، وممكن حتى ما أسافرش بس عايضة أقيم نفسي.

- بصي بلاش يا سلمى لو إتقبلتي وما سافرتيش هتعلمي
مع الدكاترة إنك مش جد وإنتي لو قدمتي أكيد هتتقبلي.

- بجد يا دكتور إنت واثق فيا أوي كده؟

- جداً يا سلمى، إنتي من أذكى العقليات اللي قابلتها

سكتت قليلاً، ثم قالت:

- دكتور أنا كنت عايضة أقولك على موضوع كده..

- إتفضلي

- دكتور كريم نزل ورايا الكافيتريا واعتذرلي مخصوص
وأنا...

- تصرف عادي جداً من كريم، بصي يا سلمى كريم
معيد شاطر وفتى أحلام وكل حاجة، بس هو بيتكلم مع
بنات كثير وعادة ما بياخدش أي خطوة جدية تجاه أي

واحدة، لو قعدتي تضيعي تفكيرك في إنك تخليه ياخذ الخطوة دي تجاهك إنتي هتخسري يا سلمى؛ لأنه شيء مش مضمون، الحاجة الوحيدة المضمونة بالنسبالك إنك تركزي في مذاكرتك وتحافظي على التفوق اللي بيخليكي مش بنت عادية.

- حاضر يا دكتور، أنا بجد مش عارفة أشكرك إزاي

- لا عادي يا سلمى، ولو إحتاجتي أي حاجة في أي وقت كلميني

مع السلامة.

- مع السلامة

قفلت سلمى التليفون، وقررت إنها ما تخليش أي حاجة تعطلها عن مذاكرتها ولا دراستها، واستمر الترم واستمرت سلمى في دراستها الجادة وشخصيتها الجديدة التي تسأل وتناقش، وبدأت تتعرف أكثر بين الدكاترة والطلبة واستمر كريم من حين لحين يفتح مواضيع ويهزر وهي بتبقى ذوق جداً معاه، والموقف بيعدى وتجاهد نفسها عشان ما تفكرش فيه.

خلص الترم وحلت حلو أوي في الامتحانات، وقررت آخر يوم تروح تسلم على مصطفى؛ لأنه كان سبب في حاجات حلوة كتير أوي الترم ده.

- دكتور أنا متشكرة أوي على اللي حضرتك عملته معايا
الترم ده، هفضل أدعيلك طول عمري.

- ربنا يخليكي يا سلمى، عايزك تتفسي وتخرجي مع
أصحابك، دي آخر إجازة ليكي كطالبة، السنة الجاية
هتخرجي تدوري على شغل بأه لحد ما تتعيني إن شاء
الله، وهتبقي مش فاضية للفسح وكده.

- حضرتك دائماً بتلفت نظري لحاجات مش واخدة بالي منها
وساد الصمت للحظة وبعدين قالها:

- لو النتيجة طلعت بدري هقولك عملتي إيه

- طب كويس، حضرتك معاك رقمي حفظته أنا كلمتك مرة
قبل كده؟

- لأ ياسلمي أنا آسف والله، ماجاش في بالي أحفظه ممكن
تديهولي؟

وبالفعل إديته الرقم وسلمت عليه ومشيت.

بينما هي تسير، هو بيقول لنفسه أنا ليه قولتها إن أنا ما
حفظتش الرقم مع إني حفظته، هو أنا عايز أنفي لنفسي أو
أنفيلها إيه؟! إيه الهبل ده؟!... بس أنا فعلاً مش حاسس إن
أنا حاسس تجاهها بحاجة.

بينما هي الأخرى تخاطب نفسها..

عسول أوي دكتور مصطفى ده... سلامي سيطري على نفسك
شوية، هو كل ما حد يكلمك كلمتين تسرحي معاه! الرجل مفيش
في دماغه حاجة تجاهي، ده حتى ما حفظش الرقم لما كلمته.



الحلقة الثامنة (أخيراً جالها عريس)

عادت إلى المنزل وهي تفكر كيف تجعلها أجازة مختلفة، فبالفعل سوف تكون آخر أجازة لها كطالبة، قررت أن تخرج مع أصحاب المدرسة عدة مرات، فهم لهم غلاوة وقعدتهم ليها حلاوة، ما بتقصش ولو بعد ميت سنة وطبعاً هتتظم كذا خروجة مع أصحاب الكلية وهتقنع باباها يطلعوا السنة دي مصيف رائع، وبدأت الأجازة وانهمكت هي في تنفيذ خطتها؛ بتخرج كثير وقررت تحفظ قرآن وبقت تروح مركز تحفيظ وتنزل البرامج والأفلام اللي بتحبها وتسهر تتفرج عليها، كانت في منتهى السعادة والاستمتاع زي ما دكتور مصطفى قالها كانت بتستمتع بالأجازة عشان السنة الجاية مش هتعرف تعمل كده.

وبينما هي على هذا الوضع تمر بجوار غرفة أبيها وأمها لتسمع هذا النقاش..

- أنا مبسوط أوي عشان سلمى حاسس إنها منورة كده ومبسوطة

- إنت مش فاهم حاجة، مش فاهم هي بتعمل كده ليه؟!

- ليه؟

- عارف كل الخروج والفسح والتطيط ده عشان تتسى وتهرب من اللي هي فيه.

- اللي هو إيه قلقتييني؟

- سلمى ما حدش خبط على بابها خالص يا أبو سلمى، ما حدش فكر يتقدملها، ما حدش شايفها خالص

- تفتكري هي بتفكر كده؟

- أيوة طبعاً، مفيش بنت ما بتفكرش في كده، أنا حاسة ببنتي .

سمعت سلمى هذا الكلام ولم تكن تعرف ما الذي يجب عليها فعله، أتدخل لتصلح لهم المعلومة أم إنها ستبدو وكأنها تسترق السمع وذهبت إلى غرفتها وهي تفكر..

هي ليه دائماً ماما شايفاني حزينة وحظي وحش؟! النظرة دي نفسها هي اللي بجد بتحزني، واستمر الحال على ما هو عليه في الأجازة إلى أن جاء يوم غير مجرى كل شيء بعد أن عادوا من المصيف في آخر أيام الأجازة، وكانوا في منتهى السعادة، فما إن دخلوا البيت حتى جاء تليفون على الخط الأرضي ردت أم سلمى

وانشغلت سلمى وأخواها في إعداد وجبة خفيفة ليأكلوا، أنهت أم سلمى المكالمة ووافتهم إلى المطبخ، ولكنها كانت غريبة، كانت بتضحك ومبرأة عينيها وبتبص لسلمى وكلهم عمالين يقولونها في إيه يا ماما ؟

قالتهم بصوت يملؤه سعادة: سلمى جالها عريس

سكتت سلمى للحظات، وبدأت تسأل عن التفاصيل..

مفيش يا ستي، بصي صاحب خطيب هبة بنت خالك وصاحبتك وحبيبتك اللي طمر فيها العشرة

- وده بيشتغل إيه؟

- ظابط شرطة

- طب عرفني مينين؟

هو كان بيدور على عروسة، سأل صاحبه، صاحبه سأل خطيبته وقالت له عليكى، وهنقابلهم بعد بكرة في النادي.

- هنقابل مين بعد بكرة؟

- هو ومامته و هبة وخطيبها وأنا وإنتي

- ماشي يا ماما اللي تشوفيه

- أنا بس قلقانة من حاجة واحدة بس، إنتي حرقتي نفسك في البحر أوي، قولتلك خدي بالك إنتي على وش جواز، قعدتي تلعبى زي الهبلة في البحر، إسوديتي أوي إعملي بأه ماسكات تبييض على وشك.

- ماما أرجوكي نفسي مرة ما تقفنيش وما تقلقنيش، مش كفاية إن أنا هروح أتعرف على عريس وأتكلم معاه أودام الناس دي كلها!

- خلاص ياختي لا هقفلك ولا هقلقك، ربنا يجعل في وشك القبول.

وقضوا اليوم الثاني كله في اختيار لبس مقابلة العريس وماسكات التفتيح وخطات تبييض الأسنان الطبيعية من على النت والكلام ده كله.

ووصلوا إلى مسرح المقابلة وسلمت سلمى عليهم كلهم وجلست وكانوا قد صمموا القعدة، بحيث إنها تبقى قاعدة في وش العريس، ما إن استقروا في الجلوس حتى وجدت هبة تقولها:

- إيه ده يا سلمى، إنتي شكلك ما طلعتيش من البحر وكأنها تنفي أن تكون غشتهم في درجة لون البشرة المطلوب للعريس؟!؛

ارتاحت أم سلمى لهذا الكلام عشان هي أصلاً كانت عايزة تدور على طريقة تقول بيها إن ده مش لون بنتها الحقيقي فراحت نطت في الإجابة على طول:

- فعلاً هي مسمرة أوي، أصل سلمى دي إيديا ورجليا واقفة طول المصيف على حيلها مع أخوها على البحر بتترعب عليه من حوادث الخطف اللي بنسمعها، طول عمرها من وهي قد كده أهو وهي بتشيل مسئولية اللي معاها.

تعجبت سلمى من الحوار كله؛ السمار والمسئولية لم يكن حقيقي أصلاً، هي إسمرت عشان بتحب تعوم وتلعب في البحر مش أكثر،

ولكن نظرت أم العريس بإعجاب شديد وقالت: فعلاً هي شكلها عاقلة ربنا يحميها، ونظرت إليها نظرة متفحصة وغير إن إحنا كمان عارفين إنها متفوقة وجد.

ردت أم سلمى:

- هي هبة قالتلكوا، أه والله دي سلمى بنتي أكثر حاجة تحبها المذاكرة ومالهش في أي حاجة تانية.

مر الجارسون بجانبهم ليشير له العريس، ويسألهم العريس
تشرّبوا إيه؟ إلى أن وصل إلى سلمى وسألها: تشرّبي إيه وكانت
دي أول مرة حد يديها فرصة تتكلم في القعدة.

قالتله ليمون.

طلبها ليمون واستمرت القعدة ما بين الأمهات يعددوا
مميزات عيالهم بعد ما انتهت أم سلمى بدأت أم العريس تحكي
قد إيه هو ظابط طيب، والناس كلهم في القسم بتدعيه وغير إن
هو أصلاً روح قلبها والكلام ده يعني.

واستأذن خطيب هبة في إنه يتمشى هو وهبة شوية وانفردت
الأمهات ببعض في الحديث، وبدأ هو يتكلم مع سلمى:

- إيه عاملة إيه بقى؟
- الحمد لله وانت؟
- أنا كويس، صحيح إنتي مسمرة كده ليه؟ وهو مبتسم
- وانت تعرفني قبل كده أصلاً
- طب بجد تحبي تتكلمي عن إيه؟
- طب بص أنا مكسوفة كلمني انت عن نفسك شوية..

- بصي يا ستي أنا ظابط ابن ظابط وحفيد ظابط، عيلتنا كلها ظباط، أنا إنسان عادي جداً، بحب الحياة أوي، بحترم الست الذكية ونفسي أتجوز وأستقر.

وإنتي؟

- أنا مش عارفة أقول حاجة

- طب خلاص هساعدك، هسألك وإنتي تجاوبي

- ماشي فكرة حلوة

- إيه أكثر فيلم بتحبيه؟

- صغيرة على الحب

- وإيه أكثر أكلة بتحبيها؟

- المحشي

- باين عليكى

- نعم!

- بهزر معاكي والله

- أيوة طبعاً بتهزر، ده أنا مانيكان

- ده إيه الغرور ده؟!
- لأ مش غرور بس إنت اللي غلست الأول، طب إنت إيه أكثر فيلم بتحبه؟
- كتير أوي، بصي أنا بحب الأفلام البسيطة؛ بحب كريم عبد العزيز أوي؛ «أبو علي وحرامية في تايلاند» والحاجات القديمة بتاعته مش الجديدة.
- طب ليه دي الجديدة فيها أكشن أكثر وكده؟!
- طبيعة شغلنا يا سلمى كلها أكشن بحب أتفرج على حاجة أريح بيها أعصابي، أنا نفسي لما أتجوز كمان بيتي يبقى هادي ومريح مش عايز أي مشاكل، أنا بحتاج حالة من الهدوء والسلام عشان المشاكل اللي بشوفها في شغلي.
- أفهم من كده إنك عايز ست هادية مهماحصل مشاكل تشيل في نفسها وما تتطقش؟!
- لأ مش بالظبط كده، إن هي تبقى هادية ومطمئنة ده جزء من دوري وواجبي، وأنا هحاول أعمله على أحسن وجه، عمري ما هحملها فوق طاقتها أو أغضبها على حاجة هي مش عايزة تعملها حتى لو أنا عايزها تعملها، أنا أهم

حاجة عندي إن هي تبقى مرتاحة نفسياً عشان هي كمان
تقدر تريحنى، الست يا سلمى مركز البيت لو مرتاحة
هتريح البيت كله.

- كلامك حلو

- طب إنتي بقي عايزة إيه من جوزك؟

- بص أنا كسلمى حد مالوش طلبات أكثر من اللي إنت
قلتها وشوية صبر عليا عشان أنا ما بعرفش أطبخ، ولسه
عايزة شوية تدريب على شغل البيت.

واستمر الحديث خفيف ظريف لطيف حتى استأذنت أم
سلمى عشان هما كده إتأخروا، والعريس ومامته وصلوهم لحد
بوابة النادي وعرضوا عليهم التوصيل، ولكن أم سلمى رفضت
عشان مش عايزين يتعبوهم والعريس وقف لهم تاكسي.



obeikandi.com

الحلقة التاسعة

(في انتظار أم العريس ترد علينا)

وبعد مقابلة عريس صالونات، ما إن ركبت الأم التاكسي حتى بدأت الأم في التساؤل أكيد عجبتيه يا بت، أنا حسيت إن عينه كانت هتطلع عليكي، عارفة لو ما كنتيش عجبتيه ماكانش قام وصلنا لحد باب النادي، أنا حاسة إن إحنا هنصحى الصبح نلاقي أمه خدت نمرتنا من هبة وبتقولنا عايزين نזורكم في البيت، مش بعيد أصلاً تكون بتتكلم دلوقتي وإحنا مش سامعين الموبايل ثم نظرت إلى سلمى:

- يا بنتي خدي وادي معايا وأنا بتكلم، هتفضلي سايباني أهاتي مع نفسي كثير؟!

- لأ يا ماما والله أنا بسمعك، طب عايزاني أقول إيه؟

- بت خلصي

- حاضر يا ماما، القعده كانت حلوة وظريفة، هو شكله

كويس وأنا إرتاحتله مبدئياً.

- وهو؟

- لأ ما أعرفش يا ماما، ممكن يكون تعامل كده معنا لمجرد
إنه إنسان ذوق وابن ناس وممكن أكون عجبته..

- لأ عجبتيه، خدي من أمك واطمني، أنا عمري قتلتك
حاجة وما حصلتش؟!؛

- وكأى ابنة عاقلة ما أودامهاش في اللحظة دي إلا إنها تقول:
-لأ يا ماما عمرك ما قولتي حاجة إلا و حصلت.....بس
عارفة يا ماما في حاجة مهمة نسيناها، لو قلتها لك هتضحكي؛
إنتي من فرحتك نسييتي تسألني هبة العريس اسمه إيه، وأنا
من كسفتي نسييت أسأله اسمك إيه وأمه كل ما تيجي تتكلم عليه
تروح قايلة أنا ابني بيعمل، أنا ابني بيسوي، أنا ابني حلو وجميل
ولا مرة اسمه اتقال!

- تصدقي صح يا سلمى، مش مشكلة، المهم إنه كويس وظروفه
معقولة، طب إنتي عارفة حتى لو اسمه بقلظ هنتجوزيه برده.
وعلى الجانب الآخر في النادي يدور هذا الحوار بين العريس
وأمه:

- ها يا أحمد إيه رأيك؟

- بجد يا ماما، مش عارف أول مرة أحس إنني مرتاح كده،
إنسانة على طبيعتها جداً، ما بتصطنعش الخجل، بتتكلم بكل
تلقائية دمها خفيف.

- سبحان الله يا ابني مع إنها بنت عادية جداً وشفت أحلى
منها بكثير وعمرك ما قلت كده، صحيح أرزاق!

- مش عارف يا ماما، بس أنا كنت فاكرك هتفرحي إن
أنا أخيراً ارتحت لواحدة، إنتي على طول بتشتكي إن مفيش حد
عاجبني وخايفة إن أنا ما أتجوزش ومدوخك في اللف على العرايس،
ولا إنتي شوفتي منهم حاجة ما عجبتيكيش؟

- لأ يا ابني الكذب خيبة، هما شكلهم ناس محترمين، بس..

- بس إيه يا ماما إنجزي؟

- بس البت اللي تلفك حوالين صباعها كده في قعدة، ممكن
ما تبقاش بت سهلة ممكن تبقى لثيمة.

- يا ماما بقولك غلبانة جداً صدقيني ها هتردي عليهم
إمتي؟

- مالك يا قلب أمك ملهوف على إيه؟ طالما ملهوف كده
يبقى لازم نتقل لحسن لو شافوك كده هيركبونا.

- أيوة يا ماما بس كده ما يصحش هما أكيد مستيتين
الرد

- من دلوقتي هتقولي اللي يصح واللي ما يصحش

- لأ يا ماما مش قصدي خلاص اللي تشوفيه قررت الأم أن ترد عليهم بعد أسبوع رغم رغبة أحمد في الرد عليهم ثاني يوم، و كان المشهد في بيت سلمى كالتالي ما إن وصلت أمها إلى المنزل حتى ملأته بالسعادة والفرحة والبشرى بالرد القريب، وصحبوا ثاني يوم من الصبح والأم مستتية جنب التليفون كل ما يضرب تجرى ترد وفي نهاية اليوم الأول بدأت سعادتها تقل.

وفي ثاني يوم بدأت تتكلم مع سلمى، تفتكري ما إتصلوش ليه مع إنني كنت حاسة الولد مبسوط؟

وفي ثالث يوم بدأت تتكلم مع جوزها، أنا مش عارفة البت دي حظها من دون البنات ماله، حتى العريس الوحيد اللي جالها وكان باين إنها عاجباه ولا رد علينا، أنا خايضة يكون معمولها عمل.

وفي رابع يوم ندهت سلمى، يا بنتي إنتي لازم تتعلمي تتكلمي مع الناس إزاي وتجذبيهم ليكي، التفوق في المذاكرة مش كل حاجة يعني هتعملي إيه لو ما إتجوزتيش طول عمرك؟! سلمى سكتت ودخلت أوضتها

وفي خامس يوم بأه أمها دخلت عليها ولسه هتبدأ كلام سلمى عيطت، عيطت أوي وصوتها علي وهي بتقولها أنا ذنبي إيه؟ إيه اللي ممكن أعملهولك دلوقتي؟

لو كان بإيدي حاجة كنت عملتها لك، حرام عليك
ودي أول مرة البنت تعلي صوتها وتعيط بالشكل ده، سمع الأب
الحوار جه يجري: في إيه؟ مالك بيها؟ حرام عليك، إنتي
إزاي توصلي البنت للمرحلة دي من الضغط النفسي؟! الله
يحرق العريس على الجواز على اليوم الأسود اللي كلمونا فيه؟
وجري على سلمى خدها في حضنه وقعدت تعيط بصوت عالي،
الأم كانت مذهولة وهي واقفة مش مستوعبة إنها وصلت بنتها
للمرحلة دي!!

- أنا آسفة يا سلمى، آسفة يا حبيبتى والله مش قصدي
أضايقك، ده إنتي عندي بالدنيا واللي فيها طب تعالي في حضني.
بس سلمى رفضت تسيب حضن أبوها، في اللحظة دي انطلقت
الأم إلى غرفتها مدهوشة ومر سادس يوم وأجواء البيت حزينة،
كله متضايق عشان سلمى حتى الأم بتحاول تبقى لطيفة معاها،
تعملها الأكل اللي بتجبه واقترحت عليها ينزلوا يتمشوا سوا، بس
هي رفضت وكانت بتنام كتير أوي، في سابع يوم قبل المغرب رن
التليفون..

ردت الأم:

- ألو

- ألو إزيك يا مدام وإزي سلمى؟

- الحمد لله أهلاً وسهلاً مين معايا؟

- أنا أم أحمد اللي قابلتونا في النادي الأسبوع اللي فات

- أه أهلاً وسهلاً

- معلش انشغلت أوي وما عرفتش أرد عليكوا خالص

- لا ولا يهملك

- عايزين بقى نعملكم زيارة نتعرف أكثر على بعض

- خلاص إن شاء الله هتفق مع البشمةهندس أبو سلمى

وأكلمك أقولك

- طب تخلي معاكي الرقم وخذت منها الرقم وقفلت وندهت

بفرحة على سلمى وأبوها قائلة: أم العريس ردت،

نظرت سلمى نظرة حزينة كمن برأ الله ساحتها من تهمة

الغباء الاجتماعي، ولم تبد رغبتها في أي استفسار لكن الأب بادر

بالتساؤل: وإيه بأه اللي خلاهم يتأخروا في الرد كده؟!

- قالتلي انشغلت، الله أعلم بظروف الناس

- يعني هي انشغلت والله أعلم بظروف الناس وإنتي هنا

تسودي عيشتنا وعيشة البت

- ما خلاص بأه أنا عرفت غلطتي، المهم دلوقتي إنهم إتصلوا
هنعمل إيه دلوقتي؟

- مش هنعمل حاجة، عارفة إيه اللي حصل؛ الست دي حست
إنك فرحانة فرحة الأهل، فقالت إنها هتسويكي شوية قبل ما
تتصل والناس اللي أسلوبهم كده مش هيمشوا مع بنتك ولا معانا،
بنتك غلبانة وإحنا ناس ما لناش في اللف والدوران، يعني كده
الموضوع انتهى.

- أنا فرحانة فرحة الأهل؟! طب هعديها لك بس موضوع إيه
بأه اللي انتهى؟

تركت سلمى الخناقة ودخلت تنام، فقد كانت مرهقة نفسياً
جداً مما أدى إلى إرهاقها جسدياً، ده غير إن النهاردة آخر يوم
في الإجازة وبكرة أول يوم في سنتها الأخيرة، فكان عليها أن تنام
بدري لتستيقظ مبكراً.



obeikandi.com

الحلقة العاشرة

(حنفي، خلاص هتنزل المرة دي)

استيقظت في اليوم التالي، وهي لا تعرف من المنتصر في خناقة العريس الأب ولا الأم، ولكن يوجد هناك دائماً هذا الرويتر الموجود في كل بيت، فما إن خرجت من غرفتها حتى جاءها أخوها مودي:

- سلمى عايزة تعريفي اللي حصل بعد ما نمتي؟

- مش أوي بس قول..

- بابا لما لاقاكي دخلتي تنامي وإنتي زعلانة زعق لماما وقالها: كلمة كمان وهنزل أبات في الشارع، وبعدين قالي مودي نام إنت جنب ماما وأنا هنام في سريرك وبس.

أصاب هذا الكلام سلمى بإحباط شديد؛ ليه أنا أكون سبب مشكلة زي دي؟ أنا بجد مش عايزة أتجوز، مش عايزة حاجة غير إنني أعيش في سلام واستعدت للنزول ونزلت وتبعها أخاها للمدرسة والكلية، وما إن أغلقوا الباب حتى تزينت الأم وحضرت الأم صينية فطور ممتازة وذهبت لزوجها كي تفطره في السرير، فتحت النور ووضعت الصينية جانباً وجلست بجانبه وهزته برفق لتفيقه بصوت حنون:

-عبده إصحى يا عبده

- فتح عبده عينيه ليجد زوجته في أبهى صورها، فعرف أنها
تود المصالحة، فما كان منه إلا أنه رحب بالسلام، هو عارف إنه
عك معاها في الكلام ليلة أمس، وإنه هيدفع تمن العك ده مهما
كان مقموص دلوقتى فهيدفعه بعدين.

- صباح النور يا عيون عبده

- يلا يا حبيبي قوم إفطر واشرب الشاي عشان ما تتأخرش
على شغلك.

- في السرير كمان ده إيه الرضا ده؟!

- أنا على طول راضية عنك بس إنت كمان ترضى، أنا بقيت
أحس إن كلامي على طول مش عاجبك وأنا نفسي مش عاجباك
- ده إنتي تعجبي الباشا يا باشا، بس أنا بيصعب عليا أوي
زعل سلمى إنتي عارفة إخواتها كوم وهي كوم.

- ما أنا عارفة، ما أنا عشان كده على طول بقولك يا أبو
سلمى مع إنك عندك ولدين غيرها، بس يعني ما هي روح قلبي
أنا كمان يعني أنا هعوزلها إيه غير الخير.

- أيوة بس.....

- بس إيه الواد كويس أوي يا عبده والبنات مش لاقية جواز،
والله أعلم يمكن يكون حصلتلهم ظروف فعلاً، حرام يا عبده بلاش
نقطع النصيب ونندم بعد كده، الواد زي الفل وظروفه كويسة

- خلاص اللي تشوفيه، بس لو حصلت أي حاجة منهم تاني
تضايق سلمى مش هكمل والمرة دي بجد .

- عارفة يا عبده كلمتك مش ممكن تنزل الأرض أبداً

- أيوة طبعاً

- طب أعمل إيه دلوقتي؟

- كلمي هبة وخليها تجيبلك إسمه بالكامل، خلينا نسأل عليه
النهاردة وبكرة كده وابقى ردي على أمه على طول .

- طب إيه قولك تتأخر عليهم في الرد زي ما إتأخروا علينا؟

- بلاش ده جواز وعشان ربنا يكرمنا لازم نعاملهم بما يرضي
الله وزي ما نحب إنهم يعاملونا، لو هما كانت حصلتلهم ظروف
عطلتهم فإحنا مسامحين، لكن لو هما طبعمهم كده فخلينا إحنا
أحسن عشان ربنا يبعدمنا عنا لو هما ما فيهموش خير .

- والنبي إنت ما في منك يا عبده، أنا هقوم أكلم هبة دلوقتي
زمانها صاحبة رايحة الكلية عشان تجيب لي إسمه من خطيبها .
شدها من إيدها وهي تقوم من على السرير:

اصبري بس عايز أقولك حاجة مهمة .. نظرت له باهتمام:

- قول

- كل الستات تكبر تعجز ويروح عليها إلا إنتي تكبري تحلوي
ما بيروحش عليكي أبداً

- والنبي إنت رايق قوم إشرب الشاي وافطر وأنا هروح أكلم
هبة، زمانها رايحة الجامعة قبل ما تخش محاضرة وما تعرفش
ترد عليا، ثم خرجت من الغرفة

- أنا كنت عارف إن هي دي أخرتها على فكرة وجلس ليتناول
فطوره

- في هذه الأثناء كانت سلمى قد وصلت الكلية وسلمت
على أصحابها، ولكنها كانت حزينة جداً عشان موضوع العريس
وخناقة باباها ومامتها وهي ماشية لمحت دكتور مصطفى وهي
أصلاً كانت عايزة تشكره عشان بعثها النتيجة على واتس أب في
الأجازة، وباركلها بحرارة في رسالة على الواتس أب.

وهي شكرته في رسالة واتكسفت تكلمه، قالت لو عايز يكلمها
كان بلغها النتيجة بنفسه، بس واجب تشكره وتسلم عليه النهارده
لمحته وهو داخل أوضة المعيدين:

- دكتور مصطفى

- إزيك يا سلمى

- إزي حضرتك أنا متشكرة أوي إنك جيبتي النتيجة بنفسك
من الكنترول واهتميت ربنا يخليك

- دي حاجة بسيطة أنا فرحت أوي إن إنتي قدرتي تحافظي
على ترتيبك السنه دي كمان

- شكراً يا دكتور

- مالك يا سلمى؟

- لأ مفيش حاجة دخل كريم في اللحظة دي شافها راح مسلم
عليها بحرارة

- سلمى إزيك، إيه يا عم الشطارة والترتيب الجامد ده، كل
سنة كده، ده الدكاترة كلهم قعدوا يتكلموا لما طلعت النتيجة. واللي
يقولك عبقرية واللي يقولك نبغة ده إحنا مش هنعرف نكلمك بعد
كده إيه الحلاوة دي أقسم بالله..

- اتكسفت سلمى وشكرتهم واستأذنت ومشيت مصطفى بص
لكريم بصة قرف

راح رادد على بصته:

- إيه دي حته من مسلسل مش بعاكس والله
- لأ ما هي أكيد ما بتتفرجش على مسلسلات كتير ما تزودش معاها هي مالهاش في كده
- حاضر يا عم إنت مالك زعلت كده ليه؟! إحنا هنجيب شربات قريب ولا إيه؟!
- أقسم بالله قاعد مع خالتي اللتاة، يا عم لا شربات ولا جزم بس البنت غلبانة بجد ما لهاش في كده
- ماشي يا عم الحنين عشان خاطر ك إنت بس وخرج كريم من الغرفة ليفكر مصطفى مع نفسه، أكيد مش هنجيب شربات، أنا بعقلها النتيجة أول ما طلعت لو كانت عندها أي ميول تجاهي كانت كلمتي شكرتني حتى ما تستناش لما تبدأ الدراسة. بينما تمشي سلمى وهي تفكر قد إيه دكتور مصطفى بيحس باللي أودامه، على طول حس باللي فيه وسألني مالك بس الأكيد إنه معندهوش أي مشاعر تجاهي، ده ما حاولش يكلمني طول الأجازة، حتى لما جت فرصة النتيجة بعثلي على الواتس ما كلمنيش، بلاش أشغل نفسي بحاجات مالهاش لازمة أنا مش ناقصة.



الحلقة الحادية عشر

(يلا نجهز البيت للعريس)

العريس جي النهاردة خلاص ردوا عليه وسألوا عليه وجي النهاردة يوم الجمعة.

في اجتماع عاجل في البيت بعد الفطار الأم بتوزع الأدوار وجابية واحدة ست بتنظف الشقة وتتنظر إلى وليد وهو أخو سلمى الأوسط إعدادي هندسة.

- إنت هتطلع الطقم الصيني من النيش والكاسات البوهيمي والصواني الفضة وطقم الشوك والسكاكين المذهب وهتضفهم بنفسك.

- يا ماما بس أم سيد موجودة ما تقوليها

- أم سيد لو كسرت حاجة ماقدرش أقتلها، لكن إنت هقتلك عادي وتاني حاجة أي ألش أي كلام في السياسة دول ظباط يا عين أمك هيخدوك في أيدهم وهما ماشيين.

- هتسيبهم ياخدوني يا ماما؟

- دول بيقوا عملوا جميلتين خلصوني من اتنين إنت وأختك

-طب يا ماما

- إفضل إنت إرغي لحد ما هلقى اليوم خالص، إخلص مش ناقصة أي سخافات النهاردة وتظئر له بتهديد ..

فيمشي لأنه يستطيع أن يميز أنها فعلاً متوترة وتظئر إلى مودي: هتنزل تجيب لي عصير جوافة ومانجة وبرنقان ولو لقيت لمون بالنعناع معلب مستورد هات وحاجات ساقعة ميرندا وبيبسي وسفن، كل ده من السوبر ماركت الكبير اللي على أول شارع وتجيب الشاي الباكييت الغالي ده اسمه باين «ديملا»

- ديلمه يا ماما

- أيوة ديلمه وسكر مكعبات، ثم تتذكر فتده بصوت عالي يا وليد ما تتساش تطلع السكرية الكريستال وتكمل لمودي: خد معاك موبايل أختك عشان لو إفتكرت حاجة أقولك عليها ..

- شوفتي بأه مش كنتوا تجيبولي موبايل عشان المواقف اللي

زي دي

- بقولك لماضة واستظراف، النهاردة هولع فيك

- حاضر يا حجة ويذهب

تتظر إلى الأب:

- عبده تطلع على الحلواني بتاع مصر الجديدة ده تجيلنا
جاتوة وساليزون وحلويات شرقية

ينظر لها: بصي إبعتي ابنك يجيب أنا مش هنزل وأسيبك
سلمى لوحدكوا وإنتي في الحالة دي.

- ليه هاكلها ولا إيه إن شاء الله؟

- بصي مش هنزل يعني مش هنزل

فتنده بعصبية: إنت يا زفت يا كبير

يرد وليد: نعم يا ماما بتزفتيني ليه ما أنا قولتلك حاضر
على كل حاجة؟!

- شوف أبوك

فينظر إلى أبوه ليحييه الأب قائلاً:

إنزل يا ضهات الحاجات اللي أمك هتقولك عليها

- يا بابا ماما عايزة مني حاجات كتير، كده مش هلحق
وبعدين الحاجة هتتهدل في المواصلات وأنا كده ممكن ما ألحقش
ألبس.

- هديك حق التاكسي وفوقهم ٢٠ جنيه ليك

- ثلاثين واعتبر الحاجة جت

- ماشي يا ابنولا بلاش إحنا في يوم الجمعة يوم مفترج

جاء الآن دور سلمى، تنتظر لها الأم: بصي يا سلمى عايزين نرتب الحاجات اللي هتتقدم، أنا وأم سيد هنبقى موضبينلك كل حاجة في المطبخ، مش باقي غير على الصب،يعني الفناجين تصبي فيها الشاي والعصير في الكاسات وكده.

بصي يا سلمى: العصير هحطلك مثلاً ١٠ كاسات؛ هتحطي كوبايتين من كل نوع عشان يبقى الصينية فيها ألوان كتير زي الفنادق شكلها يزغلل العين، والعصير هينزل مع الحلويات الشرقية وده ثاني حاجة، لكن أول حاجة هتنزلي الشاي مع الجاتوة والساليزون في الطقم الصيني، لو طولوا أوي في القعدة في كاسات مختلفة هتحطي فيها حاجة ساقعة بنفس طريقة العصير تمام.

ردت سلمى: حاضر يا ماما

- بصي بقى عايزين دلوقتي نتفق على الدخلة بتاعتك

رد الأب: دخلة إيه هي داخلة تمثل؟

نظرت له الأم: اسكت لو سمحت وبصت لسلمي: بصي عايزين أول ظهور ليكي يبقى وإنتي داخله بصينية الشاي فإنتي لو عديتي من أودام الصالون عشان تروحي المطبخ لازم هتسلمي عليهم فمش هينفع.

- طب أعمل إيه يا ماما؟

- بصي إنتي أول لما الباب يخبط تخشي المطبخ، إستني في المطبخ تصبي الشاي وترصي الجاتوه في السرفيس، وخمس دقائق وتطلعي نظر الأب وأبدى اهتمام:

- لأ كده برده ممكن يلمحوها وهما معديين من أودام المطبخ رايعين الصالون، ما إحنا عندنا المطبخ في وش الباب قبل الصالون.

ردت الأم: صح عندك حق أومال نعمل إيه؟

نظر إلى الأم باهتمام: نخبيها في البوتاجاز.

ولم يملك نفسه من الضحك ولا سلمى أيضاً.

نظرت له الأم بتعجب: بص يا عبده من مصلحتك النهارده تخف السكر شوية، ثم نظرت إلى سلمى: خلاص خشي سلمى عليهم الأول وبعدين قومي قدمي الحاجة.

واستمرت التجهيزات واختيار اللبس حتى موعد العريس الساعة السابعة. على الجانب الآخر في بيت العريس، العريس قام يلبس من الساعة خمسة ونص وظبط نفسه، وطلب من أمه تقوم تلبس ردت الأم:

-بقولك إيه لسه بدري ما تسريعنيش

-يا ماما هو إيه اللي بدري إحنا ساكنين في رمسيس وهما ساكنين في مدينة نصر يعني المشوار طويل.

-مش لازم يعني نوصل على الشعرة

نظر أحمد إلى أبوه: بقولك إيه يا سيادة اللوا أي تأخير النهاردة هيبقى في وش الداخلية كلها، ينفع اتنين ظباط يتأخروا عن ميعادهم؟!

رد الأب بضحك: علي بابا يا ولا، بس أنا مبسوط أوي يا أحمد إن إنت متسريع على العروسة كده، أكيد بنت كويسة وتستاهاول وإننت تستاهل كل خير يا حبيبي.

-ربنا يخليك يا أجدع لواء في تاريخ الداخلية كلها تنظر الأم لابنها: يعني دلوقتي أنا اللي بقيت كخه يا أحمد؟!

- لا واللهي يا ماما، ده إنتي روح قلبي بس عشان خاطري قومي إلبسي.

- لبست الأم واستعد الأب ولبس أحمد وبيأخذ رأي أخته في اللبس:

- إيه رأيك كده يا دارين؟

- زي القمر يا حبيبي ربنا يسعدك

دخلت الأم على طول في الحوار:

- قمر يا حبيبي والله والنبي إنت أحلى منها يا أحمد، عارفة يا دارين لو كنتي جيتي معانا وشوفتيها هتلاقيها عادية خالص. ردت دارين: إن شاء الله هاجي معاكم المرة الجايه وإنتوا بتقروا الفاتحة، خلي القعدة النهاردة على الضيق أوي عشان تعرفوا تتعرفوا على بعض أكثر. كان أحمد يفكر في رد مناسب على أمه بينما تنهي دارين كلامها.

- نظر إليها وقال: ما طبعاً عادية أي واحدة في الدنيا هتبقى عادية جنبك إنت يا قمر واستعدوا للنزول وعدوا في طريقهم على حلواني مشهور، نزل أحمد جاب التورتاية الفخيمة.



obeikandi.com

الحلقة الثانية عشر (أول مكالمات مخطوبين)

العريس وصل، يفتح الباب الأب يرحب بهم

يدخل العريس وأبوه وأمه دخلوا تبادلوا السلام مع أم سلمى وأخويها

أم سلمى: نورتونا وشرفتونا، الطريق كان كويس؟

ليرد العريس: الحمد لله كان لطيف والله يا طنط

لتقاطعه أمه: لطيف إيه؟! لأ ده المشوار طويل أوي والنبي حد يجيبلي كوباية مية لحسن ريقني نشف على ما وصلنا. ترد أم العروسة: قوم يا مودي هات لطنطك كوباية مية وبعد أن شربت المية تدخل سلمى وتسلم على الأم التي تبدي أنها تحاول أن تقوم، ولكنها لا تستطيع فتبادرها سلمى: خليك يا طنط وتوطي لتقبلها، يليها في الجلوس العريس الذي قام ليستقبلها بابتسامة عريضة: إزيك يا سلمى؟

- الحمد لله. ثم يشير إلى أبيه الذي قام ليستقبلها هو الآخر

قائلاً:

- سلمى يا بابا

فيبادر أبوه بالرد: أهلاً يا بنتي، تشده أمه من طرف الجاكية لتجلسه قائلة في همس: ما هو عارف إنها سلمى، يعني هتكون نشوى أقعد وإهدا كده إهدا شوية.

فيهمس لها هو الآخر: حاضر يا ماما تبدأ العائلتان في التعارف، بيرر والد العريس عدم مجيء أخوات العريس، أنا عندي ثلاث بنات غير أحمد؛ اتنين منهم إتجوزوا ومعاهم عيالهم واجوازهم، فقولنا ما ينفعش ندخل عليكوا باللمة دي من أول مرة ولو جيبنا اللي لسه ما إتجوزتش ممكن إخواتها التانيين يزعلوا. واستمر التعارف واستمرت سلمى تقدم في حاجات وتشيل في حاجات لحد ما حيلها اتقطع، وفي نهاية الجلسة اتفقوا إن بفضل الله فيه ارتياح متبادل بين العائلتين، وخير البر عاجله وممكن بكرة بما إن السبت أجازة فيستغلوا اليوم ويروحوا يتفرجوا على شقة العريس وبعديها على طول يقعدوا قعدة إتفاق صغيرة ويقرأوا الفاتحة وبعدين أهل العريس قاموا يمشوا عشان الوقت إتآخر، أحمد وهو ماشي وبيسلم على سلمى طلب منها رقم الموبايل عشان يكلمها، حس إنها مكسوفة راح باصص لباباها.

-بعد إذنك يا عمو، ممكن رقم سلمى عشان نعرف نتكلم أكثر ونتعرف على بعض أكثر.

-رد أبوها: أيوة طبعاً يا ابني، إنتوا خلاص دخلتوا بيتنا إديله
الرقم يا سلمى.

إديتله سلمى الرقم وهمسلها: هكلمك أول ما أروح
هما نزلوا من هنا وأم سلمى: إيه رأيك في الواد يا عبده؟
رد الأب: الولد شكله كويس ومؤدب وأبوه كمان رجل محترم
جداً بس ما ارتحتش لأمه.

الأم: عادي يا عبده، ده ولد على ثلاث بنات، يعني بتديك
حته من روحها، فطبيعي يعني ممكن تبقى غيرانة شوية وتنده
على سلمى:

- إيه رأيك يا سلمى؟

- بجد يا ماما مش عارفة، الموضوع ماشي بسرعة أوي
شوفناهم مرة في النادي وجم البيت مرة، وبكرة هنشوف الشقة،
قلقانة شوية من السرعة دي..

ترد الأم هو كده النصيب لما بييجي تلاقي الأمور ماشية بسرعة
الأب: بصي يا سلمى كده إنتي مش هتلبسي دبل على طول
هنقرا فاتحة وتتكلموا شوية في التليفون، وممكن يجي البيت مرة
في الأسبوع لحد ما تترتاحوا لبعض خالص وبعدين تلبسي دبل.

- إخص عليك يا عبده، لأ أنا عايزة أفرح وتلبس دبل والناس
كلها تشوفها ونفرح ونشغل يا دبلة الخطوبة وإخواتي بييجوا وكده
هموت على الموضوع ده يا عبده.

- يا ستي حاضر هنعملها أحسن خطوبة في الدنيا، بس بعد
ما تظمن للجدع عشان ما تتحسبش عليها، وبعد كده لا قدر الله
ما يرتاحوش لبعض.

يرن تليفون سلمى تنظر لها أمها: ردي ياختي ده الواد
وصلهم في طيارة مش عربية عشان يلحق يكلمك ردي يا بت.
يشير لها الأب قائلاً:

- خشي يا سلمى اتكلمي في أوضتك عشان ما تتكسفيش،
بس سلمى بنتي ما بتسمحش لأي حد يتجاوز معاها في الكلام.
- حاضر يا بابا

تنظر له الأم: ما تسيبها تتكلم أدامنا يا عبده خيلنا نسمع
شوية كلام مخطوبين الواحد واحشه الكلام ده.

نظر لها عبده نظرة شقاوة: تعالي وأنا أسمعك كلام المخطوبين كله
تدخل سلمى غرفتها وترد:

- ألو

- ألو إزيك
- الحمد لله
- كنتي زي القمر النهاردة
-
- ساكتة ليه؟
- مش عارفة أقول إيه؟!
- قوليلي مبسوطة يا سلمى، حاسة بإيه؟
- مبسوطة طبعاً وانت؟
- أنا مبسوط طبعاً، طب باباكي ومامتك أخبارهم إيه؟
- كلنا مبسوطين ومرتاحينلكم جداً ماما حباك أوي
- طنط دي غسل هي اسمها إيه؟
- سمية ومامتك اسمها إيه؟
- هقولك بس ما تتريقيش
- لا بجد قول بقى شوقتي
- ميار

- طب ما حلو، هو حديث بالنسبة لسنها بس حلو

- يعني مش هتقعدى تقوليلي يا خيبتك يا ميار وحزلئوم
والكلام ده؟!

- مين حزلئوم ده ما عرفوش أصلاً

- بجد في حد ما يعرفش حزلئوم أحمد مكى الفيلم بتاع
الظابط سراج، ماجد الكدوانى.

- متهيألى سمعت عنه بس ما شفتوش

- للدرجة دي مشغولة ولا بتستهيفي أحمد مكى؟!

- ما بحبش الممثل اللي طول الوقت عايز يبقى محور كل
حاجة في العمل، يعمل ميت شخصية يفضل ظاهر معاك ٩٠٪ من
وقت العمل اللي بتشوفه، هو ومحمد سعد ومحمد صبحي، مع إن
كلهم نجوم كبار وناس كتير بتحبهم، بس بحس إن عمرهم الفني
يبقى قصير بيقعوا بسرعة والناس مهما كانت بتحبهم بتزهق، لكن
مثلاً بحب تفكير أشرف عبد الباقي أكثر لما جاب شباب دمهم
خفيف بجد وإداهم فرصة وعمل منهم نجوم ونجحهم ونجح بيهم.

- إنت ساكت ليه؟

- بسمعك، دماغك حلوة عميقة بالنسبة لسنك، طب عايزة
أسألك عن حاجة تانية ما قلقتيش من موضوع إن أنا ظابط
والكلام بتاع خمسين في المية والحاجات دي؟

- بص يا أحمد إنت حتى لو كنت جايب مية في المية كنت
هتخش إيه؟

- شرطة برده زي بابا وجدي

- الموضوع مش موضوع مجموع يا أحمد، إحنا في بلد بتورث
المهن يعني وليد أخويا دخل هندسة وعايز يتخصص ميكانيكا زي
بابا عشان يستلم الورشة اللي بابا قعد طول عمره يكبر فيها،
ولو ما كانش جاب مجموع كان برده بابا هيدخله هندسة خاصة.
- طب وإنتي شايفة إن ده شيء كويس ولا وحش؟

- بالنسبة لبلدنا ده أحسن الاختيارات؛ لأن إحنا عندنا حالياً
ناس قليلة أوي اللي بتقدر تبدأ من الصفر وتثبت نفسها وتتجج، لكن
في ظروف أحسن من كده ده بيقتضي على الإبداع عند أي حد.

- طب تيجي ما نعملش كده مع ولادنا؟ أصابتها كلمة أولادنا
بإحراج شديد مما دفعها للتوهان في الكلام وما عرفتش ترد تقول
إيه، خدودها إجمرت ووشها سخن وشعر بها فبادرها بالرد:

- إيه يا دكتورة اتكسفتي كده ليه؟ علمياً أي اتنين متجوزين بيخلفوا .
إتكسفت أكثر واتوترت وردت:

- على فكرة إنت كده بتوترني وهتخليني أقفل

- لا خلاص خلاص، إستني شوية مش قصدي والله، طب
بصي مش عايزة تسأليني عن أي حاجة؟

- عايزة أسألك سؤال؛ إنت إيه الحاجة اللي شدتك ليا
وبصراحة؟

- عارفة يا سلمى، مش عارف بس إنتي مريحة أوي على
طبيعتك جداً، وشك فيه حاجة ريحتتي أوي، لما ببصلك برتاح
مش ببقى عايز أنزل عيني من عليك.

- بالسرعة دي؟

- الارتياح ده رزق يا سلمى وأنا رزقي إني ألاقكي و أرتاحك
وبعدين بحسك طيبة أوي، طيب عارفة إنتي صعبتني عليا أوي
النهاردة، وإنتي عمالة تشيلي وتحطي في المشاريب كان هالين
عليا أقوم آخذ منك الصينية وأقدم أنا بس خفت أومي تقتلني.

- تقتلك ليه يعني؟

- ماما مدلعاني أوي يا سلمى وبتخلي إخواتي البنات يعملولي
كل حاجة.

- بداية مبشرة

- لأ ما تقلقيش اللي يتجوز أميرة رقيقة زيك أكيد مش هيتعبها في أي حاجة. تشعر سلمى بعدم إتزان فطبيعة الكلام جديدة عليها، تشعر إن أي رد هيكون هذيان فتقرر أن تنهي المكالمة.

- بص أنا عندي امتحان يوم الحد ولازم أذاكر شوية عشان بكرة هيضيع وقت كثير برده في موضوع الشقة.

- ماشي يا ستي هسيبك عشان المذاكرة بس عودي نفسك على الكلام الحلو عشان مش كل ما الواحد هيقولك كلمة هيطلعلك إمتحان مفاجئ.

- باي

- باي

قفلت سلمى التليفون ونامت على السرير، ولكنها نامت بصعوبة بعد أن استرجعت المكالمة عشرات المرات قبل أن تنام وفي كل مرة تبسم نفس الإبتسامة البهاء.



obeikandi.com

الحلقة الثالثة عشر

(دي عادية جدًا، هو أحلى منها بكثير)

خلاص كلهم دلوقتى لبسوا ورايحين يشوفوا شقة العريس،
العريس سايق عربيته ومعاه باباه ومامته وبيتكلم مع باباه: نفسي
الشقة تعجب سلمى يا بابا

ترد الأم: لا ما تخافش هتعجبها، مش بعيد أمها من فرحتها
ترقص على باب الشقة يتدخل الأب: خفي شوية يا ميار على
الصبح

- حاضر خفيت

- عارف يا بابا أنا ندمت إن أنا نزلت أنا وماما اختارنا
أرضيات المطبخ والحمام وشطبناهم الصيف اللي فات، كان
الأحسن إنها تختار كل حاجة بنفسها.

الأب: ما أنا قولتلك اصبر لما تلاقي العروسه قولتلي لأ عشان
أخف من عليا شوية مصاريف

الأب: بدمتك هو ده الرد اللي ترده عليه ؟!

الأب: أو مال عايزاني أقول إيه؟

الأم: ترد عليه تقوله هو فيه حد هينقيلك أحسن من أمك؟

يرد أحمد ليمتص غضبها: أيوة صح يا بابا، ماما عندها حق أكيد اللي اختارته ماما هيعجب أي واحدة.

الأب: لأ ما تقلقش، هما شكلهم ناس محترمة مستحيل هيقولوك تكسر حاجة لسة جديدة وبعدين البنت شكلها عاقلة ودماغها كبيرة، وصلوا إلى مكان الشقة لم تصل سلمى وأهلها، ينظر أحمد إلى أبوه - ما تيجوا نطلع نستناهم فوق بدل ما نقعد في العربية؟

الأم: بقولك إيه خلينا قاعدين في العربية، فوق مفيش كرسي نقعد عليه لحسن يحبوا يعيشوا في دور التقلانين بأه ويتأخروا علينا ويلطعوننا. لم تكمل الأم كلمتها لتجد سيارة أبو سلمى أمامهم ويتوجه الجميع لركوب الأسانسير حتى يشاهدوا الشقة.

يفتح أحمد باب الشقة يدخل الجميع تقدمهم سلمى جميعاً في الدخول قبلها ويلبها أحمد الذي انتظر حتى دخل الجميع الشقة وهمس لسلمى:-

إزيك وحشتيني

ترد:- الحمد لله. وتسرع من خطواتها حتى تكون بجانب أبوها وأمها مما يشعرها بالأمان حتى لا يستطيع مغازلتها بالكلام مما يجعله يبتسم و يهمس: هريتي مني كده إنتي؟

يبدأ الجميع في مشاهدة الشقة ويبدأ أحمد في الشرح؛ ده
الريسبيشن ياخذ قطعتين كبار أو ثلاثه صغيرين.

يرد الأب: ما شاء الله لطيف جداً دخلوا المطبخ ليسأل أبو
سلمى: إيه ده إنت مشطبه؟

تتدخل ميار أم العريس سريعاً:

ده ذوقي. إيه رأيك يا سلمى في ذوقي؟

ترد أم العروسة: حلوزي الفل ما شاء الله

- لأ انا عايزة أسمع رأي سلمى. شكل ذوقي ما عجبهاش
لترد سلمى: لا إزاي يا طنط حلو جداً وشكل الموديل جديد كمان
حماتها: طب الحمد لله إنه عجبك، كنت هزعل أوي لو ما عجبكيش
شاهدوا الشقة كاملة وعندما انتهوا..

أبو سلمى: الشقة حلوة ما شاء الله يتهنوا فيها بإذن الله
أبو أحمد: الحمد لله إنها عجبتكوا، إيه رأيك نوفر بأه قعدة
الاتفاق نتفق دلوقتي وإحنا واقفين على كل حاجة

أبو سلمى: اللي تشوفه

أبو أحمد: لأ اللي تقولوہ إنتوا

- بص إنت مجوز بنتين قبل كده وزى ما عملت مع بناتك
إعمل مع سلمى.

- خلاص أنا مع بناتي النص بالنص في كل حاجة العفش
والحفلات وكل حاجة، والشبكة دي قيمتنا إحنا بأه هنجيب أحسن
حاجة نقدر عليها، لو حضرتك ليك رأي تاني قوله .

- لأ خلاص مفيش كلام بعد كلامك، على خيرة الله

- خلاص تحبوا نيجي إمتى نقرا الفاتحة، ولا إنتوا تحبوا
نخليها دبل على طول؟

- لا نقرا الفاتحة الأول كده على الضيق لحد ما الولاد
يتعرفوا على بعض أكثر ونبس الدبل كمان شهر كده ولا حاجة.

- عين العقل طيب تحبوا نجيلكم إمتى؟

- خلينا الجمعة الجاية إن شاء الله وتبادل الأسرتان المباركات
والتهاني واستمر أحمد وسلمى يتكلموا في الموبايل كل يوم بليل
شوية حتى ميعاد قراءة الفاتحة، وفي يوم قراية الفاتحة جم
إخوات أحمد وأجوازهم وعيالهم وأخته اللي لسه ما إتجوزتش،
أخواته البنات كانوا حلوين أوي شبه أهمهم؛ بياض وتقاطيع مأنمة
أوي وطول وشياكة كانوا نسبياً أحلى من سلمى، بس أخته

الصغيرة دارين سلمت عليها بحرارة وقالتلها: إيه القمر ده أحمد
عنده حق يتهبل عليكى كده، وأخته الوسطانية كمان كانت فرحانة
بيهم أوي وقعدت تتصور معاهم كتير أوي هي وولادها وجوزها.
الكبيرة بقى سلمت عليها من غير بوس ولا حاجة وفصصتها
بعينها وبعدين سابت مكانها جنب جوزها وراحت قعدت جنب أمها
لتهمس لأمها قائلة: إيه ده يا ماما دي بنت عادية جداً، أحمد
أحلى منها بكتير.

- شوفتي والنبي إنتي الوحيدة اللي بتفهمي زي أمك، بس
هنعمل إيه أرزاق على رأي المثل، المخدة ما تشيلش اتين حلوين.
- تضحك في خبث على كلام أمها وترد: المهم إنه مبسوط.

- أه ما أنا بقول كده برده

أحمد كان جايب لسلمى أنسيال ظريف كده هدية، جيه
يقدمهولها ويلبسها بس هي إتكسفت أوي وخذته تلبسه
لوحدها.

لتهمس الأم إلى بنتها الكبيرة: شفتي ياختي المحن قال ما
يلبسهاش الأنسيال قال.

ثم انصرف الجميع بعد قراءة الفاتحة وذهب أهل سلمى كلهم للنوم بما فيهم سلمى، لقد كان يوماً مجهداً جداً، وما إن ذهب عيناها في النوم حتى رن الموبايل:

- ألو

- ألو إنتي أكيد نمتي

- أه

- بس ما عرفتش أنام من غير ما أسمع صوتك، تصبجي على خير.



الحلقة الرابعة عشر

(من أولها بتكذب أمك عشان خاطرها يا أحمد)

وبعد مرور شهر متواصل من المكالمات الشبيهة بـ:

- لما توصلي الكلية طمنييني

- ولما تروحي البيت طمنييني

ومكالمة قبل النوم الطويلة اللي ممكن تقعد ساعة بيحكوا فيها لبعض راحوا فين وجم منين وكلوا إيه النهاردة وإتكلموا مع مين وبتخلص بإفضل لأ إقفلني إنتي الأول..

كانت سلمى في خلال هذه الفترة لا ترى أحداً غير أحمد، لا ترى مصطفى أو كريم وحتى إن رأتهم قد لا تتذكر ذلك، فنحن معشر الإناث حين يداعبنا الحب لأول مرة نكون في حالة سكر وأصعب سكرات الحب أوله، حالة تجعل ملامح الجميع غير محددة فيما عدا ملامح المحبوب، يجتمع العالم كله في شخصه، في تفاصيله؛ فكلماته التي يسمعها لنا تصبح كالغنوة التي تتردد لا إرادياً بداخل العقل، كانت المذاكرة بالنسبة إليها كجلسات تحضير الأرواح، فيجب أن تغلق الأبواب وتتلو العديد من الصلوات والدعوات لكي تستحضر أي جزء من تركيزها، ولكنها كانت

تحاول جاهدة وهو أيضاً بعد أن يتحدث معها في الموبايل لمدة لا تقل عن الساعة، لا ينسى أن يذيل المكالمة بجملة «سلمى مش عايز علاقتنا تعطلك عن المذاكرة، أنا عايزها تبقى دفعة ليكي للأمام»، بعد هذا الشهر قرروا إنهم جاهزين للبس الدبل وإعلان الخطوبة وتلبس الشبكة وبالفعل نزلت سلمى ومامتها وأحمد ومامته يجيبوا الشبكة والدبل، سلمى كانت متفقة مع مامتها إن هما لو حسوا إن الحاجة اللي عجبت سلمى ما عجبتش أم أحمد تتراجع عنها فوراً عشان ما يفتكروش إن سلمى طمعانة في أحمد ولا حاجة، وبالفعل سلمى نفذت الاتفاق بحذافيره والست رغم إنها غيرانة أوي من لهفة ابنها على عروسته ورغبته الواضحة إنه يجيبها كل اللي نفسها فيه، ولكن أم سلمى كانت بتحاول تحتويها لإنها أم زيتها وحاسة بيها، هي كمان بتموت في وليد ابنها الكبير وعارفة إن اليوم اللي هتجوز فيه ابنها لواحدة هتبقى كل حياته وهي هتبقى نمرة اتنين بعديها هيبقى يوم صعب عليها عشان كده طول الوقت كانت بتاخذ رأيها في كل حاجة وتحسسها إنها أكثر واحدة بتفهم في الذوق والشياكة بعد ما خلصوا لف ودوران، أحمد أصر يقعدوا يشربوا حاجة بالمناسبة السعيدة دي، وما إن جلسوا حتى بدأت أم سلمى في الحوار:

- مبروك يا ميار عقبال ما تفرحي بدارين إن شاء الله.

- شكراً يا حبيبتي إديها ربنا يهديها، ده كل يوم عريس وهي ما بتراضاش.

- هي بنت حلال وإن شاء الله ربنا هيكرمها، بقولك إيه يا أحمد ما تسألنا كده عن أقرب حجز في نادي الشرطة عشان نعمل الخطوبة هناك..

وقبل ما يرد أحمد ترد أمه:

- ولازمتها إيه الخطوبة بره البيت يعني، ما نخلي الفرحة الكبيرة في الآخر بلاش نجيبهم العين.

- أصل سلمى أول فرحتنا بأه، وإحنا حبايينا كتير وما ينفعش نعزم حد و حد لأ.

- بس سلمى يعني متدينة وبتكسف، دي ما رضيتش تخلي أحمد يلبسها الأنسيال في الشبكة، هتقوم بأه ترقص معاه ولا هتعمل إيه؟!

- والله دي حاجة ترجعلها، إحنا اللي لينا نعزم حبايينا ونفرح مع بعض و خلاص.

- لأ طبعا أنا مش هروح أدفع فلوس عشان ابني يقعد مربع إيديه جنبها.

ترد سلمى: مش فاهمة يعني إيه يا طنط حضرتك عايزة

إيه؟

- بصي يا حبيبتي هنعمل خطوبة يبقى تفكي كده وتقومي
ترقصي معاه وتهيصوا وبلاش حركات الكسوف والكلام ده..

ترد أم سلمى: إيه يا مدام أنا بنتي مش بتاعت حركات، أنا
بنتي بتتصرف على طبيعتها.

يرد أحمد: ماما مش قصدها يا طنط هي بس...
تقاطعها الأم: لا بس ولا ما بسش، هنعمل خطوبة يبقى هتقوم
ترقص معاك وتهيصوا، وما بيقاش شكلك قاعد جنبها زي
التلميذ، غير كده تلبسها الشبكة في البيت .

شعرت أم سلمى أنها لو ردت عليها دلوقتي هتبقى سبب في
تدمير الجوازة، فقالتها: عن إذنك يا حجة أنا تعبت من كتر
اللف ومش قادرة أقعد أكثر من كده وخذت سلمى وقامت.

أحمد جري وراهم: إستني يا طنط أوصلكم.

الأم قالتله: لأ خليك مع مامتك ومشيووا.

كانت سلمى تشعر أن ما حدث أكيد كابوس، أكيد ما حصلتش
مشكلة على حاجة هايفة زي دي، وما إن وصلت البيت حتى بدأت
في انتظار أحمد ليكلمها ويحكيها عن تطورات الموقف، ولكنه لم
يتصل حتى انتهى اليوم.

ننتقل إلى المشهد في بيت أحمد، دخلت الأم الشقة لتجد زوجها جالساً يشاهد التلفاز وتبدأ كلامها بانفعال: شفت الهانم اللي ابنك اشتراها أحسن شبكة سابتتي ومشيت هي وأمها عشان بقولها ما لهاش لازمة خطوبة عشان هنجيب للعيال العين. أحمد: يا ماما مش كده، يا ماما إنتي اتهمتيها إنها بتمثل الكسوف وشرطي عليها يا تعمل اللي إنتي عايزاه في الخطوبة، يا إما ماتعملش خطوبة.

- من دلوقتي يا أحمد بتكدبني عشانها لم يستطع أن يكمل أحمد الحوار واتجه غاضباً إلى غرفته لتكمل الحوار مع زوجها: الهانم بقولها فكي نفسك شوية في الخطوبة مع عريسك تروح أمها مقموصة وواخداها وماشية وابنك يقوم يجري وراهم ويسيني.. - معقولة لأ طبعاً إزاي تبقوا لسه جايبينهم الشبكة ويمشوا ويسيبوكم؟!

- أهو اللي حصل ابنك عندك خش إسألته دخل الأب واستبين حقيقة الموقف من ابنه، ثم حاول أن يشرح لزوجته أنها بمثل هذه الأفعال سوف تكسر من فرحة ابنها، ولكنها كانت غاضبة جداً وزاد هذا الغضب أن أحمد لم يخرج من غرفته طوال اليوم، وفي اليوم التالي عاد من العمل ولم يخرج من غرفته أيضاً، كان هذا بالنسبة لها عقاباً قاتلاً، فهي قد

تحتمل أي شيء إلا خصام أحمد الولد الحيلة، دفعها هذا إلى اللجوء لأخذ مشورة ابنتها الكبرى وبعد مكاملة اقتربت إلى الساعة قررت الأم الآتي بعدما عاد من العمل في اليوم التالي. نقرت الباب ودخلت الغرفة:

- أحمد إنت لسة زعلان يا حبيبي؟

- إنتي شايفة المفروض أعمل إيه بعد ما إشتريت شبكتي وبدل ماتباركيلي وتفرحيلي روحتي عملتي مشكلة ونكدتي عليا

- كده يا أحمد أنا بنكد عليك، اللي تشوفه يا حبيبي

- يا ماما ماكانش ليه لازمة الكلام ده كله..

- إنت أغلى حاجة عندي في الدنيا ومش هقدر أزعلك خلاص هعملكوا أحسن خطوبة وهدية مني كمان بس خليها تكلمني تراضيني بكلمتين كده حفظاً لماء وجهي، دي سابتي ومشيت في الشارع.

- حاضر يا ماما مع إنها مش المفروض تكلمك بس سلمى غلبانة ومش هتقول حاجة، ابتسمت الأم ابتسامة صفراء وهمست لنفسها، أما نشوف.



الحلقة الخامسة عشر

(ماما أنا زعلان يا ماما)

الاهتمام هو نوع من الإدمان، فما إن نعتاد أن يهتم بنا أحدهم حتى نصبح إحدى ضحايا هذا الإدمان، فما إن يغيب هذا الشخص نبدأ في الشعور بأعراض انسحاب، تشبه لانسحاب المخدرات من الجسد وهذا ما حدث لسلمى، فما إن توقف أحمد عن مكالمتها وطلب منها أبوها أن لا تبدأ هي بالاتصال به منذ حدوث موقف حفلة الخطوبة، وهي تشعر برعب فظيع تسأل نفسها؛ هل من الممكن فعلاً أن ينتهي الموضوع بهذه البساطة؟! لقد كان يفرض لها في التعبير عن حبه وتعلقه بها، هل استطاع فجأة أن يستغنى عنها بكل بساطة ثم تعود لتطمئن نفسها، أكيد يحل المشكلة مع مامته وهي متصل بس وحشها أوي مكاملة بليل، وحشها تحس إنها موجودة وحد بيسأل عليها وبينما هي تفكر يرن الموبايل:

- ألو أحمد

- إزيك يا سلمى

- بقالك يومين ما كلمتيش يا أحمد

- أنا كنت متضايق أوي يا سلمى وبعدين كنت هكلمك، أقولك
إيه وأنا لسه ما وصلتش لحل مع ماما؟!!

-كلمني إسأل عليا، شوفني عاملة إيه، إظمن عليا كويسة ولا
زعلانة، ما تسينيش آخد وأدي كده مع نفسي لحد ما كنت
هتجنن..

- أنا كمان كنت هتجنن يا سلمى، أنا عارف إن مامتك ممكن
تعمل موضوع الخطوبة ده مشكلة، هي عايزة تعمل حفلة كبيرة
وماما ما كانتش راضية و.....

تقاطعه سلمى:

- أحمد مش مهم ماما ومامتك، المهم إن أنا وإننت في أي
مشكلة نبقى جنب بعض نسند بعض، أي حاجة هتعددي أسهل لو
عدناها مع بعض..

-حاضر يا سلمى، آخر مرة هعمل كده المهم ماما وافقت على
موضوع الحفلة وكل اللي إنتي عايزاه هيتعمل..

- إيه ده بجد إزاي؟

- مفيش يا ستي هي لقيتتي زعلان ومتضايق قالتلي خلاص
هعملك اللي إنت عايزه يا أحمد، ماما ما تقدرش تشوفني زعلان
يا بنتي.

- طب كويس

- سلمى

- نعم يا أحمد

- معلى كلى ماما كده وسلمى عليها وقوليلها كلمتين حلوين
راضيه برده، هي بتقول إن إنتى قومتى وسبيتها وزعلانة شوية
- أحمد مامتك كان كلامها صعب جداً و.....

يقاطعها أحمد: سلمى أنا عارف، بس معلى عدى الموقف ده
عشان خاطري أنا، خلىنا نفرح ونعمل أحلى خطوبة

- حاضر يا أحمد

- يلا كلميها وكلميني

تغلق معه وتتذكر: إيه ده؟! ده أنا معيش رقم طنط ميار،
هروح أجيبه من ماما، كانت أمها تجلس مع أبيها يشربون الشاي.
- ماما أحمد اتصل وبيقول إن طنط ميار وافقت على
الخطوبة بس عايزنى أكلها أراضيه بكلمتين.

- تراضيتها؟! دي ست جبروت بس هنعمل إيه

الولد كويس ويستاهل تيجي على نفسك عشانه..
ينظر لها أبوها ويسألها:

- هو كان فين اليومين اللي فاتوا ما كلمكيش ليه؟

- قالي كان متضايق وما كانش بيكلم حتى مامته وكان مستني
يحل المشكلة ويكلمني.. الأب: وحلها إزاي؟

- تبتسم وتقول مفيش يا بابا، أصل طنط ما بتستحملش زعله
ولما لقيته متضايق أوي كده قالت تعمله اللي هو عايزه.

- الأب: طيب وإنتي مش ملاحظة حاجة؟!

- إيه يا بابا؟

- الأب، مش ملاحظة إنه إتعامل معاكي بنفس الطريقة برضه
إتضايق وما قدرش يكلمك، ولو كنتي إنتي كلمتيه الأول قولتيله
إن إنتي خلاص مش عايزة خطوبة، كان راح قال لمامته خلاص يا
ماما سلمى مش عايزة حفلة وكان ده برده هيبقى حل للمشكلة.

- أومال إنت كنت عايزه يعمل إيه يا بابا؟

-يواجه يا سلمى، يحاول يقرب وجهات النظر ما بينكوا
يحاول يقنعها إن حفلة الخطوبة شىء مهم بالنسبة ليكي

أو حتى يحاول يقنعك إنتي إن الخطوبة مش مهمة، لكن ما يقعدش يتفرج ويستتى واحدة فيكوا تبادر هي بالحل. لحظة صمت وكأن يعطيها أبوها فرصة لتستوعب الكلام ثم يستكمل كلامه:

- يا بنتي الإنسان اللي مش بيواجه ده هيتعبك إنتي أوي وخصوصاً إن مامته متعبة ومش هتبتل مشاكل، وأنا أراهنك إن هي اللي طلبت منه إنك تكلمها تراضيها عشان تحط مبادئ للعلاقة..

- إنت شايف إيه يا بابا؟

- شايف إنك لو كلمتها تراضيها وإنتي أصلاً ما غلطتيش معاها في حاجة يبقى هتفضلي طول عمرك تراضي فيها..
تتدخل الأم: فيه إيه يا عبده ما تكبرش الموضوع، ده شيطان ودخل الموضوع أبسط من كده بكثير.

الأب ينظر إلى الأم: سيبيني أقول اللي عندي عشان ما تجيش في يوم أو بعد ما أموت تقول الله يسامحك يا بابا ما نبهتتيش، ثم ينظر إلى ابنته: بصي يا بنتي أنا قولتلك اللي عندي، فكري فيه كويس أنا عارف إن الأحلى والأسهل إنك تكلمها دلوقتي تراضيها وتعملي خطوبتك وتفرحي، وعارف إن معنى إن إنتي ما تكلمهاش إنها هتكبر المشكلة وتطلعك وحشة، وهفضل تقومه عليكي لحد

ما يسيبك وفي الحالة دي يبقى نسيبه إحنا أحسن، فكري يا بنتي وأنا موافق على القرار اللي هتاخديه ..

كان هذا الكلام صادماً بالنسبة لها، ولكن لم يكن أمامها خيار آخر غير التفكير طوال الليل.. بابا عنده حق إزاي فعلاً أحمد يسيبني في الحالة دي وما يكلمنيش يسأل عليا، ومامته دي أنا فعلاً ما غلظتني فيها عشان أعتذرلها بس برده أنا مش عايزة أرجع وحيدة تاني، أنا إتعودت إن أحمد يسأل عليا كل يوم، إتعودت إن فيه حد مهتم بوجودي بس ما ينفعش إن بعد ما بابا يقولي الكلام ده، أقوله لأ أنا عايزة أكمل برده، بس أنا لو روحت لبابا وقولتله أنا مش عايزة أكمل هيناقشني وماما هتتدخل مش هيروح يقول للناس كده على طول، وحتى لو قال كده أحمد هيسأله عن الأسباب ومش هيوافق كده على طول، وبعد التفكير طويل صحيت سلمى في اليوم التاني وقالت لباباها: خلاص إنت عندك حق.

-عين العقل يا بنتي ومسك الموبايل

-ألو إزي حضرتك يا كمال بيه

- أهلاً يا بشمهندس خير أكيد في حاجة ضروري مخليه

حضرتك تكلمني بدري كده؟!؟

- معلى يا سعادة اللواء كل شىء قسمة ونصيب

- لىه بس يا بشمهندس؟!

- دي رغبة سلمى وأنا ما أقدرش أغضبها على حاجة

- لا طبعاً ما ينفعش

- ربنا يرزقوا الأحسن

- مع السلامة

- مع السلامة



obeikandi.com

الحلقة السادسة عشر (لمت ما بعد فشكتة الجوازة)

بعد ما الخطوبة بتتفشكل أو الجوازة تفكس البنت بتعيش
مرحلة نفسية صعبة بيحصلها فيها الآتي:

بتفضل مستتية العريس يرجع ويحارب الدنيا عشانها بس
ما بيرجعش.

تفضل تعيط طول الليل وتصحى تمسح وشها ولا كأن في
حاجة، إحنا كده أكثر شيء ممكن يدبحنا إن إحنا نبان زعلانين
على حد سابنا مهما كان ده حقيقي.

بنحاول نبعد عن كل اللي بنحبهم عشان هيكتشفوا على طول حالة
الضعف اللي إحنا فيها بس هما بيقتحمونا وييداووا وجعنا غصباً عنا
وعشان كده أي بيت بيكون في بنت زعلانة عشان العريس طار
بتحصل فيه قعدة زي اللي أهل سلمى هيعملوها لها دلوقتي.

وليد ينقر على باب غرفة سلمى: سلمى إطلعي إحنا جنبنا
البيتزا اللي بتحبيها مش هناكل غير لما تيجي. تفتح سلمى
الغرفة: مش قادرة أنا عايزة أنام يعلي وليد من صوته: مودي
إنده بابا وماما وتعالى ناكل عند سلمى ونزلبها الأوضة.

- لأ لأ خلاص أنا طالعة معاك

- الأب: سلمى أنا خليت وليد يجيبك البيتزا مخصوص
عشانك يا حبيبة بابا.

الأم: ما خلاص بأه يا سلمى إيه اللي إنتي عامله ده؟

هو صحيح أنا كنت هتجنن أكثر منك على الجوازة، بس
أبوكي عنده حق أمه صعبة أوي يا سلمى.

الأب: عارفة يا سلمى لو كنتي إتجوزتيه ما كنتيش هتفضلي
زي ما إنتي؛ كانوا هيغيروكي كان لازم تتوحشي عشان تعريفي
تتعاملني معاهم، كان قدامك حل من الاتنين؛ يا إما تصبري لحد
ما تتجوزيه وبعدين تستقطي الولد ليكي تماماً وبعدين تبعديه
عن أمه تماماً، وفي الحالة دي هيبقى حرام عليك، يا إما هتفضلي
طول عمرك تراضي فيها وفي الحالة دي يبقى حرام عليا أخليكي
تكملي.

- إنتوا عارفين أكثر حاجة مضايقاني إيه؟

كلهم في صوت واحد: إيه؟

أنا ما كنتش فاكرة الموضوع هيخلص ببساطة كده، كنت
فاكراه هيجي ويناقدش ويقول أنا ما قدرش أستغنى عن سلمى،

ده كان بيقولي كلام كتير أوي و..... تبدأ أن تدمع عيناها بشكل
لا إرادي

الأم تاخدها في حضنها: إنتي بتعطي على إيه يا هبله يا بنت
الهبله ما توجعيش قلب أمك يا سلمى.

-الأب:يا بنتي أحمد مش بتاع الكلام ده ولو كان بتاع الكلام ده
ما كنتش خليتك تسيبيه، ده زمانه قاعد في أوضته زعلان لحد ما
يصعب على مامته، وتيجي تقوله خلاص أنا هروح أصالحهالك أو
تقعد تقوله، شفت إزاي سابتك في أول مشكلة حصلت مش قولتلك
عشان بس تسمع كلام أمك..

وليد:أمه كانت صعبة أوي يا سلمى

سلمى: أه فعلاً

وليد: بس أمه دي هتلاقيها وهي صغيرة كانت حلوة أوي زي
إخواته البنات كده.

الأب بتعجب:ولد يا وليد..

شعر وليد بالخجل، حس إنه بيقول كلام في وقت مش مناسب
ويرد في صوت ضعيف: نعم يا بابا..

- إنت طلعت ذوقك عالي زي أبوك يا ولا، ده أنا كنت فاكرك ما بتفهمش، لأ فعلاً أمه حلوة وإخواته أحلى.

- أه يا بابا، دارين كان حقها يبقى اسمها قمرين، شمسين، ناري نارين، أي حاجة، بس كانت أكبر مني. تنظر الأم إلى زوجها بتعجب:

-تصدق إنت وابنك ما عندكوش دم، ده بدل ما تزعلوا وبعدين أمه مش حلوة أوي يعني.. لا تملك سلمى نفسها من الابتسامة، وهي منتظرة رد الأب:

- يا ستي بهزر، هو فيه حد أحلى منك يا سمسمة إنتي يا قمر يا أم العيال.

- بجد يا عبده وتظن بدلع، يعني إنت لسه شايفني حلوة؟

- وليد: إيه يا عبده ما تهدى شوية، إحنا عاملين الليلة دي عشان سلمى، مش عشانك إنت والمدام.

وينظر إلى سلمى وهي مبتسمة، وهي تشاهدهم فهم جعلوها تبتسم بجد، هي بجد للحظات نسيت الموضوع.

الأب: طب إيه يا سلمى مش هتشاركي بأي حاجة في الليلة دي سلمى: والله يا بابا إنتوا بجد غيرتولي مودي بس أنا عارفة إنني هاخذ فترة عشان أخرج من المود ده..

الأب: سلمى خرجي نفسك بسرعة ما تخلّيش الأيام الحزينة في عمرك كثير، فجأة هتبصي تلاقي نفسك كبرتي وعمرك عدى وهتقعدي تراجعيه، لو لاقيتي إن إنتي قدرتي تعيشيه في سعادة هتبقي مبسوطة، لكن لو لاقيتي إنك ضعيتيه في النكد ساعتها بجد هتدمي ودايماً يا حبيبتي أو في معظم الحالات ربنا ممكن يخليكي تقابلي الشخص اللي مش مناسب الأول، عشان لما تلاقي الشخص المناسب تمسكي فيه بإيديكي وسنانك وتقدره. الأم: وبعد كده يا سلمى طول ما إنتي لسه في بيت أبوكي وهو في بيت أبوه دايماً خلي عندك احتمال إن الموضوع ما يكملش عشان ساعتها القرار ما بيقاش راجع ليكوا إنتوا بس، أهلك وأهله بيبقى ليهم دور كبير في أي قرار وغالباً الأهل هما اللي بيكسبوا لو حصل أي مشكلة، ما حدش بيخسر أهله عشان حد لسه عارفه بقاله كام شهر مهما كان الحد ده غالي عنده.

سلمى: صح يا ماما إنتي عندك حق

وليد: سلمى إنتي أكيد إتعلّتي كثير في المذاكرة الفترة اللي فاتت طالما الجوازة باظت بأه يبقى أقل حاجة تحافظي على مستواكي.

الأب: سلمى أنا عايزك قوية مش أي مشكلة تقابلك مهما كانت كبيرة تأثر عليك في دراستك أو في شغلك ولازم تتعلمي تفصلي في حياتك الشخصية وحياتك العملية عشان تبقي

ناجحة في الاتنين واعرف في إن إحنا على طول جنبك في ضهرك.
سلمى: ربنا يخليكوا ليا يا بابا إنتوا فعلاً هونتوا عليا أوي..
إتعشوا ودخلت سلمى تمام واتفقت مع نفسها إن الليلة دي هتسمح
لنفسها تعيط على موضوع أحمد ورجوعها وحيدة لآخر مرة
وبكرة ترجع سلمى اللي هي عارفها تاني.

صحيت سلمى تاني يوم راحت الكلية كأن كان بقالها كثير ما
شافتهاش، موضوع الخطوبة كان مخليها سرحانة وهيمانة طول
الوقت فاصلها عن كل حاجة، صحيح كان إحساس حلو بس ده ما
يمنعش إن حياتها وحشتها.. أول سيكشن كان هيشرحوا د.كريم..
دخل يشرح وقعدت تبصله كأنها بقالها كثير أوي ما شافتوش
وفي آخر السيكشن أعلن عن امتحان مفاجئ في النظري
الدكتور عامله يقيم بيه الطلبة.. وزع الورق د.كريم وهو
بيوزع قال لسلمى: طبعاً إنتي مش هياخذ في إيدك دقيقة.
ابتسمت سلمى ابتسامه بلهاء، هي عارفة إن ده مش حقيقي، هي
بقالها كثير مش بتذاكر كويس أوي وردت عليه:

- هو حضرتك اللي هتصحح؟

- لأ دكتور مصطفى

همست لنفسها: يا سوادك يا سلمى..



الحلقة السابعة عشر

(أدي أخرة اللي تحب في التليفون)

وضعت سلمى ورقة الامتحان أمامها، تبدو الأسئلة مألوفة بالنسبة إليها ولكنها لا تستطيع أن تجيب بدقة، تحاول جاهدة أن تتذكر ما ذاكرته بدون إتقان، لكنها لا تستطيع أن وتراودها هذه الأفكار..

- منك لله يا ميار لا خلّيتني أذاكر عدل ولا إكتبلي أتخطب

- بس أحمد كان كلامه حلو أوي

- يا بت ركزي حاولي تحلي أي حاجة

- أيوة صح المفروض أركز

- أه السؤال ده كنت بذاكره لما أحمد كلمني بليل

- يخربيت أحمد وسنينه على اللي جايبينه

- هتتضحّي يا موكوسة

- دكتور مصطفى مش بعيد لو شافني يقرف يسلم عليا بعد

الامتحان، وظلت هكذا تارة تفكر في الحل وتارة تحدث نفسها

بصوت منخفض إلى أن انتهى الوقت وحلت ما استطاعت، سلمت

الورقة وهي خارطة قابلت د.مصطفى هيشرح للسيكشن اللي
بعديهم ..

- عملتي إيه يا سلمى؟

ارتبكت واخلببت في الكلام:

- عملت حلو في الجميل جداً نظر لها بتعجب :

- عملتي حلو في الجميل جداً إزاي؟!

- قصدي عملت حلو جداً

- خلصي السكاشن وروحي نامي يا سلمى، شكلك محتاجة

تنامي ..

-أه فعلاً هروح أنام عادت سلمى إلى منزلها بعد يوم طويل تحاول
أن تذاكر ولكن لا يزال الموضوع صعب وجلست تفكر .. أنا الأحسن
إني أروح أطلب من د.مصطفى إنه ما يندهش درجة نتيجة الامتحان
في السيكشن مع باقي الدرجات بصوت عالي أو يحجبها يعمل أي
حاجة، الناس هتقول إيه جالي تخلف عقلي، أنا بجد شكلي هيبقى
وحش جداً .. وبالفعل توجهت سلمى إلى د.مصطفى في اليوم التالي ..
لا يرحب بها كالعادة بل تعمد أن يتعامل كما إنه لم يلحظ دخولها
إلى الغرفة، فكان عليها أن تنبهه عند وصولها إلى المكتب فتده
بصوت منخفض:

- دكتور مصطفى..

- نعم في حاجة؟

- هو أنا عملت إيه في الامتحان إمبراح؟

- مستعجله على إيه؟ هننده الدرجات في السيكنشن المرة الجاية

- لا ما هو أنا حضرتك يعني جايه عشان ما تندهش

الدرجات يعني أودام زمايلي أصل.....

- إنتي طبعاً يهملك إن ماحدث يلاحظ إن مستواكي نزل

بالشكل ده..

- أه طبعاً، يعني يا دكتور أصل أكيد نظرتهم ليا هتتغير

وهيقعدوا يقولوا سلمى ما بقيتش زي الأول والحوارات دي..

- طب إنتي مش زعلانة عشان الدرجات اللي ضاعت منك

في الامتحان؟!

- لأ طبعاً زعلانة، بس أنا أصلي كنت تعبانة جداً الأسبوع

اللي فات

- ألف سلامة يا سلمى، خير كان مالك؟

- أه ما أنا هقولك كان عندي دور برد ربنا ما يوريك والدكتور

قالني لازم تنامي وما تتعبيش نفسك..

- طب ده كده المشكلة إتحلّت، هاتي الروشّة تثبت إنك كنتي تعبانة وأنا ممكن أكلمك د.عمر يعملك استثناء ويعيدلك الامتحان.

- أه ما أنا هقولك، أصل أنا إمبارح وأنا مروحة شنطتي إتسرقت وكان فيها الروشّة ..

- كل ده حصلك؟! إتسرقتي وتعبتي التعب الجامد ده،؟! كل ده الأسبوع اللي فات؟! طب ما طلعتيش الفضاء بالمرّة!!!

- نعم!

- سلمى إنتي مش محتاجة تألّفي الحوارات دي كلها، أنا ماليش حاجة عندك أنا مجرد كنت بقدر طالبة كانت متفوقة عندي وبحاول أساعدها.

- كانت متفوقة!

- أه كانت، بالمستوى ده إنتي مش هترتبي على الدفعة، ده إنتي لو جيبتي جيد جداً هيبقى كويس، بعد إذنك يا سلمى أنا عندي سيكشن

- إتفضل

وقفت سلمى محبطة وحيدة في الغرفة شعرت فعلاً إنها
هتخسر كل حاجة بسبب الموضوع اللي حصلها، بينما تخرج من
الغرفة يبدو عليها الحزن، قابلها على باب الغرفة كريم:

- إزيك يا سلمى

- كويسة

- مالك بتقولها وإنتي زعلانة كده ليه؟!

- أنا، واضح إنني حليت وحش أوي في الامتحان

- طب خلاص شدي حيلك وعضي بأه

- يعني حضرتك شايف إنه ممكن؟

- أه طبعاً يا سلمى، كل واحد ممكن يحصله drop بس

الشاطر اللي يلحق نفسه

- ترد بسعادة: بجد؟!

- أه بجد عادي يعني

- والله إنت طيب جداً وعسول جداً وربنا يكرمك جداً

- ينظر لها بابتسامة وكان يبدو وسيماً كالعادة: إيه عسول دي!

- لأ واللهي مش قصدي..... لا ما تبصليش كده، ده أنا مش

ناقصة ده أنا هسقط من غير حاجة..

- يا بنتي أنا كلمتك ولا جيت جنبك؟!

- منك لله يا ميار

- نعم؟!

- لأ ولا حاجة، سلام

- سلام

يكلّم نفسه وهو يضحك: هي مالها دي كمان ما كانت عاقلة وراسية. الجدير بالذكر إن البنت بعد أول بومبة أو مقلب في حياتها بيحصلها كده حالة مؤقتة من عدم الاتزان بتخلي دمها خفيف، اللي بييجي على بالها بتقوله، ده غير إن نظرتها للتعامل مع الرجل بتختلف، قبل التجربة دي معظم البنات بتبص للرجل أو الشاب اللي أودامها على إنه حاجة مجهولة، ما بتبقاش عارفة تتعامل معاه إزاي، ما بتبقاش على طبيعتها لكن بعد كده بتكتشف إنه زيه زيها، بالعكس ده هي ممكن يكون مخها وتفكيرها أحسن منه ميت مرة وده بيخليها تتعامل معاه ببساطة أكثر بدون ما تفكر، يا ترى اللي أودامها رأيه إيه في طريقته في التعامل؟!

المهم نرجع للقصة.. سلمى روحت البيت وهي مكتئبة جداً، هي فعلاً ممكن ما تلحشش تعوض اللي فاتها، بس افكرت كلام كريم وإنها ممكن تعوض ودعت ربنا إنه يساعدها وإتوكلت على الله

وبدأت مذاكرة بجد، ثاني يوم كان عندها محاضرات و دكتور عمر طلب إنه يشوفها بعد المحاضرة..

- إزيك يا سلمى

- الحمد لله

- سلامتك د.مصطفى قالي إنك كنتي تعبانة وما عرفتيش تحلي كويس في الامتحان..

- إنتفاجأت ولكنها أسرع في الإجابة: أه فعلاً يا دكتور

- طب يا سلمى إنتي طالبة شاطرة جداً، ولو حصلك ظرف مرة من حقك إنك تاخدي فرص ثانية لأن إنتي من الأوائل وأي درجات بسيطة ممكن تأثر على ترتيبك، تعاليلي المكتب كمان أسبوع وعيدي الامتحان عشان ما تضيعش عليكي درجات..

- أنا متشكرة جداً يا دكتور ربنا يخليك..



obeikandi.com

الحلقة الثامنة عشر (حالة ما بعد فك الارتباط)

خلاص كده كالعادة دايماً بيظهر اهتمامه بيها في آخر الموقف بس هو دايماً بيبرر لنفسه الاهتمام ده بإنها بنت شاطرة وتستاها إنه يقف جنبها، وإن الواحد لازم يساعد الناس عشان ربنا يساعد وأي هري كده مع نفسه، يمكن لأنه من جواه خايف تكون لسة مبهورة بكريم زي أول مرة إتكلم معاها فيها أو خايف إنها ما تكونش بتبادل نفس الإحساس بالانجذاب اللا إرادي اللي هو حاسه تجاهها، المهم إنه أصر يتجاهل مشاعره تجاهها إلا إنه ما كانش يقدر يتأخر عن أي مساعدة يقدر يقدمهاها، يزعل أوي لو حس إنها مش مركزة في مذاكرتها، بيفرح أوي لما يسمع حد من الدكاترة بيشكر فيها وفي ذكائها، المهم هي روت البيت فكرت تروحه تشكره ولا تطنش هي حاسه إنه مهتم بيها، بس هي مش حاسة إنه بيكون مبسوط لما بيشوفها ما بيهزرش ويضحك زي كريم سلمى محتاجة تتكلم مع حد:

- ألو هبة

- سلمى إزيك يا حبيبتي، عاملة إيه أنا كنت عايزة أكلمك بعد
ما طنط إديتي الأنسيال أرجعه لأحمد، بس قلت أخليكي براحتك
أنا عارفة إن إنتي ممكن تكوني حابة تبقى لوحداك شوية..

- تعاليلي يا هبة

- حاضر هعدي عليكي بعد الكلية دخلت هبة بعد أن سلمت
على الأسرة كاملة لسلمى الغرفة

- مالك يا سلمى؟

- أنا تعبانة أوي يا هبة

- عادي يا حبيبتي شوية وهنتسيه وهترجعي أحسن من الأول

- هو مين ده؟

- أحمد

- الموضوع مش أحمد، بصي يا هبة أنا عندي في الكلية معيد
اسمه مصطفى بيعمل حاجات كتير أوي كويسة معايا وبيساعدني
وبيوجهني، بس عمره ما عبرلي عن حاجة، أسلوبه جد جداً معايا
في كلامه.

- تمام

- هو إيه اللي تمام

- طالما عمره ما عبرلك عن حاجة يبقى ما تشغيل نفسك
بييه خالص ممكن يكون في حاجة، وممكن ما يكونش في حاجة
وممكن يكون في حاجة بس شايف إنك مش مناسبة لظروفه،
يبقى برده كأن مفيش حاجة.

- طيب بيعمل كده ليه؟!

- ما أنا قولتلك ممكن يكون في حاجة وممكن يكون بيحب
يساعد الناس عادي، يعني المهم ما تحطيش في دماغك عشان
عادي جداً فيه بنات كتير بتسرح زيك كده، وبعدين تلاقي فجأة
دبلة في إيده تتصدم بأه وهو أصلاً ما كانش في حاجة..

- طيب بصي بأه يا هبة..

- المعيد ده بأه معاه زميله في نفس القسم حاجة كده المادة
الخام للعسلية والشوكولاتة، حاجة كده تفتح النفس شياكة وخفة
دم وحضور وكل حاجة نفسك فيها هتلاقيها عنده..

- لا والله؟!

- أه والله يا هبة حاجة كده من اللي لما تبصك بصة جسمك
كله يسيب، ما إنتي عارفة هو أنا عمري قولتلك كده على حد؟!
يبقى لما آجي أقولك صدقيني..

- يا حبيبتي ما أنا مصدقاكي بس عايزة أسألك سؤال، هما
مش المعيين دول أودامك من مدة كبيرة؟

- أه

- طيب إشمعنا فجأة كده بتفكري فيهم كثير؟

- مش عارفة، عادي يعني

- عارفة ليه يا سلمى؟ إنتي بتعاني من حالة ما بعد فك
الارتباط، كلنا بنعدي بالحالة دي بنكون عايزين ننسى الحد اللي
كنا مرتبطين بيه بسرعة، بنحاول نتجاهل مجرد التفكير فيه،
بنحاول نعتبره كأنه كان مش موجود ونحاول نملا مكانه بأي حد
متاح أودامنا، عشان كده إنتي فجأة بدأتي تفكري في اتنين كانوا
أودامك بالفعل قبل ما توافقني ترتبطيني بأحمد..

- طيب وإيه الحل؟

- عارفة يا سلمى إيه أحسن حل بالنسبة لأي بنت في المرحلة
دي؛ إن هما يعملولنا مكان نتعزل فيه عن الرجالة لحد ما نفسيتنا
تهدا ونعدي مرحلة ما بعد فك الارتباط..

- مش للدرجة دي

- بصي يا سلمى إنتي أي حد دلوقتي هيقولك صباح الخير
أو يتقرب منك هترتاحيله بسهولة جداً حتى لو مش مناسب ليكي،

إنتي مش في مرحلة مناسبة إنك تفكري في حد، إعزلي نفسك
بنفسك يا سلمى ..

- أعمل إيه يعني؟

- إعزلي مخك في المذاكرة لحد ما تبقي مستعدة بجد تفكري
في حد جديد، إنتي طول عمرك شاطرة يا سلمى ركزي وإبتي
لنفسك إن مفيش حد قدر يآثر عليكى وينزل من مستواكى، عشان
تفضلي طول عمرك تحترمي نفسك وما يجيش يوم تحسي إنك
هايفة ..

- طيب ومصطفى لسه عامل معايا موقف جدعنه جامد، أشكره
ولا لأ؟

- لأ طبعاً لازم تشكركه بس بأقل احتكاك ممكن يعني مش
لازم تروحيله، كلميه في التليفون لو معاكي تليفونه، ولو تقدرى
كمان تبعتيه على الواتس من غير ما تكلميه يبقى أحسن.
وفعلاً مسكت سلمى التليفون وبعته:

أنا متشكرة جداً على فكرة يا دكتور
رد عليها:

- عفواً جداً، على فكرة يا سلمى بس يا ريت تكوني فعلاً
جديرة بإنى كدبت على دكتور عمر عشانك .. بصت لهبة قالتها:

أرد عليه أقوله إليه؟

- قوليله حاضر يا دكتور إن شاء الله وردت عليه وخلص الموضوع على كده ومشيت هبة وفعلاً سلمى بدأت تعزل نفسها وتهرب من كل حاجة لمذاكرتها، كان فيه حاجات كتير مذاكرها أي كلام مش زي ما هي متعودة، بس طحنت نفسها أكثر في المذاكرة وبعد مرور ثلاث أسابيع تقريباً من فركشة موضوع أحمد.. سلمى رجعت البيت في يوم لقيت مامتها مبسوفة والفرحة هتتط من عينيها وقاعدة في الصلاة بس ما كلمتهاش في حاجة وهما قاعدين يتغدوا كلهم، مامتها فتحت الموضوع:

- عارف مين كلمني النهاردة يا عبده؟

- مين يا سمية؟

- ميار

- توقف الجميع عن تناول الطعام ونظروا إليها.. بتبصولي كده ليه؟! إتكلمت النهارده وقالتي سلمى وحشتني وعايضة تيجي هي وأحمد تسلم عليها..

- ينظر الأب إلى سلمى ويقول: إيه رأيك يا سلمى؟

- تنظر سلمى إليهم وتقول: معقول؟!

- ترد أمها: هو إيه يا بنتي اللي معقول؟! عادي مش معجزة

يعني الولد مصر عليكى وأمه استجابت لرغبته، عادي بتحصل
يعني.

- لأ قصدي معقول حابس نفسه في أوضته كل ده ومخاصمها
وما بياكلش من أكلها؟! يا خلاشي ده بيحبني أوي.

- إنتي بتتريقي ياختي، مالك يا حبيبتي شادة حيلك كده
ليه؟! مش من كتر العرسان يعني إحمدي ربنا إنه رجع.

- ينظر الأب إلى زوجته بغضب: عارفة لو قولتلها كده تاني
بجد يا سمية أنا فعلاً هزعل منك أوي وبتكلم جد فعلاً هشيل
منك..

- تشعر الأم بإحراج شديد ولا تجد ما تقول، يبدو أن كلامها كان
قاسي ولكنها لا تدرك، هي لا تفكر في شيء إلا أن تطمئن على بنتها..
تنظر سلمى إلى أبيها في أسى:

- يا بابا، ماما مش قصدها هي بس فاكرة إنها كده
هتطمئن عليا وتتنظر إلى أمها: ماما أنا مش عايزاكي تزعلي أو
تتخانقي معايا أو مع بابا، بس إنتي تضمنيلي إن ميار دي مش
هتعمل مشكلة على أي حاجة هايفة تاني، وحتى لو مسكت نفسها
لبعد الخطوبة هتمسك نفسها طول العمر، وبعدين ابنها مش
قوي كفاية عشان يعرف يفصل ما بينا، وهنفضل طول عمرنا في
مشاكل، أنا نفسي يا ماما لما أرتبط الارتباط يكون مصدر لسعادتي

مش لقلقي، عشان خاطري يا ماما إنتي ما تعرفيش أنا تعبت
قد إيه وفكرت في إيه بعد ما فرکشنا المرة اللي فاتت، أرجوكي
ما تخلينيش أعيد التجربة مرة تانية أنا أخذت وقت كثير أوي
عشان أعرف أرجع زي ما كنت الأول قبل ما أعرف أحمد..
-ينظر إخوان سلمى وأبوها إليها بتعجب ثم يرد عليها وليد:

- إيه يا سلمى الكلام الكبير ده، إيه الحلاوة دي، إيه احتواء
الآخر ده، إيه يا بت الحلاوة دي!

الأب: أنا مبسوط منك أوي يا سلمى إنك واخدة قرارك مع
نفسك وواخده صبح، و بناءً على أسباب منطقية مش كل تفكيرك
إنك تردي لميار القلم اللي إديتهولك وخلص.

- عادي يعني يا بابا أي حد طبيعي لما بيتمر بتجربة لازم
يستفيد منها..

- لأ مش أي حد، دي نعمة من ربنا لازم تشكره عليها..
تنظر إليها الأم:

- يعني أنا اللي طلعت وحشة وما بفهمش في الآخر، ماشي
ياختي خليك على هواكي، المهم إنك مبسوطه إنتي وأبوكي،
تتحرق ميار.



الحلقة التاسعة عشر

(بيحبها وناوي يقولها)

هي لا تتكر أن معاودة ميار الاتصال أعطاها شيء من الفرحة والثقة بالنفس، ولكن الشحنة النفسية اعطتها دفعة أقوى في المذاكرة، كانت امتحانات الترم على بعد أيام، هي كانت تعمل بكل كد حينما كانت ترى مصطفى كانت تسلم عليه من بعيد لبعيد، لم تستوقفه للحديث معه إلا مرة أو مرتين للاستفسار عن استفهامات حقيقية قررت إنه إذا كان لديه أي شعور تجاهها سوف يبادر به، ولذلك قد توقفت عن مراقبته وهي لا تعلم إنه في الآونة الأخيرة يسترق أي فرصة لينظر إليها دون أن تراه، أما عن كريم فكالعادة هو دائماً ضحوك ودمه خفيف، ما إن رآها حتى سألها:

- إزي ميار؟ فيصيبها الخجل وتضحك وتقوله:

- الحمد لله وتكمل في طريقها، هو كان بالنسبة لها فاتتاً فكانت تتجنب الوقوف معه أو حتى النظر إليه حتى لا يشغلها عن دروسها، وكان هو أيضاً يرى هذا في خجلها الزايد وإصرارها على الهروب الدائم من الاحتكاك به، كان هذا غريب نسبياً إليه، فكل

البنات يحاولون جذبه لفتح مواضيع إلا هي فهو يتيح لها الفرصة ولكنها تهرب منه دائماً .

استمر الحال على هذا الوضع حتى انتهى الترم وبصدور النتيجة تلقت رسالة من مصطفى بالنتيجة، ويخبرها أن ترتيبها جاء هذا الترم متأخراً لتكون الرابعة بدلاً من الأولى، شكرتها في رسالة قصيرة جداً، وظلت جالسة ممتلئة بالحزن فلأول مرة يتراجع ترتيبها من الأولى ولكنها قررت أن تعوض هذا الفرق وبالفعل لم تفكر في الترم الثاني إلا في تحسين مستواها وبفضل الله في مادة مصطفى وكريم دخلها معيدين غيرهم، وهي أيضاً كانت لا تراهم إلا إذا مرت مرة بجوار غرفة المعيدين، وقد أعطى هذا البعد لمصطفى شعوراً بأنها لا تشعر بأي مشاعر تجاه كريم، وجاء آخر يوم في السنة الأخيرة وكانت سلمى تمتحن الشفوي في المكتب المقابل لغرفة المعيدين، وخرجت من الغرفة ليلمحها مصطفى وهو جالس على مكتبه، وهي أيضاً رأتته وتقابلت عيونهم، فكان لا بد أن تدخل إلى المكتب وتسلم عليه ..

- ها يا سلمى عملي إيه في الامتحانات؟

- كويس الحمد لله أنا شديت حيلي جداً الترم ده، وربنا

يسهل

- لأ ما تعلقيش إن شاء الله هتطلعي الأولى عشان تبقى حافظتي على ترتيبك طول السنين، إنتي نفسك تتعيني في قسم إيه؟

- مش عارفة مفيش حاجة معينة، كله كويس ولا حضرتك شايف إيه؟

- بصي أنا شايف إن إنتي لو قدرتي تحافظي على ترتيبك، ممكن تطلبي من العميد إنه يعملك استثناء ويخليكي تختاري القسم اللي إنتي عايزاه وممكن أخلي د. عمر رئيس القسم بتاعنا يكلمهولك، هو على علاقة كويسة بيه..

- طيب أختار أنهي قسم؟

- بصي يا سلمى صيدلة بتشترك في أقسامها مع طب وعلوم ما بيميزهاش غير قسم واحد اللي مش موجود في أي كلية تانية القسم بتاعنا الصيدلانيات والتصنيع الدوائي، وده اللي يقدر يتميز فيه يا سلمى بيكونله فرص كثير غير التدريس ممكن يشتغل في المصانع الكبيرة وفي تطوير الصناعة الدوائية، بس ربنا يسهل وتطلعي الأولى وإحنا ندخلك للعميد ونقوله إن إنتي نابغة والأولى خمس سنين، ومن حقك تختاري القسم اللي عايزاه بدل ما يوزعوكي هما علي مزاجهم.

- أنا مش عارفة أقولك إيه يا دكتور، إنت أكثر إنسان ساعدني
في الكلية دي.

ليدخل كريم الغرفة ويقطع الحوار ويقول:

- إلحق يا مصطفى

- في إيه يا كريم؟

- جيهان بتاكل العيال جوه في الشفوي

لا تملك سلمى نفسها من الضحك على دعابته، فينظر إليها
كريم ويقولها:

- عجبتك أوي كده؟!

فتنظر إلى الأرض ولا ترد وتكمل ضحك ويخرج كريم من
الغرفة لتعاود الحديث مع مصطفى فيصطنع هو الآخر الابتسام
ويسألها:

- دمه خفيف كريم صح؟

- أه بصراحة بيضحكني جداً

- يحاول مواصلة تصنع الابتسام ويرد:

-وأناكمان

طلبت سلمى الإذن لتتصرف وأذن لها وجلس يفكر، هي
معجبة بيه فعلاً، أنا ماقدرش أفاتحها في أي حاجة، بس فعلاً
كريم دمه خفيف وممكن يكون بيضحكها عادي، أيوة بس هي من
زمان عايزة تلفت نظره، مش المفروض إنني أعبّر لها عن أي مشاعر
غير لما فعلاً أتأكد إنه مش في دماغها.

مرت الأيام وظهرت النتيجة، بس المرة دي مصطفى كلمها، سلمى
إنتي طلعتي الأولى مبروك يا دكتورة.

- الله يبارك في حضرتك يا دكتور.

- سلمى أنا كلمت د.عمر، تعالي بكرة وهيدخل معاكي عند
العميد، عشان يوزعوكي على القسم عندنا، أنا ممكن ما كونش
موجود إنتي، إدخلي لد.عمر أنا فهمته كل حاجة..

- حاضر يا دكتور هاجي بكرة إن شاء الله، متشكرة جداً
لحضرتك

ودخل مصطفى لد.عمر المكتب، وقاله:

- دكتور أنا كلمت سلمى وهاتيكي بكرة لحضرتك أنا ممكن
ما كونش موجود عشان هودي ماما للدكتور الصبح، فهي هاتيكي
لحضرتك على طول.

- ابتسم وقاله: حاضر يا مصطفى خليها تجيلي على طول،
أنا هفتح بدري وأقعد أستناها مخصوص عشان خاطر ك.

شعر مصطفى بالحرص فبدأ يبرر: أصل يا دكتور هي

- في إيه يا درش إنت وقعت ولا الهوا اللي رماك؟

- لأ عادي يا دكتور، هي بس عقلية كويسة والواحد المفروض
يساعدها و.....

رد عليه الدكتور ضاحكاً: ويساعدها ويجيبلها النتيجة ويطير
من الفرحة إنها طلعت الأولى ويجيبلها واسطة تتعين معاه في نفس
القسم.

سكت مصطفى لا يجد كلام يرد بيه فيكمل دكتور عمر كلامه:

- لما تيجي تصيح يا مصطفى، ما تصيحش على أستاذك
وبعدين ما فيهاش حاجة، هي بنت كويسة ومؤدبة وزكية وإنت
وهي تستاهلوا كل خير.

- بس يا دكتور

- بس إيه يا ابني ما تضيعش وقت، العمر بييطير وبعدين
إلحقها قبل ما حد تاني يخطفها منك.

- خلاص أول مرة هشوفها فيها بعد كده هفاتحها في الموضوع.

الحلقة العشرون

(دعوة أم)

عدما استقبلت سلمى مكاملة د.مصطفى لم تفكر إلا في فرحتها العارمة وانطلقت تزف الخبر للبيت كله، ولم يكن أبوها موجود فهاتفته أمها: أيوة يا عبده، سلمى نتيجتها ظهرت وطلعت الأولى، هاتلنا معاك حاجة حلوة وما تتأخرش عشان نخرج كلنا النهاردة.

وبالفعل عاد الأب إلى المنزل وهنأها بحرارة وبينما هم يتناولون الحلو، يسأل الأب:

- وسارة صاحبتك عملت إيه يا سلمى؟
- مش عارفة يا بابا أصل النتيجة في الكلية هتظهر بكرة

ترد الأم: أو مال إنتي مين اللي جايبهالك؟

سلمى: معيدة صاحبتني يا ماما كل سنة بتجيبهالي بدري

الأب: طيب كتر خيرها، وإنتي يا سلمى نفسك تتعيني في

قسم إيه؟

سلمى: صاحبتى المعيدة دي جاييالي واسطة إنى أروح بكرة
لعميد الكلية عشان أتعين في القسم اللي أنا عايزاه.

الأم: طيب واللهم ربنا يسعدها زي ما فرحتنا بدري كده، إنتي
طيبة وأنا دائماً بدعيلك ربنا يوقفلك ولاد الحلال.

سلمى: يا رب يا ماما ربنا يسعدها، هي وقفت جنبى كثير
جداً في السننتين اللي فاتوا.

الأم: هي اسمها إيه ما جبتيش سيرتها قبل كدة؟

- اسمها صفيه يا ماما

ثم انطلقوا لبدأوا في الاستعداد للخروج، وبينما تستعد
سلمى للخروج تفكر، أنا إيه اللي خلاني أكذب عليهم بس، أنا
عارفة لو قلت حاجة زي دي أودام ماما هتستني بيحي يخطبني
وأنا مش متأكدة هو بيعمل كده ليه، بس أنا دائماً بشوف في
الأفلام ناس بتبقى كويسة أوي مع بعض، ويتكون كل اللي ما
بينهم مجرد صداقة، يمكن مصطفى متربي على كده وبعدين أنا
كمان برتاحله، ولما بحتاج لحاجة بيكون هو أول واحد بفكر فيه،
بس عمري ما هوقف حياتي عليه، يعني لو جالي أي حد مناسب
هوافق عليه، فمالهاش لازمة خالص أجيب سيرته أودام ماما.

وفي اليوم التالي في مكتب د.عمر:

- ألو صباح الخير يا دكتور

- صباح النور يا مصطفى

- دكتور أنا هحاول أخلص بسرعة وأجي لسلمى، كلام حضرتك إمبراح أقنعني جداً

- طيب يلا ربنا يتملك بخير

- بس أنا ممكن أتأخر شوية

- طيب أنا ممكن أعملك حركة جدعنة، ممكن أقولها إن العميد مشغول وأخليها تستنى عندي في المكتب.

- حضرتك أجدع رئيس قسم في الدنيا خلاص بس لو حسيت إني هتأخر أوي حضرتك عارف حركات الدكاترة، والدكتور بتاع ماما ده بيتأخر جداً هكلم حضرتك عشان ما نلطحهاش حرام.

- ماشي يا عم الحنين

وبالفعل تصل سلمى إلى مكتب د.عمر ويقابلها بترحيب ويجلسها ويطلبها كوب من العصير.

- معلش يا سلمى إشربي العصير عشان العميد معاه ناس كتير ومش هيفضى يقابلنا غير بعد ساعة.

- خلاص بس ما كونش معطلة حضرتك، أستتى بره؟

- لأ أنا هشتغل عادي وإنتي إفتحي الفيس بوك ولا إتكلمي على الواتس، أي حاجة من النشاطات المعتادة بتاعتكوا.

شربت سلمى العصير ورن تليفون د.عمر

- ألو يا دكتور إحنا دورنا رقم عشرين والدكتور بيتأخر فمش هلحق آجي.

- ماشي مع السلامة

نظر إلى سلمى: يلا نروح للعميد

- حضرتك قلت ساعة

- التليفون ده كان من مكتب العميد بيقولولي إنه جاهز يقابلنا

ودخلت سلمى إلى مكتب العميد وهنأها بحرارة على تفوقها النادر في الحفاظ على ترتيبها، ووافق لها على الالتحاق بالقسم المراد وطلب منها أن تمر على الأستاذة وفاء، مسئولة العلاقات العامة لكي تخبرها عن إجراءات حفلة التخرج.

وذهبت سلمى وأخبرتها وفاء:

- بصي يا دكتورة الحفلة هتكون بعد أسبوعين، اللبس فورمال بس إنتي اللي هتقولي كلمة الدفعة عشان إنتي الأولى،

والكلمة كالعادة بتبدأ بأية قرآنية وبتشكري الكلية: العميد
وأساتذتك وزمائك، وبعدين بتقولي كلمة عن أمنية ليكي أو
نصيحة تنصحي بيها الآخرين كده يعني.

- ولازم موضوع الكلمة ده أصل أنا بتكسف أوي

- أه لازم يا دكتورة

وعادت إلى المنزل لتجد أبيها ينتظرها وأمها وهم سعداء
جداً

- سلمى إحنا كنا بنجهزلك مفاجأة حلوة جداً، بقالنا أسبوعين
بس واضح إن ربنا هو اللي ألهمنا نجهزها لك عشان تبقى مكافأة
ليكي على تعبك.

- إيه هي يا بابا؟

- الأم: إحنا طالعين عمرة بعد بكرة يا بنتي، مش إنتي كان
نفسك من زمان تطلعي عمرة، أهو ربنا كتبها لك.

شعرت سلمى بسعادة كبيرة وفرحة ملأت كيائها، فهي
تتمنى الذهاب للعمرة وزيارة سيدنا النبي منذ أن كانت صغيرة،
ولكنها تذكرت حفلة التخرج فأجابها أبوها إن العمرة عشرة أيام
فسيعدون قبل الحفلة بيوم.

حضرت سلمى شنتطتها وبدأت تستعد ونسيت أن تكلم مصطفى لتشكره، وتقوله إنها خلاص هتبقى معاه في نفس القسم وهو أيضاً عاد مع أمه من عند الطبيب متعب، وفي اليوم الثاني كان الطبيب قد طلب من أمه تحاليل كثير وكان قلقاً عليها جداً فانشغل معها جداً وسلمى مشغولة في التحضيرات، وعندما تذكر يكلمها في اليوم الثالث كانت قد سافرت، ولكنه حاول لعدة أيام بعد ذلك وكان تليفونها مغلق.

وصلت سلمى إلى الكعبة، وحين رأتها فاضت عيناها بالدموع ونسيت كل شيء في الدنيا، وظلت تلمي الله مع أهلها وأدوا العمرة ثم جلست لتستريح مع أمها انتظاراً للصلاة، وبينما تنظر أمها للكعبة نظرت لها وقالت لها:

- يا رب يا سلمى يا بنتي أول لما تنزلي مصر ربنا يرزقك بعريسين أحسن من بعض.

- ليه يا ماما ما كفاية واحد كويس وخالص

- لأ عشان بعد كده أقعد في وسط قرايبي، وأقول دي سلمى جالها فلان وعلان وكده يعني.

- مش سبب برده يا ماما، أنا عايزة واحد كويس وخالص

- إنتي هتتيلي في كل حاجة حتى في الدعوة هتخليني أدعي عليكى أودام الكعبة.

- خلاص خلاص يا ماما إدعي باللي إنتي عايزاه

- ثم جلست تتذكر سلمى من أمنوها بالدعوة لهم، فدعت لصديقاتها جميعاً بالأزواج الصالحين والذرية الصالحة وتذكرت مصطفى، فدعت الله له دائماً بالتوفيق وأن يسخر له الله دائماً من يساعده كما ساعدها، ودعت لنفسها بالزوج الصالح والنجاح في الحياة وتذكرت كريم فدعت الله له بزوجة تسعده، واستمرت في الدعاء لنفسها والآخريين طوال فتره العمرة، وأحست إنها ملكت الدنيا

وزارت سيدنا النبي وسلمت عليا عند دخولها المدينة وأقرأته السلام من كل من تحب، ورزقها الله بركعتين في روضة رسول الله شعرت بهم إنها غير محتاجة لشيء بعدهم في الدنيا كلها، كانت في قمة السعادة وعادت إلى مصر مليئة بنور الوجه والقلب والفرحة وعادت من العمرة، وما إن وصلت إلى مصر،

فتحت الهاتف لتجد عدة رسائل بأن مصطفى حاول الاتصال

بها

وصلت البيت وكلمته..

يرن هاتف مصطفى فتسمعه أخته فتندهله:

- مصطفى تليفونك

فيمسك التليفون وتملاً وجهه الفرحة

فتسأله أخته: سلمى؟

- أيوة

- طب رد عليها وقولها بأه

- حاضر ويرد على الهاتف:

- سلمى إزيك

- إزي حضرتك أنا كنت بعمل عمرة ورجعت لقيت حضرتك

متصل كذا مرة كان في حاجة؟

- حمد الله على سلامتكم

ويرتبك ثم يقول: أصل كان في ورقة مهمة لازم تمضيها بس

خلاص، د.عمر إتصرف وعرف يأجلها لك (هو بيكدب).

- طيب كويس، على فكرة أنا دعيتك كثير عشان إنت

إنسان جميل وتستاهل كل حاجة حلوة.

إتشجع بالكلمتين دول وكان هيقولها: طب يا سلمى أنا كنت عايز..

- لأ معلىش يا دكتور أنا كنت عايزة أسألك عن حاجة قبل ما أنسى، هو حضرتك جاي الحفلة بتاعت بكرة؟

- أه إن شاء الله

- طب كويس أنا كنت هلقى كلمة الدفعة وبصراحة وجودك بيشجعني أكثر.

- خلاص هتلاقيني هناك

- طيب حضرتك كنت هتقولي حاجة..

- لا ما أنا نسيت لو إفتكرت هقولك بكرة..

- مع السلامة

- مع السلامة

نظرت له أخته: ما قولتلهاش ليه؟!

- خلاص هشوفها بكرة وهقولها عايز أشوف وشها وأنا بقولها.



obeikandi.com

الحلقة الواحد والعشرون (تتجوزيني)

أتت سلمى إلى الحفل مع أبيها وأمها مرتدية بدلة فاتحة اللون واضعة قليل من الماكياج الذي يساعد في إبراز الجمال، وما إن وصلت حتى انضمت إلى الطلاب خلف ستارة المسرح، وكان يوجد أيضاً العميد والوكلاء، كان الجميع يهتئونها ولكنها كانت مضطربة جداً من إلقاء الكلمة، وكان المعيدون جميعهم موجودين ومنهم من يتصور مع الطلاب، ومنهم من يتكلم مع أساتذته، تمنى أن يظهر مصطفى ولكن سبقه في الظهور كريم فهو صديق الدفعة كلها وشعبيته كبيرة، فكان واقفاً مع الطلاب معظم الوقت، فاقترب منها وسألها بصوت منخفض:

إيه ده؟! مين دي؟

فنظرت له بتعجب: أنا سلمى

- إنغيرنا خالص يا سلمى

ابتسمت سلمى ابتسامة خجولة وقالت له إنها متوترة جداً ومش عايزة تلقي الكلمة، فقالها معلش إختصري فيها على قد ما تقدرى وفكري في أي حاجة تانية وإنتي واقفة وهتخلص بسرعة

وقالها هشوفك بعد الحفلة، وظهر مصطفى بعده واستقبله الطلاب بحفاوة أيضاً واستقبلوه منهم من قال:

- برنس المعيدين

- الرجل المحترم اللي ما بيقولش على مساعدة لحد لأ وظلوا يسلموا عليه ويتصوروا معاه ويشكروه حتى وصل إلى سلمى:

- إيه الأخبار مستعدة يا سلمى ولا إيه؟

- أنا قلقانة أوي من إلقاء الكلمة، بس هختصرها على قد ما أقدر وهفكر في حاجة تانية..

فنظر إليها بجدية:

- سلمى مش كل يوم هتجيلك فرصة إن إنتي تتكلمي وتظهري أودام رئيس الجامعة والعميد والوكلاء وزمائك، إوعي تعملي كده، إوعي تضيعي الفرصة وتظهري بمظهر البنت العادية اللي ما لهاش غير في المذاكرة، ومش عارفة تقول كلمتين على بعض وبصي للناس في عينيهم، حسسي كل واحد إنك بتكلميه هو بشخصه، إبدعي يا سلمى مش إنتي كاتبها أصلاً؟

- أه كاتبها حلو جداً

- أوريها لك؟

- لأهسمعها تحت مع بقية الناس وهشوفك بعد الحفلة..
نزل مصطفى والمسرح إفتتح ووقف الطلاب وبعد كلمة العميد
وبعد كلمات آخرين ندهوا اسمها، حرفياً شعرت بثقل في قدميها
ولكنها استجمعت قواها وعزمت على أن تؤدي بأفضل ما تملك
من قدرات..

وبدأت الكلمة:

- سلام عليكم

ورد عليها الجميع السلام وبدأت الكلمة باسم الله والصلاة
على النبي، وشكرت جميع الأساتذة وكل من يجب أن تشكره وبشكر
أهلها، وقالت الحديث الشريف: «إن الله يحب إذا عمل أحدكم عملاً
أن يتقنه»، وأن هذا هو الملخص للنجاح في أي عمل الإتقان ومراعاة
التفاصيل الصغيرة، وبعدين قالت أنا عايزة أوجه كلمة مالهاش
علاقة أوي بالتفوق، بس أنا عايزة أوجه رسالة لكل بنت وعايزة
أقول إن أنا لحد سنة تالطة تقريباً ما كانش حد يعرفني تقريباً
بالشكل، كل الناس عارفة إن في واحدة اسمها سلمى بتطلع الأولى
وخلص لكن من سنتين أنا بدأت أتعرف بينكم وبين الدكاترة
بدأت أسأل الدكاترة عن أي نقطة علمية مش فاهماها، بدأت

أتعامل مع كل زمائلي وولاد و بنات ببساطة أكثر، بدأت أعبّر عن نفسي ببساطة أكثر، وده حصل ببساطة؛ لأن ربنا بعثلي حد ينبهني؛ لأنني فعلاً كنت بتكسف من كل حاجة، أنا فعلاً لما كنت باجي أتكلم كنت بقلق الناس ما يعجبهمش الكلام أو يتريقوا عليه بعد ما أمشي، و لما أجي أهزر أخاف يطلع دمي ثقيل، كنت تعبانة أوي ليل ونهار في حوار ما بيني وما بين نفسي في كل موقف الحوار بيبقى أقول ولا ما أقولش، أتكلم ولا ما أتكلمش وبعد كل موقف يبقى الحوار يا ريتني كنت قلت اللي كان في دماغي ساعتها.. انا بقول لكل بنت خرجي نفسك من الدوامة السخيفة دي وقولي اللي جواكي واتصيري بطبيعتك، ساعتها بس كل الناس هتشوفك وهتعرفك ومش هتبقى بنت عادية. وشكراً.

فوجئت بتصفيق حار ملاً نفسها بالثقة مما جعلها تزداد جمالاً وتصبح كالأميرة التي خطفت جميع الأنظار وكانت كالفراشة السعيدة وهي بتسلم على العميد والوكلاء وسلموها الشهادة، سلمى كانت جميلة أوي وواثقة من نفسها ورقيقة. العيون كلها كانت عليها وتنزل من سلم المسرح لتجد كريم في انتظارها ينظر لها نظرة إعجاب مختلفة ويحرك شفثيه بالكلام ولكنها لا تسمع من الضجيج..

فيقترب منها أكثر لكي تسمعه وهو يسأل: تتجوزيني؟

فنظرت له بتعجب..!

فجاوبها: مش هاخذ رد منك دلوقتي، الدراسة هتكون بعد أسبوع
وانتي معانا في القسم هستنى ردك في أول يوم في السنة الدراسية،
تتظر إليه ولا تجاوب فيسأل:

- سلمى سمعتيني؟

- أه

- أه إيه تتجوزيني ولا سمعتيني؟

- لأ سمعتك وهرد عليك الأسبوع الجاي..

قابلها مصطفى في سكة الرجوع وهي عائدة إلى مقاعد
أهلها، ولكنها لم تلمح فكانت مرتبكة قليلاً، ولم تسمعه فتعجب
وكان كريم عائداً وراها فاستوقفه وسأله:

- هو في إيه إنت مبسوط كده ليه؟

- أنا خطبت سلمى يا مصطفى

للحظات ملامحه ثابتة، يحاول أن يستوعب ثم يرسم ابتسامة
عريضة وهو يبارك له:مبروك يا كريم وهي وافقت؟

- لألسه، هترد عليا في أول يوم في الدراسة

- طيب مبروك مقدماً، أكيد هتوافق

- يا رب أنا حاسس إن هي دي الإنسانة المحترمة اللي تستاهل بجد، وممكن تكون زوجة مشرفة وأم لولادي. لم يجبه مصطفى، ولكنه استأذن ومشى وعاد إلى منزله.. فتح باب المنزل لتسأله أخته: عملت إيه يا عريس كلمت الست سلمى؟

- أمل أنا تعبان شوية وعايز أنام هحكليك بكرة..

- بطل غلاسة إنت لازم تذلمي عشان تقول عملت إيه

- أمل أنا فعلاً تعبان ومش قادر أتكلم

- في إيه يا مصطفى، مش هسيبك غير لما تقول

- سلمى إتخطبت يا أمل

- إتخطبت وإنت ما كنتش عارف؟!

- لأ إتخطبت النهاردة وأنا واقف في الحفلة

- أودامك؟!

- أه

- يا نهار إسود! يا خيبتك وما نطقتش ليه، ما قولتش حاجة ليه، إيه الخيبة اللي إنت فيها دي؟!؟

- كريم اللي خطبها

- كريم زميلك ودفعتك؟!؟

- أه

- معقوله ما كانش حاسس بيك وبمشاعرك تجاهها؟!؟

- لأ، وبعدين مرة واحدة سألني وأكدته إن مفيش أي حاجة وأكدته ده تماماً؛ لأنني بجد ساعتها ما كنتش متأكد من مشاعري تجاهها . تسكت لا تجد إجابة .. فيسألها هو: أدخل أنام بقى يا أمل؟

- لأ طبعاً ما تدخلش تمام وإنت في الحالة دي، مكن تتعب جامد ..

-لأ مش لدرجة هيجيلي جلطة يا أمل،أنا زعلان فعلاً بس كل شيء نصيب .

-تصبحي على خير

- وإنت من أهله

دخل ينام وهو يحاور نفسه: أنا كذاب أنا هيجرالي حاجة، أنا طول عمري مفيش واحدة لفتت نظري وإتمنيتها زيها، طيب أنقل مثلاً جامعة القاهرة وأبعد عنهم؟ ما هي أكيد هتوافق إيه المانع؟ كريم عريس ممتاز وأنا عمري ما عبرتلها عن حاجة، أنا ولا مرة عبرتلها حتى ولو بتعليق ظريف على شكلها أنا غبي، غبي جداً، بس أنا لو نقلت الشغل هيبقى بعيد أوي عن البيت، وممكن ماما تتعب في أي وقت وما لحقهاش، أنا أفضل شيء ممكن أعمله أخذ بعضي وأسافر يومين وأبعد وهفكر هعمل إيه.. وفي السيارة بعدما انتهت الحفلة، كلهم عمالين يتكلموا ما عدا سلمى كانت ساكتة ومامتها قالتها:

- بت يا سلمى، عارفة خدي من أمك، إنتي كنتي زي القمر النهاردة في الحفلة، وأكيد هتطلعي بعريس والدعوة هتبتدي تتحقق..

-لسه كان هيرد جوزها عليها ويقولها: إنتي ما بتفكريش في حاجة غير.....

قاطعته سلمى: أنا فعلاً طلعت بعريس



الحلقة الثانية والعشرون

(ضحيت هوايا بهواه)

طلعتي بعريس يا ما أنت كريم يا رب، أنهي واحد فيهم؟

- أنهي واحد فيهم، إنتي هتعرفيهم؟ الحفلة كان فيها ما لا يقل

عن ٥٠٠ شخص، خدتي بالك منهم كلهم؟!؟

- يا بنتي أي أم عندها بنت عايزة تجوزها بيكون عندها

سنسور للعrsan في أي مناسبة.

- طيب يا ماما هو كان لابس بدلة كحلي وشعره إسود

وأبيضاني وطويل.

- اللي كلمك أول لما نزلتي من على المسرح؟

- أيوة يا ماما (تزرعد في السيارة) هو ده اللي أقول عليه جوز

بنتي، طول بعرض وقيمة، يا لهوي يا عبده لو شفته قمر.

- ينظر لها الأب إهدي شوية إهدي مش كده، ويكمل كلامه

مع سلمى: طيب يا سلمى، إنتي عارفاه من قبل الحفلة.

- أيوة يا بابا، ده معيد عندنا كان بيديني كذا سنة.

- أيوة يا حبيبتي، قصدي كان فيه بينكم تعامل مباشر

بتجأيله يشرحك حاجة، إتعاملتي معاه ولا إيه؟

- تنظر له الأم: والنبي دي أسئلة تسألها؟! بصي يا سلمى
مستواه كويس وأخلاقه كويسة؟

- أه يا ماما، أنا أعرف إن هو مرتاح أوي ومعاه عربية غالية،
وما سمعتش عنه حاجة وحشة، هو دمه خفيف جداً وكل الطلبة
يحبوه.

- مبروك يا سلمى، الموضوع مش محتاج تفكير على رأي عبد
الفتاح القصري؛ ده رجل أنا ذات نفسي أستمناه.

- ينظر لها الأب بتعجب: إنتي ذات نفسك تستمنيه، والله إنتي
إتجننتي خالص وعدلك ننزلك أودام باب العباسية بالبروبوء اللي
إنتي لابساه ده، إيه كمية الترتر اللي إنتي لابساه ده، إحنا كنا في
حفلة تخرج مش فرح وقولتلك كده قبل ما ننزل.

- وأنا قلتلك بتفائل بالترتر وأهي قلبت بفرح يا عبده (وتطرقع
بصوابها).

- أمك إتجننت خالص يا سلمى، كان لازم يجيلك عريس
النهاردة؟!

- ترد الأم: ده لسه ده أنا دعيالها بعريسين

- يا ولية هي هتخش بيهم مسابقة، إدعيالها إن ربنا يجعلها
في اللي يجيلها خير.

- تصدق عندك حق ربنا يتملك بخير يا سلمى

(هي لا تعلم إن الدعوة قد تكون استجابةً وفعالاً كانوا عريسين، بس الثاني ما ينفعش يظهر خلاص، يمكن لو كانت ما طمعتش في الدعوة كان بقى مصطفى لوحده)..

وصلوا إلى البيت وغيروا هدمهم، وهما بيتعشوا أبوها طلب منها اسمه عشان يسأل عليه وخذ الاسم..

وفي اليوم التالي:

- ألو صباح الخير يا د.عمر

- صباح النور يا مصطفى، إيه مبدر كده ليه؟! إوعى تكون عايز تأجز النهارده، ده الدراسة كمان كام يوم ولازم نظبط المعامل ونحضر المواد ونراجعها في المعامل، وفرصة ننجر أكثر في رسالتك قبل الطلبة ما يدخلوا.

- أنا تعبان فعلاً ولازم أرتاح كمان كام يوم..

- مالك يا درش؟ إنت عملت إيه في موضوع العروسة صحيح، كانت زي العسل إمبراح أوعى تزعل إني بقول عسل دي زي بنتي..

- لأ عادي يا دكتور بس سلمى إتخطبت

- إنت ما لحقتش تقولها ولا إيه، إتخطبت إمتى؟

- إتخطبت إمبراح، كريم طلبها للجواز

- كريم بتاعنا

- أيوه يا دكتور

- دي مشكلة، طب أنا خلاص مضيتها قرار التعيين في القسم

ومش هعرف أقول للعميد إني مش عايزها

- حتى لو هتعرف يا دكتور أنا فعلاً إخترتها القسم ده عشان

أحسن قسم من وجهة نظري، مش عشان بس تكون معايا وأنا

ما أحبش إن هي تخسر أي حاجة بسببي، وبعدين كله نصيب يا

دكتور وشوية وهفك وهرجع كويس.

- خلاص يا مصطفى، خد الأسبوع أجازة مع إني محتاجك

جداً، وتعالالي على أول يوم في الدراسة..

- إن شاء الله

في خلال كام يوم كان أبو سلمى قد سأل على العريس ورجع

البيت، كانوا كلهم بيتفرجوا على التليفزيون وانضملمهم وقعد يتفرج،

وبعدين بيتكلم، ويقول مش أنا سألت علي العريس صحيح.

تمسك الأم بالريموت وتغلق التلفزيون ..

يعترض الصبيان وينظرون إلى الأم في غضب اعتراضاً على غلقها التلفزيون، فتد لهم النظرة بنظرة أقوى وتقول:

- حد ليه شوق في حاجة منك له؟

- يرد وليد: لأ يا وحش ما حدش

تنظر إلى مودي: قوم يا زفت إعملي شاي عشان أسمع أبوك كويس .

- لأ يا ماما أنا كمان عايز أسمع

تنظر له بغضب وتبدأ في الزعيق: هو أنا ما حدش يبيل ريقي بحاجة أبداً، هو أنا ما إتصفتش في خلفه أبداً!؟

يقاطعها الأب: قوم يا مودي إعمل لأمك شاي وما تخافش الموضوع هيتعاد ميت مرة، ثم ينظر إلى زوجته: إنتي ليه كل ما تيجي سيرة عريس بتتوحشي وبتتشنى البيت كله؟

- مش عارفة يا عبده غصبن عني واللهي

- طيب إهدي شوية، المهم الولد ابن ناس جداً وعيلته كبيرة أوي، وهو كويس في كل حاجة بس بتاع بنات شوية وشايف نفسه حبتين مدلع نفسه .

ترد سلمى: فعلاً يا بابا هو على طول واقف مع بنات

الأم: بس شوفتي من دون البنات كلها إختارك إنتي يا ست

البنات

ينظر لها الأب: إنتي إيه رأيك يا سلمى؟

- هو بصراحة كويس وأي بنت تقترح بيه، بس اللي تشوفه
إنت يا بابا..

- طب بصي يا بنتي، أنا رأيي إن مبدأياً مفيش مانع من
ناحية مستواه المادي والاجتماعي، وعندني رأي شوفوا كلكم
هتوافقوني فيه ولا لا؟

- قول يا بابا..

- أنا رأيي يا سلمى إن ممكن إنتي لو الولد سألك يوم السبت
إديله رقمي ويكلمني عشان يبقى في رسمية وجدية في الموضوع،
وأنا هعرف منه لو كان ما جابش سيرة لأهله، ومستتي يعرف رذك
الأول، خلاص دي تبقى فرصة إنكم تعرفوا بعض الأول وإنتوا كده
كده هتبقوا زمايل وفيه فرصة كويسة تتعرفوا على بعض وتاخدي
قرارك بعد ما تعاشره وتتعاملي معاه عن قرب، بدل ما الناس
تيجي وتنزل النيش وتقدمي الجاتوه ونقعد نهد في نفسنا، وبعدين
نقول خدوا شهر إعرفوا فيه بعض أهو تاخدوه من غير ما الناس
تروح وتيجي و الدوشة دي كلها..

- أنا شايفة إن الكلام ده صح يا بابا

- وإنت يا وليد شايف إيه؟

- أنا شايف إن كده أحسن، لازم سلمى تكون متأكدة قبل ما ترتبط بيه رسمي عشان هو معاها في نفس مكان شغلها، والموضوع هيبقى متشاف جداً لو ارتبطوا، ولو لا قدر الله ما كملوش هتبقى إتחסبت عليها جامد أوي وخصوصاً إنه مشهور أوي ودرنجوان والجو ده.

الأب: أنا برده فكرت كده، إنتي إيه رأيك يا سمية؟

- هو إنتوا بصراحة كلامكم صح يا عبده، بس أنا كان نفسي بييجي ونعمل الحكاية بتاعت المرة اللي فاتت دي بس خلاص.

- وإنتي يا سلمى؟

- اللي تشوفه يا بابا

- خلاص لو سألك خليه يكلمني..

وفي أول يوم دراسة.. دخلت سلمى إلى غرفة المعيدين لم تجد أمامها إلا مصطفى

- صباح الخير يا دكتور

- صباح الخير إزيك

- الحمد لله هو أنا بأه دلوقتى أعمل إيه، أنا مش عارفة

المعيدة دي المفروض تعمل إيه؟

- المعيدة دي هتتعد شوية كده تتفرج على المعيدىن زمايلها

وهما بيشرحوا فى السيكتشن وتساعد الطلبة فى التجارب العملي،

وبعدين تبتدي تحضر هي السيكتشن فى البيت وتشرح بنفسها

وكمان بيكون عندها مواد تذاكرها وتمتحن فيها نظري، وتختار

موضوع الرسالة ولما تتفق عليه مع الدكتور تبتدي تكتب الرسالة،

المعيدة دي بتعمل حاجات كتير أوي..

- هو إنت يا دكتور ناقشت ماجستير؟

- أه أنا ناقشت من سنة ونص كده

-عقبالي أنا كمان نفسي أناقش

- إنتي لحقتي؟! ده إنتي لسة أول يوم ليكي النهارده

يقاطعهم كريم ويدخل فتصاب سلمى بخجل شديد ويصبح

لونها الخمرى مشرب بالحمرة فيشعر مصطفى أن عليه الانصراف

فيستأذن منهم ويترك الغرفة..

ينظر لها كريم بسعادة ويقول:



الحلقة الثالثة والعشرون

(حلو ورغاي)

- ها تتجوزيني؟

- إنت لسه على نفس الكلمة من آخر مرة شوفتك؟

- أيوة ردي

- ده رقم بابا كلمه

- أيوة يعني موافقة؟

- يا دكتور طالما إديت حضرتك رقم بابا يبقى معناه إيه؟!

- يا دكتور إيه يا سلمى، ده أنا متقدملك تتجوزيني وبعدين

خلاص إحنا بقينا زمايل، مكاتبنا في وش بعض، يعني خلاص أنا

كريم وإنتي سلمى

- حاضر يا كريم

- طيب هاتي رقم بابا

تعطيه الرقم وتدخل الغرفة معيدة أخرى اسمها دعاء وتنظر

إلى سلمى: إزيك مبروك التعيين، أنا عارفة إنك معانا نورتي القسم.

- شكراً يا دكتورة

- لأقوليلي يا دعاء، إحننا بقينا زمايل خلاص

يدخل مصطفى في نفس اللحظة ليرتدي الباطو لبدء
السيكشن، فينظر له كريم ويحدث سلمى: بصي بأه يا سلمى أي
حاجة عايزة تقضيها في القسم من د. عمر يبقى طريقك مصطفى
هو أقرب واحد فينا لدكتور عمر، صح يا درش؟

- لأ يا عم عادي وبعدين سلمى بدماغها وشغلها ممكن
تبقى أقربله مني، هو بيقدر الشغل مش أكثر وهو بيعزك جداً،
بس إنت بتطلع عينه كل لما يطلب منك حاجة..

- تنظر له سلمى: ربنا يخليك يا دكتور مصطفى دائماً
بتشجعني

كريم: يا بنتي إيه دكتور دي؟! عودي نفسك بأه على أسامينا
من غير ألقاب؛ هو مصطفى وأنا كريم ودي دعاء وفي شروق
معانا برده معيدة في القسم ما تقولها يا مصطفى، وفي حاتم لسه
متعين جديد زيك ودفعتك.

- مصطفى: سيبها يا كريم تقول اللي هي عايزاه

- تنظر إليه سلمى في إعزاز: لأ طبعاً حضرتك بالذات ما
أقدرش ما أقولكش يا دكتور..

بيتسم ابتسامة: زي ما إنتي عايزة ويتابع كلامه: سلمى لما
بيجي حاتم خشي معاه لدكتور عمر خليه يوزعكم على السكاشن
ويقولكوا تكمّلوا إجراءات التعيين إزاي..

تدخل سلمى إلى د.عمر فيطلب منها اختيار معيد تدخل
معاه تتدرب منه على الشرح لمدة أسبوعين بحد أقصى؛ لأن فيه
نقص في المعيدين، وهو عايز المعيدين الكبار يتفرغوا أكثر لكتابة
الرسالة ويسأل سلمى: تحبي تكوني مع كريم؟

- ترد سلمى: مفيش مشكلة اللي تشوفه يا دكتور

وتبدأ سلمى في دخول السكاشن مع كريم وكعاداته مبهر، هو
شرحه عادي بس دمه الخفيف مع شياكته ووسامته بتخلي كل
البنات تسرح فيه وهو بيشرح، وكمان بيعرف يهرج مع الولاد
تهريج بيعجبهم، عنده قدرة على جذب الانتباه، سلمى سرحت؛
معقول ده إختارني أنا؟! يا ترى إيه اللي شده ليا؟! إحنا تقريباً
عمرنا ما إتكلّمنا مع بعض، إيه اللي عجبه فيا خلاه يتقدملي
دوناً عن البنات اللي كلها نفسها تكلمه، السؤال ده كان شاغل بالها
أوي..

الغريب في الموضوع إن كل البنات والستات السؤال ده دائماً
بيشغل بالهم أوي مش عارفة ليه؟!

المهم إن اليوم خلص وقبل ما يخلص اليوم، كريم أخذ من سلمى رقمها وقالها إن كده كده من غير حاجة رقمها لازم يبقى معاه؛ لأن هما زمايل وهي دلوقتي تحت إشرافه في السكاشن وروحت

وعلى المغرب كده باباها رجع من الشغل وقالها إن كريم كلمه واتفق معاه على إنهم ياخدوا فترة شهر كده يعرفوا بعض فيه أكثر قبل ما يجولهم في البيت..

يرن تليفون سلمى:

- ألو إزيك

- الحمد لله

أديني كلمت بابا وإداني مهمة إن إحنا نعرف بعض خلال شهر، عايزة تعرفي إيه؟

- مش عارفة مش حاجة معينة، يعني أكيد لما نتعامل مع بعض أكثر، هنشوف هنرتاح لبعض أكثر ولا هنختلف..

- ما أعتقدش إن فيه حد ممكن يختلف معاكي يا سلمى، ده إنتي طيبة أوي وفي حالك..

- مش يمكن ما أكونش زي ما إنت فاكر كده عشان إنت ما تعاملتش معايا من قرب..

- يا واد إنت يا خطر

- بتتريق عليا ولا إيه؟!

- لأ ما تاخديهاش كده أنا بهزر بس أقولك حاجة يا سلمى..

- قول

- بصراحة ما توقعتش إن إنتي ممكن تطلبي فترة نعرف فيها

بعض أكثر..

- ليه يعني؟! إحنا فعلاً ما تعاملناش مع بعض عن قرب قبل

كده..

- مش عارف بس استغربت الطلب، بس مفيش مشكلة المهم

تحبي تعريف إيه عني؟

- يعني مثلاً إيه أكثر حاجة شدتك ليا؟

- بصي يا سلمى، إنتي إنسانة مسئولة وراقية في تصرفاتك

وذكية وكل دي مواصفات تخليكي زوجة وأم ناجحة جداً، ده غير

إن فيكي خجل وحياء ما بقاش موجود عند كثير من البنات، وفي

نفس الوقت لو إتخطيتي في موقف بتعريف تظهري بصورة كويسة،

يعني في الحفلة مثلاً ما كنتش أتوقع إنك تعريف تقضي وتقولي

كلمة وتبهري الناس بالشكل ده..

- بس أنا لما قولتلك إنني محرجة قولتلي إختصري على قد
ما تقدرني وما قولتليش حاولي وما شجعتنيش إنني أقول كلمة
كويسة، إنت قولتلي فكري في أي حاجة تانية وإنتي بتتكلمي،
والموضوع هيخلص بسرعة..

- بصراحة يا سلمى أنا كنت حاسس إن إنتي ما تقدرينش
تقولي كلمتين على بعض فقلت أسهل عليك الموقف..

- يعني لو كنت سمعت كلامك وإختصرت وطلعت على المسرح
وقلت أي كلمتين وخلاص ما كنتش هلفت نظرك.

- ممكن جداً أنا فعلاً لفت نظري نجاحك في إبهار الحضور
وعلى العموم إنتي مركزة في الموضوع ده أوي كده ليه؟! المهم
دلوقتي إن إنتي لفتي نظري وحسيت إنني معجب بيكي وحاسس
إن إنتي كمان معجبة بيا.

- إيه الثقة الفظيعة دي؟!

- طيب تتكري

- أنا مش هنكر إن إنت إنسان متميز؛ يعني وسيم وشيك
ودمك خفيف طبيعي إن إنت تلفت نظر أي بنت بس مش لدرجة
الإعجاب يعني

- مع إني مش مصدقك أوي بس ماشي، المهم دلوقتي أنا حاسس إن إحنا ممكن نكون ناجحين جداً مع بعض، إنتي فيكي كل مواصفات الزوجة الناجحة وأعتقد إن أنا كمان أعتبر مناسب كعريس ليكي، تعالي نجرب نقرب من بعض أكثر، يمكن يا ستي يتحول الموضوع من لفت نظر لإعجاب..

- أكيد أومال إحنا بنتكلم دلوقتي ليه؟!

- بصي يا ستي هحكليك عن نفسي أكثر عشان تعرفيني، أنا كريم ٢٨ سنة بحب الحياة جداً، بحب أعمل كل اللي بييجي على بالي، بصي أنا بحب السفر جداً وبحب العرييات جداً، أنا مجنون بالعرييات، بصي مش أنا معيد في صيدلة لو ما كنتش معيد كان نفسي أبقي مهندس سيارات وبحب البلاي ستیشن جداً، وطبعاً أهلاوي وبكره قعدة البيت ومتخيل إني لما أتجوز أنا ومراتي هنبقى مقيمين في أقرب كافييه لبيتنا، صحيح إنتي بتقعدي في كافييه إيه أكثر الوقت؟

- كافييه الصالة مع بابا وماما وإخواتي

- بتهرجي ما بتروحيش كافييات مع صاحباتك، طيب باباكي ما بيحبش يشيش في كافييه معين؟

- يشيش يشرب شيشة يعني؟

- أه

- لأ مش عارفة، بس مش ده ستايلنا أوي في الخروجات

- إمامم، طيب عارفة لما نتخطب هلففك على معظم الكافيهات اللي بقعد فيها عشان تختاري أكثر واحد تحبيه ونقعد فيه على طول..

- يا ريت أجرب أنا مع أصحابي بنروح مؤمن وكنتاكي

- إيه يا سلمى ده إنتي شوية شوية هتقوليلي هابي ميل من ماکدونالڊز وبتاخدي اللعبة..

- لأ مش للدرجة دي، كبرت بقى على الموضوع ده مع إني ساعات بحن له.

- لأ بصي أنا هخليكي تشوفي حاجات أكثر وتروحي أماكن أكثر، إنتوا مشتركين في نادي إيه؟

- إحنا مشتركين في نادي الشمس، بس ما بنروحش كثير أصل إحنا ماما و بابا أهم حاجة عندهم المذاكرة وفي الصيف بنروح إسكندرية أو الساحل مرة و طول الأجازة بقعد في البيت.

- يا عيني يا بنتي

- عادي يعني أنا مش متضايقه دي الحياة الطبيعية للبنات المصرية، على الأقل أنا ساعات بخرج مع أصحابي، فيه ناس تانية بتقضي طول الأجازة في البيت.

- لا مش شرط أنا عندي أختي طول عمرها بتلعب رياضة زيي وبتعلم مازيكا مع بعض.

- هو إنت بتلعب رياضة ومازيكا؟

- أه بلعب باراشوتينج، أنا واخد ثاني جمهورية

-ضرب نار يعني

-لا ضرب نار إيه يا سلمى قصدي قفز بالمظلات

-معلش أنا سمعت آخرها شوتينج ففكرتك تقصد ضرب

النار بس دي رياضة غريبة أوي..!

- أه بس ممتعة وكمان أنا بلعب drums كنت بتدرب في الأوبرا

- إيه ده بتطبل معقولة عندك وقت تعمل كده؟

- لأ بطبل دي بتقفلني أوي اسمها بتلعب drums وكنت بالاقلي

وقت؛ لأن ماما يا سلمى ست مختلفة جداً علمتنا إن إحنا نركز

في كل حاجة بنعملها كويس جداً عشان نخلصها بسرعة ونعرف

نستمع بوقتنا في حاجات كثير عشان كده أنا عايز أركز في المهلة
اللي باباكي إديهاننا إنك تعرفيني كويس

- وإنك كمان تعرفني

- أه طبعاً بس واضح إن إحنا مختلفين شوية في طريقة
حياتنا، بس دي حاجة كويسة على فكرة هنكمل بعض أكثر، بصي
يا سلمى إنتي محتاجة حد يفكك شوية ويفرجك على حاجات
جديدة وأنا محتاج بني أدمة عاقلة زيك تخليني أهدى شوية.

- طيب بس أنا نفسي أتجنن في حاجات تانية

- يا ستي إتجنني زي ما إنتي عايزة، أنا في الجنان مفيش
أجن مني طيب عارفة يا سلمى أنا نفسي لما أتجوز أطلع أنا
وعروستي رحلة جامدة أوي، ونلف مع بعض العالم، إنتي عارفة
أنا ليا واحد صاحبي، ابن عمتي أخذ عروسته وطلعوا أوروبا ٣
أسابيع ما عملوش فرح جامد، عملوه على الضيق كده وخدها
ووفر الفلوس وعمل رحلة جامدة جداً، أنا اللي كنت مقترح عليه
الفكره وأنا اللي ظبطله الرحلة عندي واحد صاحبي بيشتغل في
شركة سياحة وعملهم بروجرام هايل واستمر طول المكالمة يحكي
عن نفسه وعن أصحابه وعن هو عايز يعمل إيه، دماغه مختلفة
جداً عنها كانت مبهورة بيه وفضلوا على كده كل يوم يتقابلوا في

الكلية، ولبيل يقعدوا يرغوا ويفضل يحكيها عن يومه، بس سلمى بعد كام يوم لقت نفسها بتفرح إنه بيكلمها لبيل بس بتبقى عايزة تقفل بسرعة، فكرة إن هي طول الوقت اللي بتسمع دي بدأت ما تبقاش عاجباها، هو بيبقى ملهوف يحكيها جداً بس عمره ما سألها عن حاجة تخصصها، ولما بتحاول تخلق لنفسها فرصة في الكلام كان يرد عليها ردود زي

إنتي هتقوليلي يا بنتي أنا عارف الموضوع ده كويس جداً، طيب ده أنا مرة حصلي حاجة مشابهة وبيتدي يحكي بس ده برده ما كانش سبب كاي في إن هي تتفر منه؛ لأنه كان ذوق جداً معاها في كل حاجة لما تيجي داخلة معاه أوضة المعيدين لازم يخليها تدخل قبل منه، بيعمل تكات صغيرة كده ما بيعملهاش غير الجينتل مان فعلاً، حاجات تخلي أي بنت تانية تحسدها عليه بس كان فيه حاجة ناقصة..

فقررت إنها هتكلم مع مامتها..



obeikandi.com

الحلقة الرابعة والعشرون

(ما تداريش في حد)

تدخل للآم غرفتها:

- ماما فاضية شوية عايزة أرغي معاكي؟

- أه تعالي يا سلمى، بس مش بعادة يعني ما لكيش في الرغي

- لأ أصل أنا عايزة أخذ رأيك في حاجة بخصوص كريم؟

- تعالي يا سلمى، في إيه يا حبيبتتي؟

- ماما كريم كويس وكل حاجة بس.....

- بس إيه؟

- بس مش عارفة يا ماما مش بيسمعني خالص على طول

بيتكلم مش حاسه إنه مهتم يعرف حاجة عني، أنا مش بلاقي

فرصة أتكلم خالص، أنا بعلق على كلامه وحكاياته بس.

- طيب وإيه المشكلة معظم الرجالة كده بيحبوا ستاتهم

يسمعوهم، كل ما تسمعي أكثر كل ما يحبك أكثر ويحب يحكيك

أكثر ويتعلق بيكي أكثر.

- أيوة يا ماما بس ليه أنا اللي مطالبة دائماً إنني أعلقه بيا
أكثر، مش المفروض إن أنا كمان أتعلق بيه وهو يحاول يعلقني
ببيه بإنه يعرف أنا بحب إيه وبكره إيه، مش المفروض يكون مهتم
بتفاصيلي عشان يعرف يعلقني بيه؟!؛

- بصي يا سلمى، هو ده المفروض بس مش دائماً بيحصل

- طيب ليه؟

- بصي يا سلمى، مش كل واحد بيحاول يفهم الثاني عشان
يربحه هو ممكن تلاقيه بدأ يعمل حاجات تانية يحسسك بيها
إنك مهمة عنده..

- زي إيه؟

- زي مثلاً ممكن يكون قلل وقوفة مع البنات احتراماً ليكي
وممكن تلاقيه بيحاول يريحك أو يميزك عن اللي حوالكي في
التعامل..

- هو ده صح يا ماما هو بصراحة قلل وقوفه مع البنات
جداً إلا لو جاتله واحده تسأله في حاجة يشرحها، ساعات كثير
بيتأخر الصبح والأقيه جايلي معاه فطار وهو جي يعني بيحاول
يهتم بيا.

- طيب وإنتي يا سلمى لما بتجيله واحدة يشرحها حاجة بتغيري أو بتضايقي؟

- لأ خالص يا ماما هو معيد ودي طبيعة شغله وبصراحة ما بصدق أتفك مع صاحباتي في القسم أرغي شوية أقول أي حاجة.

- ما هو معظم الستات كده بيطلعوا شحنة الرغي مع بعض، عشان كده إنتي جيتي تقولي لي أرغي معاكي شوية يا ماما؟
يا عيني يا بنتي ده إنتي عمرك ما طلبتها..

- بس عارفة يا ماما لما كنت بتكلم مع أحمد كنت بحب طريقته أوي، كان دايماً بيسألني بحب إيه وبكره إيه، كان معجب جداً بطريقة تفكيري.

- أحمد ابن ميار قطع وقطعت سيرته هو وأمه، كان قدمه فقر من ساعة ما خرج من عندنا قعدنا بيجي سنة ما شوفناش عرسان..

- ما تظلمهوش يا ماما أنا أصلاً ما كانش بيجيلي عرسان قبله عشان بيقوا وقفوا من بعده..

- إيه يا بت الصراحة اللي إنتي فيها ولما إنتي يا قلب أمك عارفة إن لا كان بيجيلك قبله ولا بعده يبقى إمسكي في اللي في إيدك ده وتبتي فيه ده عريس نصفه.

- حاضر يا ماما هتبت فيه

- وبعدين أديكي قولتي ابن ميار كان بيسمعك بس أمه كانت
حرباية وهتخرب عليكي لو إتجوزتیه،إنما كريم ده شكله ابن ناس
طيبين كل واحد وليه عيبه يا بنتي..

-حاضر يا ماما

وبالفعل سلمى أخذت بنصيحة أمها وسكتت بقت على طول
بتسمع حكاياته ومغامراته وآراءه في كل جوانب الحياة، و كل مرة تحاول
تبدي اهتمام أكثر عشان يتعلق بيها أكثر عملاً بنصيحة مامتها،
ولما تزهق أوي تحاول تخلص المكالمة بطرق مختلفة، مرة معلش يا
كريم أصل ماما بتتده، معلش أصل التليفون شحنه بيخلص وأنا
ما بحبش أتكلم وأنا حطاه في الشحن أصلي سمعت إن كده غلط
وهو كمان كان بيحاول يساعدها ويهتم بيها بطرق تناسب
شخصيته، مثلاً قبل ما يروح أي حته كان يسألها سلمى أجيبلك
معايا حاجة تشربيه، وبيحاول يساعدها في شغلها لو أي حاجة
وقفت أودامها يعملها هو بحث أو أي حاجة حتى لما المهلة اللي
دكتور عمر قال عليها للمعيدين الجداد خلصت عشان يبدأوا
يشرحوا بنفسهم سلمى كانت كالعادة مكسوفة، وقالت لكريم مش
عايزة أشرح قالها خلاص مفيش مشكلة وخليكي إنتي وأنا هشرح
مش لازم تشرحي، كان بيحاول يريحها كتير وفي يوم كريم كان

مشغول مع دكتور عمر في الرسالة، وجه وقت السيكشن بتاعه مع سلمى فتلقائي إن مصطفى طالما ما عندوش سيكشن دخل شال سيكشن صاحبه مع سلمى أول لما دخلوا سلمى بتلقائية لمت كتب العملي عشان تصحح مسائل السيكشن اللي فات ووقفت في آخر المعمل مصطفى راحلها وبدأ يتكلم معاها بصوت واطي عشان ما حدش من الطلبة ياخذ باله:

- سلمى المفروض إن إنتي اللي بتشرحي

- إيه ده بجد؟!

- هو إنتي ما بتشرحيش خالص ولا إيه؟

- لأ ده أنا بشرح على طول كل مرة بشرح

ينظر إليها قليلاً ولا يتكلم فتستكمل كلامها:

- صدقني يا دكتور على طول بشرح، بس أنا يعني النهاردة

تعبانة شوية.

- مبدئياً يا سلمى أي حد بيبدأ الكلام بصدقني ما بصدقوش

وألف سلامة عليك، بس انا لو حاسس إنك تعبانة لدرجة إن إنتي

مش هتقدري تشرحي، ما كنتش طلبت منك تشرحي، إتفضلي يا

سلمى إشرحي السيكشن..

- أصل يا دكتور تتغير نبرة صوته إلى الحزم: أصل إيه يا
دكتورة، إنتي ما حضرتيش السيكشن ولا إيه؟

- لأ طبعاً حضرته أنا حتى لو هصلح الكتب بس فأنا لازم
أحضره

- يبقى تتفضلي تشرحي

- بس أنا

- اتفضلي وإلا هبلغ رئيس القسم إنك مش ملتزمة في تنفيذ
تعليماته، اتجهت سلمى إلى مقدمة المعمل وبدأت في الشرح، هي
فعالاً كانت محاضرة السيكشن كويس، بس صوتها كان واطي شوية.
مصطفى بذوق شديد: دكتورة سلمى من فضلك تعلي صوتك
عشان الطلاب اللي ورا كده مش سامعين. إتكلت على الله وشرحت
السيكشن بالتفصيل ولما كان أي حد بيوقفها تشرحله نقطة كانت
بتفرح جداً؛ لأنها كانت بتحس إن الطلاب متواصلين معاها وفي
الآخر قدرت تشرح السيكشن وشرحها كان كويس جداً بالنسبة لأول
مرة سلمى كانت فرحانة أوي إنها تخطت حاجز الخوف من مواجهة
الطلاب، وبعد السيكشن لحقت مصطفى وهو خارج على الباب:
-دكتور أنا مبسوفة أوي إن أنا شرحت،أنا كنت خايفة جداً

- طب كويس

- على فكرة أنا كنت عارفة إنك ما كونتش هتقول لدكتور
عمر عليا حتى لو ما شرحتش..

- أقوله عليكى إيه يا بنتي اللي بتقوليه ده إحنا في حضانة؟!؟

- قصدي يعني ما كونتش هتبلغه؟!؟

- ليه يعني كنت هبلغه عادي

- لأ إنت طيب أوي وماكنتش هتقله

- أه يا سلمى، ما كنتش هقله عشان كان ممكن يتضايق
منك إنتي وكريم وإنتي وهو إخواني، ومش عايز أتسبلكوا معاه
في مشاكل بس لو سمحتي يا سلمى بلاش كده..

- بلاش إيه؟!؟

- مش معنى إن كريم حابب يساعذك وده شيء جميل، إن
إنتي في المقابل تتحولي لشخص فعلاً محتاج مساعدة ما تداريش
في حد، إنتي شاطرة يا سلمى ولازم تثبتي ده لنفسك ولأساتذتك
ولطلابك، بلاش تتحولي إلى معيدة ما بتعرفش تشرح مع إنك
بتعريف عملي كل حاجة.

- حاضر يا دكتور حضرتك عندك حق

- وانصرف وهو يفكر أكيد ما كنتش هقول للدكتور عليكي
عشان أنا ما أقدرش آذيكى، ربنا يا سلمى يتوب عليا من اللي
أنا فيه ده وأعرف أطلعك من جوايا . وانصرفت أيضاً وهي تفكر..

- المشكلة إن كريم طول الوقت بيعاملني على إنى إمكانياتي
محدودة والمشكلة إن أنا بوافق عشان بحس إنه بيفرح لما بيحس
إنه كده بيساعدني، ده غير إن أنا واحدة واحدة بالاقى نفسي
أخذت على مساعدته؛ لأنها فعلاً بتبقى أريح أنا لازم أحاول
أوريله إن أنا مختلفة بس أنا مش بلاقى فرصة أتكلم معاه أصلاً.
ورجعت سلمى المكتب ولقت دعاء زميلتها، الاتين كانوا فاضيين
قعدوا يرغوا ودخل كريم كان خلص مع دكتور عمر، سلمى أول
لما شافته:

- كريم مش أنا شرحت في السيكشن النهاردة

- بجد؟! طب كويس

تعجبت سلمى من رد الفعل، كانت تتوقع مزيد من التشجيع
ولكنه لم يحدث. واستكمل هو الحوار: عارفة د.عمر كان عايزني
في إيه؟

- لأ مش عارفة

قاطعت الحوار طالبة تسأل كريم على جزئية للشرح.. فوقف معها على باب الغرفة يشرح لها وفرحت سلمى جداً؛ لأنها ما كانتش مستعدة تسمع أي رغي منه دلوقتى بعد رد فعله البارد على حاجة مهمة جداً بالنسبة لها، قعدت ترغي مع دعاء وانضمتلهم شروق زميلتهم وكانت مبسوطة أوي، بس ما خدتش بالها إن كريم طول اوي مع البننت دي..



obeikandi.com

الحلقة الخامسة والعشرون

(اخرج من العلاقة المملة)

وبعد مرور ساعة من قعدة الصحاب بتاعت سلمى وزميلاتها، وفي نفس الوقت كان كريم واقف يرغي و يهزر ويشرح للطالبة اللي جاتله، كان باقي آخر سيكشن خلصوا السيكشن وكريم طلب من سلمى تقعد معاه شوية في كافيه اللي جنب الكلية عشان عايزها في موضوع مهم جداً وما ينفعش في التلفزيون، استأذنت سلمى من باباها ووافق وراحت مع كريم، هو كان ساكت بشكل غريب وسلمى سألته:

- في إيه يا كريم؟

- سلمى أنا حاسس إن إنتي ما بتحبنيش خالص أو حتى مش معجبة بيا، أصلاً إنتي واخده موضوعنا جوازة وخلص.

- ليه بتقول كده؟

- ده إحساسي يا سلمى وإتاكدت منه النهاردة لما إتعمدت أقف مع واحدة أهزر وأضحك ساعة بدون مبرر، وإنتي حتى ما بصتيش مش ما غيرتيش!

- إيه ده أنا بس بسبيك براحتك عشان ما أخنوقكش

- صدقيني يا سلمى، إنتي لو بتحبييني أو مشغولة بيا كنتي تلقائي حسيتي بضيق..

- كريم إنت غريب جداً، إنت عايز الدنيا كلها تبقى عليك
إنت عايزني أسمعك وأحبك وأغير عليك وأنهر بيك..

- قصدك إيه يا سلمى؟

- قصدي إن إنت كمان لو ركزت هتلاقي إن إنت واخدي كده
وخلص من غير ما تحاول مرة تعرف أنا بحب إيه، بكره إيه،
كريم إنت حتى ما تعرفش إخواتي اسمهم إيه، إنت طول الوقت
بتحكي لي عن نفسك وهواياتك ومغامراتك الفظيعة حتى النهاردة
لما جيتلك مبسوفة وقولتلك إنني شرحت في المعمل ولا اهتميت،
إنت مش شايفني يا كريم، مش شايف غير نفسك بس..

- إنتي قصدك إن أنا هايف يا سلمى وعايز واحدة تسمعني
وخلص وتبقى هايفة عشان تتبهر بيا وترضي غروري..

- بالعكس يا كريم، أنا مش قصدي كده، يمكن قصدي إن
إنت محتاج واحدة تانية غيري، واحدة تثير اهتمامك، إن إنت
تستكشف أفكارها وميولها ورغباتها ما تبقاش عادية أوي بالنسبة
لك زيي كده..

- بس أنا مش شايفك عادية يا سلمى، انا شايفك بنت مؤدبة وذكية وتؤتمني على بيتي وأولادي في المستقبل..

-مش كفاية يا كريم،كريم صدقتي إنت لو كملت معايا هتدم وأنا كمان هندم، كريم إنت تستحق واحدة فعلاً تبهرك،واحدة تضحكك بهزارها لما تسمع صوتها قلبك يفرح، واحدة تخليك تفكر إيه اللي ممكن تعملوا عشان تبسطها وترضيها، صدقتي يا كريم لما هتلاقوها هتحمدم ربنا إن إحنا ما كملناش في العلاقة الممله دي..

- إنتي شايفة كده يا سلمى!؟

- أنا متأكدة يا كريم

-طيب تحبي نحاول مرة ثانية؟

-الموضوع مش محتاج محاولة ثانية يا كريم، الموضوع عامل زي التفاعل اللي بنعملوا في المعمل يا كريم، بنحط مادتين على بعض، يا إما يتفاعلوا مع بعض ويدونا مادة جديدة، يا إما ما يتفاعلوش أصلاً..

-خلاص براحتك يا سلمى

-كريم عشان خاطري ما تزعلش مني، ويا رب بييجي اليوم
اللي تشكرني لما تلاقي البنت اللي مش عادية بالنسبالك، زي ما
أنا قولتلك بس لما تلاقيها هتشكرني وعد..

-ماشى يا سلمى

وانصرف كل منهم إلى منزله ودخلت سلمى المنزل لتجدهم
وضعوا الغداء ويأكلون فانضمت إليهم في هدوء، وبينما تتناول
الطعام:

- مش أنا فركشت مع كريم

لحظة صمت كلهم ينظروا إليها ولا يتكلمون..

الأم:بتقولي إيه؟!

- فركشت مع كريم

- إنتي بتعملي فيا كده ليه؟! أنا قصرت معاكي في حاجة؟!
ده أنا طول عمري واهبة نفسي لخدمتكم، منك لله يا شيخة..
يقاطعها الأب: إستتي يا سمية، ليه يا بنتي بس؟ ده ولد كويس
جداً..

-مش قادرة يا بابا، بجد مش قادرة أجاريه،أنا كده ارتحت.

- أيوة يا بنتي بس كنتي حاولي تاني يا سلمى، الولد لقطه،
طيب ما فيش فرصة تتصالحوا تاني؟

- لأ يا بابا مفيش

- قدر الله وما شاء فعل، ربنا يرزقكوا باتنين أحسن منكوا

- الأم: ربنا بريء من بنتك وعميلها وبترها على نعمته، ربنا
يعوض عليا أنا.

وتركت الأم الطعام واستمرت فترة خصامها لسلمى لمدة
أسبوع وباباها كمان ما كانش مبسوط منها، بس كان بيكلمها
عادي، الجو اللي حصل في البيت خلاها تتمنى ما يجيلهاش
عريس تاني عشان بدأت تحس إن هي إنسانة فاشلة في التعامل
مع العرسان، ولو جه عريس تاني هتبقى مطالبة بإثبات عكس
ده، وده في حد ذاته هيضغط على أعصابها، أما عن حياتها في
الكلية فعلاقتها بكريم كانت في الأول متوترة، بس شوية بشوية
بدأوا يفكوا مع بعض وده خلاها تلجأ لمصطفى في مساعدات
كثير لما تقف أودامها أي حاجة؛ لأن هو وكريم كانوا أكبر معيدين
في القسم، هو كان مستغرب هي ليه بتلجأله مع إن كريم موجود،
هو ما كانش يعرف إن هما سابوا بعض، غرور كريم ما سمحلوش
يقول إن سلمى سابته فقرر إنه يعتبر الموضوع هايف، وما جابش

سيرة لصاحبه وسلمى كمان ما جاش في دماغها تقول؛ لأنها ما كانتش تعرف إن مصطفى كان عارف الموضوع أصلاً، بس هي علاقتها بمصطفى كصديق بقت أقوى كثير وهو كالعاده مستعد إنه يساعدها في أي وقت، وبعد فترة كريم رجع ثاني طبيعي جداً معاها وما بقتش حاسة إنه شايل منها خالص، وده ريحها نفسياً جداً. وبعد مرور شهرين تقريباً سلمى دخلت غرفة المعيدين وما لقيتتش مصطفى استغربت؛ لأنه في العادة ببيجي بدري استنتت شوية وكلمته:

- ألو

- إديك يا دكتور، إنت إتأخرت يعني مش عادتك، فيه حاجة ولا إيه؟

-ماما تعبانة أوي يا سلمى، السكر علي عليها ومحجوزة في المستشفى.

- ألف سلامة عليها، مستشفى إيه؟

-الجنزوري

- هحاول أجي أظمن عليها

-ما تتعبيش نفسك، متشكر يا سلمى

وقفلت معاه ولسه هتبتدي تشتغل دخل كريم:

- سلمى بعد إذنك عايزك لحظة واحدة..

وراحت تشوفه عايز إيه فطفق ينظر إليها بسعادة بالغة..

- كريم مالك بتبصلي كده ليه؟

- لقيتها يا سلمى

- هي إيه دي؟

- اللي بتضحكني بهزارها وبحب أسمع حكاويها ورغيها
وبحب أتفرج عليها طول الوقت، وما بيقاش عارف أنزل عيني
من عليها.

- يا سيدي يا سيدي مبروك يا عم

- أنا جي أشكرك زي ما طلبتي

- العفو يا سيدي على إيه، بس إحكي لي والنبي يا كريم بحب
أسمع الحكايات دي أوي، محرومة بعيد عنك، إستتي هي أكيد
مش محجبة صح؟

- لا خالص محجبة عادي، بصي يا ستي أنا كنت رايح ألعب
درمز في حفلة في ساقية الصاوي، أصحابي عندهم فرقة، لما بتاع

الدرمز بيغيب أو يحصله أي ظرف بيكلموني أسد معاهم، ورحت لقيت واحدة محجبة لابسة محتشم جداً وواقفة هتعزف على الإكسيلفون..

- ها وبعدين

- الحفلة بدأت ولقيتها بتتحول بتروح في عالم ثاني وهي بتعزف، ملامحها وضحكتها وهي بتعزف خلوني ما نزلتش عيني من عليها، رحت بعد الحفلة قولت لها أنا كريم عازف درمز ومعيد في صيدلة وعرفتها بنفسي، راحت بصالي وقالتلي حد سألك، إنت رعاي أوي على فكرة..

- قالتلك كده بجد؟! الله يباركها ده أنا كان نفسي أقولك كده بس مكسوفة..

- لا والله؟!

- المهم كمل

- بس يا ستي، فضلت وراها عرفت مواعيد الحفلات اللي بتعزف فيها وقعدت أفتح معاها في حوارات لقيتها بتقولي فجأة لخص يا كريم، إنت عايز إيه؟

-لقيتني بقولها عايز أتجوزك

- إتقدمتها ووافقت، ويوم الخميس الجاي هنلبس الدبل

- شكلك مبسوط أوي

- أوي يا سلمى، أنا بجد أول مرة حد يبهرني كده، أحس إنني
مشدود لحد أوي كده، عقبالك يا سلمى.

- لأ يا عم، أنا خلييني كده أحسن، أنا شكلي

ماليش في مواضيع الجواز دي يا كريم..

- ما تقوليش كده، إنتي طيبة وجميلة أوي وفي يوم من الأيام
هتلاقي اللي يقدر يفهمك ويسعدك.

- ممكن، بقولك إيه مصطفى مامته تعبانه أوي ومحجوزة في
المستشفى، تيجي معايا نروحله؟

- إيه ده، ده أنا ماعرفش مش هقدر آجي معاكي النهاردة
عشان نازل أجيب الدبل مع سالي، أنا هكلمه وأحاول أبقى أروحله
لو قدرت..

- لأ أنا هروحله، ما يصحش، مصطفى كويس معنانا كلنا
ولازم على الأقل حد فينا يروحله.

وسألت بقيت زمايلها بس ما حدش وافق يروح معاها



obeikandi.com

الحلقة السادسة والعشرون

(خلينا إخوان آمن عشان ما نخسرش بعض)

تصل سلمى إلى المستشفى تتقر باب الغرفة، فتسمع صوت مصطفى يأذن لها بالدخول:

- أهلاً يا سلمى إتفضلي

- ألف سلامة على حضرتك يا طنط

-الله يخليكي يا حبيبتي، تعبتي نفسك ليه وكلفتي نفسك ليه؟

- لأ يا طنط دي حاجة بسيطة

- أه دي شوكلاتة باين

يتدخل مصطفى: ماما إنتي محجوزة هنا عشان السكر عالي عليك، ارحمي نفسك شوية.

لا تملك سلمى نفسها من الضحك..

- تنظر لها الأم: دمي خفيف حتى وأنا عيانة، كل الناس بتقولي كده.

- أه طبعاً يا طنط

تدخل أمل إلى الغرفة فينظر لها مصطفى:

- أمل أختي يا سلمى معيدة في كلية آداب وبتحضر ماجستير في علم النفس.

-تبتسم سلمى وتسلم عليها

تتظر لها أمل: إنتي سلمى بأه؟

- إيه ده يا دكتور إنت حاكيلهم إيه عني؟

- حاكيلهم عنك وعن كريم إن إنتوا من أعز أصحابي وزمايلي وعلى طول قاعدين مع بعض في المعمل وبنشتغل مع بعض وكده،

يدخل الطبيب إلى الغرفة: معلش هستأذنكوا عايزين نطمئن على الحجة، فيخرج مصطفى وسلمى، وتبقى أمل في الغرفة وتبدأ سلمى في الكلام:

- مامتك شكلها عسول أوي

- أه ماما دمها خفيف جداً وبتحب الهزار على طول

-شفت كريم النهاردة كان جي يعزمننا على خطوبته..

-كريم مين؟

-كريم يا دكتور،كريم زميلنا

-خطوبته لوحده؟

-أكيد لأ في عروسة معاه عادي يعني

-قصدي هو إنتوا مش مع بعض؟

-مع بعض إزاي؟! آآه..... إستتى..... إنت فاكرنا

لسه.....دي كانت فكرة فاشلة.....ده إحنا ما كملناش

شهر..

- لا أنا فاكركوا لسه في مشروع خطوبة يعني

- لأ والله خالص

- الواد كريم ده ندل ولا حكالي عن أي حاجة

- هو واضح إن موضوعه جه بسرعة جداً

- طب كويس عقبالك

- لأ خالص أنا مبسوطه كده، أنا فعلاً مش مستعده أدخل في

الحوارات دي تاني،أنا بحس إن المواضيع دي معقده جداً بالنسبة

ليا،أنا كده مبسوطه جداً في شغلي في وسطكم، أنا بحس إنني في

وسط إخواني ومش ناقصني حاجة خالص، ومش ناقصني أي

علاقات معقدة تستنزفني جسدياً وذهنياً..

- فعلاً!

- أيوة بجد يا دكتور الحب والجواز دول لما بيدخلوا في أي حاجة بيخربوها، يعني شوف أنا وكريم متفاهمين إزاي، لما جينا تقرب من بعض الموضوع بقى سخيف جداً، وبعدين أنا كده مبسوفة جداً وربنا كارمني في حياتي بناس جميلة جداً، طيب عارف يا دكتور أنا متهيألي لو كان فيه أخ في نفس الكلية ما كانش ساعدني ووقف جنبي زي ما حضرتك بتعمل..

- يا سلام دي حاجة جميلة خالص

- هي إيه دي يا دكتور؟

- مشاعرك النبيلة دي، طيب بصي يا سلمى أنا رأيي ترجعي الكلية دلوقتي لحسن د. عمر يتضايق إنك سايبية الشغل، والنهاردة فيه سكاشن كتير..

- حاضر يا دكتور، بس هكلمك أطمئن على طنط

- لأ ما تقلقيش، هما هيظبطولها السكر وهتخرج النهاردة

فتمشي سلمى ويهمس لنفسه: ربنا يستر على سكري أنا

وفي المنزل ليلاً بعدما وصل مصطفى وأمه وأخته، ودخلت

الأم لتتام..

خرج مصطفى وأمل ليستريحوا في الصالة فقد كان يوماً
مجهداً ولكن مصطفى يبدأ الكلام:

- أمل فيه خبرين خبر حلو وخبر وحش..

- طب قول الحلو

- سلمى و كريم سابوا بعض

- وعشان كده جاتلك المستشفى، دي ما بتضيعش وقت

- لأ يا أمل دول ساييين بعض بقالهم شهرين

- وإنت ما تعرفش؟

- لأ ما أعرفش

- طب والوحش إيه؟

- إن أنا زي أخوها

- فعلاً؟!

- أه هي قالتلي كده..

- كدابة

- نعم

- هي كدابة

- إزاي يعني، ليه بتقولي كده؟

- اللي تسيب شغلها وتيجي جري عشان تظمن على واحد غاب عن شغله وتتصل تظمن عليه لما يتأخر نص ساعة عن ميعاده دونا عن كل زميلاته، اللي هما أصلاً بقالهم زميلاته فترة أطول منها، ده ما يقاش زي أخوها ولا حاجة..

- أومال هي بتقول كده ليه؟

- بص يا مصطفى، كلمة أخوة وصداقة دي كلمة ناس كتير أوي بتبرر لنفسها مشاعر هما شايفين إنها مش المفروض تكون موجودة فبيريحوا أنفسهم بالكلمة دي..

- طيب وهي ليه شايفة إن المشاعر دي مش المفروض تكون موجودة؟

- أسباب كتير أوي يا مصطفى، أولها إن هي بقالها سنين أودامك وإننت ولا مرة حاولت تعبرلها عن مشاعرك، فهي من غير ما تحس يأسست منك واختارت الشكل ده للعلاقة، بحيث تقدر توجه مشاعرها تجاهك في إطار يرضيها نفسياً، والسبب الثاني إن هي فعلاً ممكن تكون قرفت من فكرة الارتباط دي وعدت

بتجارب بايخة كثير استهلكتها نفسياً وما بقتش عايضة تجرب
تاني..

- طب إيه، أصلح غلطتي بأه وأروح بكرة أقولها تتجوزيني
وأخلص الحوار ده بقي؟

- لا إوعى تعمل كده هتخضها، وممكن ما ترضاش تخرج من
فكرة الأخوة الوهمية اللي في مخها، وممكن ترفض وتبعد عنك
خالص..

- طب أعمل إيه يا فيلسوفة زمانك؟

- إحنا لازم نخليها تعترف لنفسها إنها بتحبك عشان لما
تيجي تتقدملها توافق من غير تفكير..

- أيوة يعني هعمل إيه؟

- لازم تخرج من دور الراهب اللي ما بي فكرش يرتبط ومتفرغ
دايماً لمساعدة سلمى، لازم تحس إن إنت ممكن تروح منها.

- طيب يعني هخطب وأفسخ مخصوص ولا هعمل إيه؟

- مش بالظبط إحنا هنقول إن إنت قريت فاتحة وداخل على
مرحلة خطوبة، ولما تبتدي تحس وتغير وتبتدي تعترف لنفسها إنها
بتحبك، ومش عايزاك تضيع منها ويبان عليها ساعتها هتتقدملها..

- قومي نامي يا أمل عشان إنتي شكلك لسعتي من كتر
التعب وبعدين هو خطيبك ده نازل أجازته إمتى عشان يكتب
عليكي وياخدك معاه ونخلص..

ويذهب مصطفى للنوم وهو يفكر كيف يتعامل مع الموقف
الحالي فيفكر أن يأخذ رأي دكتور عمر، فهو يعتبره بمثابة أب له.
وفي اليوم التالي في مكتب د. عمر حكاية عن كل حاجة وعن
كلام أمل ودكتور عمر ضحك من كلام أمل جداً، وقاله: لا يا عم
إيه الأوفر ده أنا هنكشها لك فتتكسف تروح إنت داخل على طول..

- إزاي يعني؟

- هتشوف النهاردة

المهم اليوم كان مضغوط شغل جداً والمعידين كلهم كانوا
شغالين جامد جداً، بيساعدوا في التصحيح والدكاترة طلبوا منهم
يتأخروا النهاردة، ويحاولوا يخلصوا أكثر حاجة ممكنة..

كلهم مشيوا ما عدا سلمى ودعاء ومصطفى، ودخل د. عمر
عليهم المكتب:

- دكاترتنا الجامدين عاش يا شباب، وبالمناسبة مبروك يا
دعاء على الخطوبة

- الله يبارك فيك يا دكتور، بس هستأذنك أمشي أنا بأه
عشان إتأخرت جداً.

- إتفضلي ولم يبق سواه ومصطفى وسلمى في المكتب فوجه
لهم الكلام: القسم كله ارتبط حتى حاتم بيظبط نفسه مع بنت في
سنة تالته، إيه رأيكوا إنتوا الاتنين ما تتكلوا على الله وتتجوزوا..

- ابتسم مصطفى ابتسامة عريضة ونظر لدكتور عمر..

بينما تصنعت سلمى عدم الاستماع وأبدت الانشغال في
التصحيح..

- مصطفى:سلمى د.عمر بيكلمك

فنظرت إليه:

- كنت بتقول حاجة يا دكتور؟!

فنظر إلى مصطفى بتعجب ثم نظر إليها:

- لا يا سلمى ولا حاجة شدي حيلك في الشغل

وخرج من الغرفة، فقامت سلمى هي الأخرى لتصرف..

- فسألها مصطفى:إنتي ما سمعتيش د.عمر؟

- لا سمعته بس ما ردتش

- طيب ليه، ده كان بيهزر إنتي كده أخرجتیه؟!

- مش مهم، أنا مش عايزة أي حد يقعد يحور وألاقي نفسي بعد كده بتكسف أقعد معاك، وأنا مش عايزة علاقتي بيك تتأثر بالهبل ده..

- نظر إليها بابتسامة مصطنعة تخفي خلفها كثيراً من الغيظ: هبل؟!

- أه هبل طبعاً

- لا ما تخافيش يا سلمى، مفيش أي حوارات ولا هبل عشان أنا أصلاً قرريت فاتحة..

- إيه؟!

- قرريت فاتحة مستغربة كده ليه؟!

- لأ أصل الموضوع ما كانش ليه أي مقدمات بس عموماً هي الأخبار الحلوة بتيجي فجأة كده، ألف مبروك.

- الله يبارك فيكي

- تتصرف سلمى ويبقى مصطفى..



الحلقة السابعة والعشرون

(الغيرة)

- ألو. أيوة يا أمل أنا عملت اللي قولتيلي عليه وربنا يستر
- عيب عليك ما تقلقش، طيب لما قولتلها قالتلك إيه؟
- حسيتها استغربت شوية، بس عادي يعني باركتلي وخلص..
- خلاص طالما عملت اللي أنا قولتهولك، يبقى تسمع كلامي بالحرف في بقية الخطوات..
- حاضر
- وفي اليوم التالي يصل مصطفى متأخراً ويدخل الغرفة، كانت سلمى قد حاولت الاتصال به عدة مرات، ولكن تليفونه مشغول..
- يدخل مبتسماً و تستقبله سلمى: كلمتك كثير قلقت لتكون طنط تعبانة عشان كده إتأخرت..
- لأ عادي بقى، إنتي عارفة يا سلمى مواضيع الارتباط في الأول مكالمات بليل وكدة عشان نعرف بعض أكثر..
- أه تمام، بس على فكرة إنت ممكن تشغل خاصية الويتينج عشان يعني لو حد عايزك ضروري يعرف يوصلك، مش شرط أنا أي حد..

- أه طبعاً، ما أنا فاهم خلاص هسغلها، إنتي عندك حق وانصرفت إلى عملها وتكرر هذا الموقف كثيراً واستمرت في تنبيهه كثيراً، ولكنها عزفت عن تنبيهه حتى لا يشعر أنها مهتمة بشكل زايد.

بدأ موضوع انشغاله عنها بشكل زايد يزعجها حقاً، فهو طوال الوقت بيرغي في التليفون وساعات بتحسه قاعد سرحان ومبسوط، سلمى بكره عندها أول امتحان نظري في الماجستير، وكانت قلقانة جداً، فقررت إنها تكلمه ولكنه مشغول كالعادة فأصيبت بغضب شديد وأصرت إنه يرد عليها، وبعد محاولات عديدة رد:

- ألو

- أنا بقالى ساعة بتصل بيك على فكرة

- معلىش يا سلمى، إنتي عارفة بقى..

- هو إيه اللي عارفة بقى، هو أي حد يخطب يتقطع عن

العالم، قولتلك ميت مرة شغل الويتينج يا مصطفى..

- مصطفى حاف كده؟!

- أه مصطفى حاف أنا معيدة وإنت معيد الفرق ما بينا ست

سنين مش حاجة، يعني لو مصر بيقى تقولي يا دكتورة سلمى..

- لأ طبعاً مش هقولك يا دكتورة
- خلاص يبقى هقولك يا مصطفى
- قولي اللي إنتي عايزاه، هو إنتي كنتي عايزة إيه أصلاً؟
- عايزة إيه في إيه؟
- كنتي بتتصلي عايزة حاجة مهمة ولا بتسلمي عادي؟
- أسلم؟! لأ طبعاً كنت عايزة حاجة بس نسيتهها ..
- طب خلاص يا ستي، ما تزعليش إنتي مذاكرة كويس
عشان امتحان بكرة؟
- مش عارفة، مع السلامة
- مع السلامة
- ينده بصوته عالي: يا أمل
- أيوة يا مصطفى
- بتغير يا أمل بتغير أوي كمان أقولها ولا إيه؟
- إنتقل شوية واعمل اللي هقولك عليه عشان تستوي خالص.
وفي اليوم التالي..
- سلمى بقولك إيه كنت عايزة أسألك على حاجة.. سألت
أمل ما عرفتهاش وإنتي مكان أمل مش كده ولا إيه مش إنتي
دايمًا بتقوليلي إن أنا زي أخوكي؟

فنظرت له بضيق متصنعة ابتسامة: أه طبعاً، أنا مكانها أوامر..

- عايز أعمل لبسنت سلسلة فضة حروف، ما تعريفش بتعمل فين؟

- هي اسمها بسنت؟

- أه، حلواوي صح؟

- لأ بالعكس سخيف أوي، ما بحبش الاسم ده، المهم إن أنا ماعرفش حد بيعمل سلاسل، للأسف ما حدش عملي قبل كده، أي استفسار تاني عندك؟

- لأ يا سلمى كتر خيرك.

وانصرفت وتركته، واستمر الوضع على هذا المنوال، تغيرت سلمى من الرقة والخجل فقد أصبحت عدائية جداً تجاهه وأصبحت عصبية بشكل عام إلى أن جاء هذا اليوم..

دخلت سلمى إلى غرفة المعيدين لتجده فاتح اللاب توب ومنتبه جداً، فشعر بدخولها فناداها: سلمى تعالي شوي في كده..

- أشوف إيه؟

- بصي معايا على القاعات على اللاب توب قوليلي رأيك، أنا وبسنت محتارين جداً أنهي قاعة في الخطوبة؟

- لأ معلش دي حاجات ما ينفعش حد يشارك عروستنا الجميلة في اختيارها، إنتوا جوز عصافير تنقوا مع بعضيكوا..

- عندك حق

وجلست على مكتبها لكن منظره وهو يطالع القاعات باهتمام ما قدرتش تسكت..

فوجهت له الكلام: دكتور ممكن تشيل فيشة اللاب توب عشان عايزة أحط الموبايل في الشحن لحسن هيفصل..

- أنا كمان اللاب توب بتاعي لو شيلته من الفيشة هيفصل..

بعدائية شديدة ترد: مش مشكلتي

- طيب حطيه في فيشة تانية

- دي الفيشة اللي جنب مكتبي وأنا عايزاها

يراقب باقي المعيدين الموقف ويستغرب الكل موقف سلمى ويقاطع الموقف رنة تليفون مصطفى: خلاص يا سلمى، أنا هتكلم في التليفون، خدي إنتي الفيشة مش مشكلة. يجلس إلى مكتبه يبدأ حديثه في التليفون يخفض صوته، ولكنه ما زال مسموعاً بالنسبة لسلمى فتسمعه وهو يقول:

-لأ خلاص، نقى إنتي القاعة اللي تحبها، دي حاجة بتاعتك إنتي..

- أه أنا هوافق على اللي إنتي تختاريه .

- المهم إنتي عاملة إيه بقالنا ٨ ساعات ما تكلمناش؟

لم تستطع سلمى تحمل المزيد فقامت تفتح أدراج مكتبها وتقلب فيها، وترزع بصوت عالي وتسال زميلها: أنا كنت جايبة نسكافية كتير أوي وحطاه في المكتب حد شافه؟

-نظر لها مصطفى في هدوء:سلمى ممكن توطي صوتك شوية، أنا مش عارف أتكلم..

- لأ عادي،إنت ممكن تطلع تتكلم برة، ده هيكون أحسنك هتسمع أحسن،هنا مش مكان للتليفونات..

- حاضر يا سلمى وخرج مصطفى من الغرفة..

- تأتي دعاء لتجلس بجانب سلمى:سلمى إنتي بتعملي كده ليه مع مصطفى؟!

- بعمل إيه؟

- بتتصري في بشكل غريب أوي يا سلمى والكل واخذ باله!

شعرت سلمى بأسى فظيع وردت:

- دعاء أنا تعبانة جداً ومحتاجة أروح، ممكن تشيلوا مكاني في الشغل النهاردة،أنا مش قادرة أقعد . يرن تليفون سلمى ليقطع حوارهم، فتسمعها دعاء..

- أيوة يا ماما

- أنا كويسة. الحمدلله

- عريس إيه، ابن خالة جوز سها، كمان الموضوع فيه سها

- لأ مش هينفع يا ماما

- كده أنا مش عايزة، مش هقدر دلوقتي

- طب خلاص يا ماما لما أجيلك أنا كده كده تعبانة وجاية

دلوقتي

- مع السلامة

قفلت سلمى ولقيت دعاء بتبصلها: سلمى إنتي جايلك عريس؟

- واضح كدة، بس مش هينفع دلوقتي، أنا مش هقدر دلوقتي

خالص. المهم أنا همشي يا دعاء وبلغني إنتي دكتور عمر إن أنا فعلاً تعبانة.

في نفس الوقت برة يتحدث مصطفى في التليفون:

-أيوة يا أمل أنا خلاص هقولها، أنا مش قادر أشوفها

متضايقه كدة، خلاص هي كده أكيد حست إنها بتحبني، نخلص

بقى من الحوار الفكسان ده وأقولها..

- إعمل اللي إنت عايزه

يدخل مصطفى إلى الغرفة يسأل دعاء: هو فين سلمى؟

تهمس له دعاء:

-سلمى روحت بدري، هي بتقول إنها تعبانة بس الموضوع شكله كده فيه عريس..

-عريس؟! يا حظك الأسود يا مصطفى ويمسك الموبايل يحاول الاتصال بها، ولكنها لا ترد فينظر إلى الجميع: حد معاه عنوانها؟

-ما حدش معاه عنوانها

- أنا ماشي،أنا تعبان قولوا لدكتور عمر إني تعبت جداً ولازم أمشي .

وينصرف. ينظر بقية المعيدين إلى بعضهم في تعجب..

وصلت سلمى إلى البيت لتجد أمها تنتظرها، وهي فرحة جداً بموضوع العريس، ولكن سلمى رفضت تماماً،أدى هذا الرفض إلى أن البيت يولع في ثانية ما بين سلمى ومامتها، دخلت سلمى غرفتها،

عاد الأب من العمل ليدخل إليها الغرفة..



الحلقة الثامنة والعشرون

(النهاية)

يدخل الأب إلى الغرفة

- في إيه يا سلمى، عاملة المشاكل دي كلها مع مامتك ليه؟

- بابا بابا مش هشوف عرسان أنا دلوقتي

- ليه يا بنتي إديني سبب؟!

- عشان خاطري يا بابا، بجد مش هقدر دلوقتي أرجوك

ريحني المرة دي عشان خاطري، وأنا هسمع كلامك بعد كده لو

سمحت يا بابا..

- حاضر يا سلمى مع إني مش مقتنع، بس هعملك اللي إنتي عايزاه،

يخرج الأب من الغرفة..

تفكر سلمى، أنا كده طول ما هو أودامي مش هعرف أعيش،

مش هعرف أشوف شغلي وحياتي، ولا هعرف أرتبط، مش هقدر

أستحمل منظره وهو داخل بدبلة والناس كلها بتباركله، أنا لازم

أبعد وبعد تفكير طويل:

- ألو دكتور عمر

- إزيك يا سلمى، أنا عرفت إنك تعبتي النهاردة ومشيتي بدري ..

- فعلاً يا دكتور أنا تعبانة، بس بكلم حضرتك عشان طلب تاني ومش عايزاك تكسفني فيه ..

- خير يا سلمى؟

- أنا محتاجة أتقل جامعة القاهرة وعايزة حضرتك توافقلي على طلب النقل وتكلملي رئيس القسم هناك ..

-ليه يا سلمى، إنتي معيدة كويسة وأنا محتاجك معايا؟

- أرجوك يا دكتور لو سمحت، أنا مش هقدر أتحمل أكثر من كده ..

- يا بنتي في حد ضايقتك، إيه اللي حصل بس؟

- أرجوك يا دكتور ما تضغطش عليا أكثر من كده ويختق صوتها بالبكاء ..

- خلاص يا سلمى، تعاليلي بكرة وأنا همضيلك الطلب وأكلمك رئيس القسم هناك .. وفي نفس الوقت في منزل مصطفى:

- منك لله يا أمل، أنا غلطان إنني سمعت كلامك، أهى على بختي جالها عريس ..

- ما تخافش يعني حتى لو شافته النهاردة مش هتلق تاخذ
قرار وتوافق وعلى العموم خليك وراها على التلفون.

- ما أنا وراها بس قفلته

- خلاص أنا هقولك فكرة حلوة، أنا دلوقتي هنزل أشتريكوا
الدبل عشان بكرة تتقدملها أودام الناس كلها، وتبقى مفاجأة،
البنات بتحب الحركات دي أوي. وفي صباح اليوم التالي قدمت
سلمى طلب النقل لدكتور عمر ومشيت عشان تروح جامعة
القاهرة، بينما ينتظرها مصطفى في غرفة المعيدين، وهو لا يعلم
أنها جت ومشيت من غير ما يعرف، فيذهب إلى مكتب د. عمر
فيجده منشغلاً مع إحدى دكاترة القسم ويسأله على استحياء:
هي سلمى قالت لحضرتك إنها مش جاية النهاردة؟

- لأ سلمى لسه ماشية جالاً، قدمت طلب نقل وراحت تمضيه
من جامعة القاهرة..

- وحضرتك وافقت؟!

- أه شكلها كان متضايق جداً، ما أقدرتش أقولها حاجة..

- طيب أنا هلحقها

- مصطفى لو رئيس القسم مضالها على الطلب، أنا مش هقدر أتصرف.. يخرج مصطفى من المكتب.. يمسك د. عمر تليفون المكتب:

- ألو دكتور زكريا، لو جاتلك المعيدة اللي اسمها سلمى اللي قولتلك عليها عشان تنتقل عطلها شوية وما تمضيهاش. يغلط د. عمر التليفون، فيسأله زميله الجالس أمامه:

- طيب ليه قلت لمصطفى إن إنت مش هتقدر توقف النقل؟!!

- خليه يجري عشان يلحقها، كل ما هيجري أكثر، هيعرف يحافظ عليها بعد كدة أكثر. يفكر مصطفى في أن يلحقها بأقصى سرعة، يقرر أن لا يأخذ سيارته، يركب تاكسي إلى أقرب محطة مترو ثم يركب المترو إلى محطة السيدة زينب، ينزل يمشي بسرعة عالية تصل إلى مرحلة الجري، يستوقف تاكسي ولكن ينصحه السواق، امشيها على رجلك أسرع، يقرر أن يمشي في سرعة كبيرة، يصل إلى الجامعة يسأل عن مكتب رئيس القسم، فيهرول مسرعاً يفتح باب المكتب دون الرجوع إلى السكرتيرة، ويدخل يتعجب رئيس القسم من شكله، فهو ينهج ويبدو عليه التعب..

- إنت مين؟!!

تقاطع سلمى الموقف لتدخل فتجد مصطفى وأول ما يراها :

- سلمى الحمد لله إن أنا لحقتك..

- مصطفى إنت إيه اللي جابك هنا وعرقان كده ليه وبتتهج

ليه، في إيه؟

- سلمى أنا بحبك ومفيش حاجة اسمها بسنت، أنا مش

ممکن أتجوز حد غيرك، بس كل ما أكلمك تقولي لي إخوان

فده الحل الوحيد اللي كان أودامي، إتجوزيني يا سلمى..

تنظر إليه في تعجب: يعني كل الغيظ اللي أنا كنت فيه ده، ومفيش

حاجة اسمها بسنت؟!

- أه مفيش غير سلمى، إتجوزيني يا سلمى. تنظر إليه بغيظ:

لأ مش هتجوزك وتتركه وتمشي.. فيسرع أكثر فتسرع أكثر حتى

اضطر إلى أن يصل لمرحلة الجري فلحق بها ومسكها من ذراعها..

- إنت إتجننت يا مصطفى، سيب دراعي ..

- لأ مش هسيبه، أنا عندي استعداد أكتفك عشان تقفي

تتكلمي معايا..

- هصوت وألم عليك الناس

- هقولهم مراتي إتجننت وبتجري في الشارع، وهما هيصدقوني

عشان شكلك اليومين دول يجيب جدًّا..

- طيب يا مصطفى، أنا هقف وأتكلم معاك وهسألك سؤال واحد، أنا بقالي ٣ سنين حاسة إنك بتحبني ما قولتش ليه؟!

- كنت محتاج أتأكد من مشاعرك ومشاعري..

- عين العقل حقك، لكن عارف على ما إتأكدت إنت أنا شوفت إيه؟

- لأ مش عارف..

- شفت ميار اللي كانت بتبصلي بغيظ وبتضايقني عشان إنها أحلى مني، مع إنني ما ليش ذنب، مش أنا اللي خلقت شكلي عادي وشفت أمي اللي كل يوم تبصلي وبتتحسر إنني ما بيجليش عرسان، ده غير الكائنات اللزجة اللي كل ما تشوفني تسألني، مفيش عريس ما تشدي حيلك يا سلمى، متخيل أنا كام مرة نمت معيطة في أوضتي وإنت بتتأكد من مشاعرك؟!

- بصراحة لأ

- أنا أقولك كتير أوي مرة عشان أهل العريس ما إتصلوش بسرعة، ومرة عشان الكل بيلومني إن الموضوع إتفشك، ومرة عشان شايلة هم إنني أكمل مع إنسان ما بعرفش أتكلم معاه كلمتين على بعض، أنا مش زيك يا مصطفى، ماليش الحق إنني أختار وأتأكد من مشاعري..

- أيوة يا سلمى، بس أنا ما ليش ذنب..

- ما أعرفش ليك ذنب ولا لأ؟ بس اللي أعرفه إنك لو كنت
أخذت القرار أسرع ما كنتش أنا مريت بكل ده..

- طيب حتى لو إنتي شايفة كده ممكن تسامحيني ونبدأ من جديد؟
يسمعوا أصوات تأتيهم من حولهم: سامحيه بأه وخلاص
ينظرون حولهم يجدوا إن عديد من الطلاب ملمومين حولهم..

- إيه ده يا مصطفى، ده الناس ملمومة حوالينا..!

- طيب طالما الناس إتلمت حوالينا بقى، يبقى ما بدهاش..
ينزل على ركبتيه، يخرج علبة الدبلة من جيبه، وينظر إليها في
حب:

- تتجوزيني يا سلمى وأوعدك إنني هعوضك عن كل حاجة
وحشة شوفتيها، وهخليكي أسعد إنسانة في الدنيا؟

يترقب الجميع اللحظة.. تاخذ دقيقة لكي ترد وتقول: قوم
من على الأرض يا مصطفى وشيل الدبلة دي..

- للدرجة دي يا سلمى..!

- أيوة ما أنا لو وافقت الفيديو هيبقى على الفيس بكرة،
وماما هتدبحني إنني لبست الدبلة وهي مش موجودة وضيعت
عليها اللحظة..

- يعني موافقة؟

- أيوة طبعاً

تتطلق صيحات الجميع من حولهم بالفرح والتهبيص وبيبارك
لهم الجميع..

وتوتة توتة خلصت الحدوتة، وعقبال عندكوا يا بنات..



| الصفحة | الفهرس |
|--------|---|
| ٥ | إهداء:..... |
| ٧ | الحلقة الأولى:..... (الجواز أولاً) |
| ١١ | الحلقة الثانية:..... (لا بأس بقليل من التغيير) |
| ١٥ | الحلقة الثالثة:..... (صاحباتك اتخطبوا وانتي لأ) |
| ١٩ | الحلقة الرابعة:..... (أنا Invisible) |
| ٢٥ | الحلقة الخامسة:..... (حان وقت الظهور) |
| ٣١ | الحلقة السادسة:..... (كيف تتعامل مع الناس اللزجة) |
| ٣٧ | الحلقة السابعة:..... (مش كل ما واحد يقولي سلام عليكم هحبه) |

- ٤٥ الحلقة الثامنة:
(أخيرا جالها عريس)
- ٥٥ الحلقة التاسعة:
(في انتظار أم العريس ترد علينا)
- ٦٣ الحلقة العاشرة:
(حنفي، خلاص هتتزل المرة دي)
- ٦٩ الحلقة الحادية عشر:
(يلا نجهز البيت للعريس)
- ٧٧ الحلقة الثانية عشر:
(أول مكالمة مخطوبين)
- ٨٧ الحلقة الثالثة عشر:
(دي عادية جدا، هو أحلي منها بكثير)
- ٩٣ الحلقة الرابعة عشر:
(من أولها بتكذب أمك عشان خاطرها يا أحمد)
- ٩٩ الحلقة الخامسة عشر:
(ماما انا زعلان يا ماما)

- ١٠٧ الحلقة السادسة عشر:
(لما بعد فشلة الجوازة)
- ١١٣ الحلقة السابعة عشر:
(أدي أخرة اللي تحب في التلفون)
- ١٢١ الحلقة الثامنة عشر:
(حالة ما بعد فك الارتباط)
- ١٢٩ الحلقة التاسعة عشر:
(بيحبها و ناوي يقولها)
- ١٣٥ الحلقة العشرون:
(دعوة أم)
- ١٤٥ الحلقة الواحد والعشرون:
(تتجوزيني)
- ١٥٣ الحلقة الثانية والعشرين:
(ضحيت هوايا بهواه)
- ١٦١ الحلقة الثالثة والعشرين:
(حلو و رغاي)

- ١٧٣ الحلقة الرابعة والعشرون:
(ما تداريش في حد)
- ١٨٣ الحلقة الخامسة والعشرون:
(اخرج من العلاقة المملة)
- ١٩٣ الحلقة السادسة والعشرون:
(خلينا اخوات أأمن عشان ما نخسرش بعض)
- ٢٠٣ الحلقة السابعة والعشرون:
(الغيرة)
- ٢١١ الحلقة الثامنة والعشرون:
(النهاية)

obeikandi.com

حقوق الطبع محفوظة للناشر



أطلس

للنشر والإنتاج الإعلامي

يحظر نشر أو اقتباس أى جزء
من هذا الكتاب إلا بعد الرجوع
إلى الناشر